

# JESUS JYCAAJNISAWESH DYUS YUWE'S PTA'SHNI

## Dyus Espiritu's caajya' neeyũuni

**1** <sup>1</sup>Jesusa' nyafyte quĩva caapiya'jna quĩquĩva ew yũuc cielute tejcacach tyã'sna, Teofilo, indyna pta'shna andy libru nyafyte fi'tj. <sup>2</sup>Tyã' cielun u'jmey, pitstjê'jwe'shtyi tyjityjcu jycaajya', sa' ma'wërraj yũuwa'ja'sva caapiya'cj Dyus Espiritu pu'chte. <sup>3</sup>Sa' uunijũ qui' ïtyi quiiterra', nyaffi na'wëyrraac pety cacue yã'jrra tyãawe'shtyi vyaana ũsu' cuarenta entepcach. Tyã'wë ïtyi yuuyujga sũjna ew jiyucajncu tyã'wë vyaana ũsu', sa' Dyus ma'wë jycaajwa'ja'sva pta'shnac ũsu'. <sup>4</sup>Sa' cielun u'jya'varra', tyajy tyjityjnisawe'sh yacj nee ũsí, Jesusa' neewe'wec Jerusalen chjambuj u'jmée ũscajn na'jina:

—Mũytjaswe, andy Tata caajya' neeyũuc tyã's jypa'gapcach, andy i'cue'shtyi pta'shtju tyã'sna. <sup>5</sup>I'cue'sha' jii i'cue Juana' naasáa yu'terraac acjna bautisaĩ'. Nava i'cue'sha' Dyus Espiritute yuu bautisãyni yuune'cue jyucaysa ja'ndarra'j tyachmeyna jĩnac we'we.

## Jesus cielun shawendni

<sup>6</sup>Tyajũ' Jesus tyjityjnisawe'sha' tyãa yacj ũsrra', paapëjtyti: —Áchja' indy váa naa ensu Israelwe'shtyi romanowe'sh cuseju nwe'wewa'jsane'nga jĩte', <sup>7</sup>Jesus pasrra':

—I'cue'sha' jiyuwa'jsamée i'cue Israelwe'shtyi nwe'wewa'j en bagachteva. Dyus cue'sh Tata yuurráa tyã'wë yũuwa'j ena's jiaa'. <sup>8</sup>Nava Dyus Espiritu quĩjte', tyãa yu's jypa'gawa'jsa yuji'cue, quĩjteva jyuca ájaya'. Sa' tyã'wë yũunijũ casejrra u'juene'cue andya's tuutje'jya' Jerusalente, Judea quiwesu, vite' Samaria quiwesu mtee mtee maa quiweteva jyuca jĩnac jycaaj.

<sup>9</sup>Tyã'wë we'wena jyã'jni'jũ tyachmeyna, tyãawe'sh tjengna ũsiyna Jesusa' èete quiisnic yuu cielun pe'jna u'jya'. Naapcachja' tãapj cũjrra apjcu, atsa' peena yu' vyaame'. <sup>10</sup>Tyã'wë Jesusa's cielun pe'jna u'juetste', tyãawe'sha' cielute pagayna ũsiyna, e'nz pitstjê'j ropa chijmesa atjrra tyãawe'sh pucately vyaa. <sup>11</sup>Tyã'wë vyaarra', na'wëty we'we:



(Hechos 1.8)

—Galileajuwe'sh, ¿quíj yuupa'ga cielute pagayna üscue? Jesusa' i'cue'sh cshavyuj ma'wē cielun u'juetstecue uy, tyā'wēyrráa qui'quin quiijana tyāáírráa jīnaty pta'sh.

### Judas pa'gate Matias tyjityjni

<sup>12</sup>Tyajú' tjā'j Olivos yaasesaju u'jty Jerusalen chjambna shawendna. (Tyāa Olivos vitsa' Jerusalen utyac yu' teech kilometrorráac āj jyu'j neeyū'.) <sup>13</sup>Jerusalente pa'jrra', tyāawe'sh paandeeni ēe yatte tejcaty Pedro, Jacobo, Juan, Andres, Felipe, Tomás, Bartolomé, Mateo, Jacobo Alfeo nchi'c, Simon cananista ju'ngusa, vite' Judas Jacobo nyacj tyāawe'shtyi yu'. <sup>14</sup>Tyāawe'sha' cyteety tajtatey pcjaacje' Dyus yacj puuty we'weya' jyucaysa yacj, Jesus nyacjwe'sh vite' njī'j Maria, tyā'wēy vite u'ywe'sh yā'jrra.

<sup>15</sup>Tyān ensuc Pedro' cytee pcjaacjesawe'sh ciento veinte cshavyte yujurra na'jī:

<sup>16</sup>—Yacjtjē'ljwe'sh mjiiyuwe: Judas ewmēe yūuwa'ja's Davida' fi'cj Dyus Espiritu caaūusutje'ljni's Dyus librute tyā' cytey yuuwa'jsa yuj yu'ne'. Tyajīic Judasa' Jesusa's preesu'jwa'jsaty pe'jna cūjrra ducj. <sup>17</sup>Judasa' cue'sh yacj u'jusac yu', tyāasac cue'sh na'wēy mjīiwa'jsa yu'. <sup>18</sup>Nava Jesusa's tyweyni vyuju quiwec wey, sa' cyteec tēecjēe dyictjeju sutenus wete, atsa' meetu'ja' jyuca umbuc. <sup>19</sup>Tyajú' Jerusalentewe'sha' tyā'wē yūuni's jiyurra', tyāa quiwe's Acéldama yasety qui'p, tyāawe'sh yuwete yu' Ee pcawni quiwe jīnic yu'. <sup>20</sup>Judas uuwa'ja's we'werrac Salmo librute na'jī':

Tyāa yatte u'pwa'jsa quim yujva neeyūumeetya,  
Atsa' tyajy yata' namu ji'pjmēe peecy neeyūuna jī'c.

Vite ajcĕva na'wĕ fil'jni':

Tyajy mjĭiwa'ja's vite tee mjĭi jĭna fil'jni'.

<sup>21</sup>Tyāa pa'ga cue'sh cshavyte pitstjĕj ũsta' cue'shtyi jype'jsa Jesus macue tyachne' cue'sh yacj ũsu' tyagachjĭi tyutemĕe pi'cyna u'ljusa. <sup>22</sup>Tyāawe'sha' Jesusa's Juan bautisāynijŭy uyya' tacjrra cielun u'pjcach uysaata' tyāaty teech tyjityjiga, Jesus ĭtyi yuuni's tuutje'jna cue'sh yacj fi'nzewa'jsa jĭc.

<sup>23</sup>Tyajŭ' e'nztyi pacuerra qui'p, José Barsabás yaasesa's tyā'sna ĭrrāa Justo jĭnaty cysuus'u', vite' Matiasna. <sup>24</sup>Sa' na'wĕty Dyus yacj puuty we'we:

—Indya' maa maa nasa ũs yaacyni'sva jĭing. Cue'shtyi meen mcjyiu'j naa e'nzsaty maarratynga tyjityj, <sup>25</sup>Judas pa'gatewe'sh, na'wĕ Judas tyajy mjĭia's nvijrra vituc tyajy pcalpa'ga tyāa mjĭia's jypa'gawa'jsa jĭnaty Dyus yacj puuty we'we.

<sup>26</sup>Tyajŭ' suerte caajty quiim yase casejteva jiyuya', atsa' Matias yasec casej. Tyajŭjy Matiasa' oncesawe'sh yacj utyaac pi'cyna u'juya'.

### Dyus Espiritu quĭini

**2** <sup>1</sup>Pentecostes fiesta en ājte', jyucaysa cyteerrarrāaty pcjaacjerra ũsu'. <sup>2</sup>Naapcachja' cieluju wejyaa wala na'wĕ susna quĭjrra tyāawe'sh ũsni yatte jyuca utac. <sup>3</sup>Naapcachja' ipy beeni na'wĕsaty jyucaysa cajcuesu vyaa. <sup>4</sup>Atsa' jyucaysa ja'ndarraj tyāawe'sh ũuste Dyus Espiritu yuurrarrāa jyuca cjĕete', tyā'sna jypa'garra maa nasa we'weni yuwe'sva we'weya' ājaty, Dyus Espiritu maa yuweju we'wewa'ja's jycaatje' tyāaju.

<sup>5</sup>Tyān ensu' Dyus jycaajni's nwĕese'jsa judiuwe'sh maa maa quiwejŭva pa'jrraty ũsu' Jerusalente. <sup>6</sup>Tyajŭ' tyāa seena' susni's wĕse'jrra', nasa jyucaysa pcjaacjety. Sa' tyā'wĕ teeche'sa na'wĕrraj tyāawe'sh we'weni yuweju we'weni's jiyurra', wala cuj yajcyna neeyŭuty <sup>7</sup>¿Ma'wĕrraqui'ty tyā'wĕ yŭu? sŭjna. Sa' tyāawe'sh pwe'sh na'jĭnaty puuty paapĕyi':

—Na'wĕ we'wena ũsta' tyāawe'sha' jyucay ¿Galileajŭwe'shmeetyná'?

<sup>8</sup>Sa' ¿ma'wĕrrata nasa iisa cue'sh yuweju we'weya' āja'? <sup>9</sup>Ayte ũstja'w Partiajŭwe'sh, Mediajŭwe'sh, Elamjŭwe'sh, Mesopotamiajŭwe'sh, Judeajŭwe'sh, Capadociajŭwe'sh, Pontojŭwe'sh, Asia quiwejŭwe'sh, <sup>10</sup>Frigia vite' Panfilia quiwejŭwe'sh, Egipto vite' Africa Cirene quiwetewe'sh, tyā'wĕy Romajŭwe'shva ayte ũstja'w. Maáí yu' upyjĭi judiuwe'shtja'w, atsa' vite' judiumeerrava judiuwe'sh na'wĕy Dyus jycaajni's nwĕese'jsa ũstja'w. <sup>11</sup>Tyā'wĕy Cretajuwe'sh vite' Arabiajuwe'shva ũstja'w. Nava jyucaysa Dyus yuwe zhichcuesastja'w wĕse'je', cue'sh we'weni yuweju pta'shpa'ga jĭ'ty. <sup>12</sup>Tyā'wĕ yŭuni's jyucaysa wala cuj jwend we'wena ũsu'ty na'jĭna:

—¿Quĭj yŭuya' tyā'wĕ yuutsqui? jĭ'ty. <sup>13</sup>Naapcachja' vite yu' atsewe'wena npeevyshjicana na'jĭ'ty:

—Naawe'sha' vino pus tundyrra tŭurra tyā'wĕ we'wen ũsta' jĭ'ty.

**Pedro nyafyrraj nasaty we'weni**

<sup>14</sup>Tyajū' Pedro! Jesus jycaajnisawe'sh oncesa yacj yujurra sus we'wena na'jic: —Judeatewe'sh vite! Jerusalentewe'sh i'cue'sha' ew jiyurra neeyūuya' ew mwēese'ljwe andy pta'shya'vatj tyā'sna: <sup>15</sup>Naa pitstjē'ljwe'sha' tūunityna jī'i'cue nava tyā'wē meeta'. Cusīi las nueverrá' atsa' ¿ma'wē tūuni yuucytja'w? <sup>16</sup>Na'wē yuuc tyā' Dyus yuwe pta'shsa Joel we'wec tyāac cytey yuu. Tyā' na'jic:

<sup>17</sup>Dyus we'werra!:

Nmej ensu', andy Espiritu's naa quiwete nasa jyucaysaty macueva ūsu'nja, Atsa' i'cue'sh nchi'c i'cue'sh niisa tyāawe'sha' andy yuwe's pta'shityna. Naapcachja' pitstacywe'sha' cieluju zhichcuesa vyaani's uyuutyna, Atsa' tjē'jsawe'sha' ewsa csha'utyna.

<sup>18</sup>Sa' andya's selpisaawe'shtyi pitstjē'lj ma'c yuu meerra' u'y ma'c yuu nava tyāawe'shtyi andy Espiritu's macueva ūsu'nja, andy yuwe's pta'shcajn.

<sup>19</sup>Tyajū' cielujū quim yujva uynimeesa zhichcuesa caavya'ja'ja'nja:

Sa' naa quiwete' ūucjūucjsa caavya'ja'ja'nja: ee, ipy wala, aaj wala tyā'wēsaty.

<sup>20</sup>Atsa' seca' cus na'wē chj'ndyina, a'teva ee na'wē bej yuuna.

Nava cue'shtyi nwe'wesa quīiwa'lj en zhichcuesa ājmeyna tyā'wē yuuna.

<sup>21</sup>Atsa' maava jyucaysa Dyusa's neewe'wena fi'nzesa' tyāa ente' nwe'weni yuutyna jī'c.

<sup>22</sup>Āchja' Israelwe'sh mwēese'ljwe na'jīya'vatj: Jesus Nasaretjūwe'sh Dyus caajnisā i'cue'sh cshavysu quījquījva ewsarrarrāanac caavya'jal' ātsā'saty nuycatyjina, uusaaty ityī vitna Dyus pu'chte, Jesucristo' tyā'wēc yūu. Tyā'wē yūuni's jīiyā'jne'cue. <sup>23</sup>Nava tyā'sa' cluuste fyutsrra icjcajn i'cue'sha' ducji'cue nasa ewmeesa cusetē. Tyā'wē uuwa'ja's Dyusne' tyjityjrra nvijit tyāniitey, tyāa pa'ga i'cue tyā'wē yūu. <sup>24</sup>Nava Dyusa' qui' ityi vitrra uunī seena' ūucjūucjsaju cutyi'cj, tyāa pa'gatey icjsa' bagachteva unniirráa jil'pjuya' yu' ājawa'lsameec yu' naa pa'ga. <sup>25</sup>Jesus uurra qui' ityi yuuwa'ja's Davida' na'jīnac pta'sh:

Andyna jype'jsa' bagachte yujva pu'vitumée andy yacj nescu yu'.

Tyā' andy pucate ūsa' patsu ju'ngte, quīj yujnava ūucjajmén andya's nwe'wena.

<sup>26</sup>Tyāa pa'gac andy ūuste tyacue wala wechwecha ūusutje', atsa' wechaawa'lj yuurrá'stju we'we'.

Tyāa pa'ga andy cacue' qui' ityi quiiteena sūjnarrāa scjēwu'nja,

<sup>27</sup>Tyāa pa'gatey indya' andy ūusa's uusaawe'sh ūsnite nvijitmeene'nga, Sa' indya's selpisāa cacue'sva suweepcach yu' cjicjmeene'nga.

<sup>28</sup>Ptsuwa'lmée ityi ūswa'tje pa'ljwa'ja's caapiya'jng,

Sa' iindy ūsnite wechana ūswa'ja's yuurrāa ūsune'nga jīna fi'jni'.

<sup>29</sup>Yacjtjē'ljwe'sh ew mjiyuwe: Na'wē cue'sh yatsgawe'sh David we'wec tyā' peecy uuwa'ja'siirráa tyā'jī'tsme'. Tyā'wēmeete iirráa David uute' pendaaty, atsa' tyajy cacue' tycaa ūsa' penda'ni āchpcach. <sup>30</sup>Nava Davida' Dyus yuwe pta'shsac yu'. Tyāasac jii yu' Dyusa' teech ūsya' puuty we'wec tyajy jī'tjewe'sh tyā' Cristoc

yu' David na'wëy jycaajwa'jsa tyã'snac jii yu'. <sup>31</sup> Cristo uurra ïtyi quiiteetste uyna ùssa na'wëc pta'sh Davida'. Tyãasac na'jî: tyajy ùusa' uusaawe'sh ùsnite neeyüumeena, atsa' tyajy cacue cja'tyva suweemeena. <sup>32</sup> David we'we'c Jesus tyã'snac Dyusa' uunijüwa qui' ïtyi vit, atsa' cue'sha' jyucaysa uysaatja'w, tyãasa ew jii'tja'w. <sup>33</sup> Sa' tyãa Jesusiic Dyus pucate patsu ju'ngte cãjpcach pe'jna u'jni yuu. Sa' cyte' Ney ùsya' neeyüuc tyajy Espiritu's tyã'sa' jypa'garrac tyãa Espiritu's cue'shtyi macueva ùs. Atsa' tyã'si'cue i'cue'sha' jyuca uyna wëse'j. <sup>34</sup> David tyã'wë cielute tejcame', tyajüic Davidiiva na'jî':

Dyusa' andyna jype'jsa's na'jîc:

Andy pucate patsu ju'ngte mcaach,

<sup>35</sup> Indyna atesaty indyrrarrá's nwëese'jwa'ja's vitna jyã'pjcach jîc.

<sup>36</sup> Israelwe'sh jyucaysa ew mjiyuwe: Naa Jesusa's i'cue'sha' cluuste caafyutsu'ji'cue tyã'snac Dyusa' Cristo jycaajwa'jsa vit.

<sup>37</sup> Tyã'jîna pta'shte wëse'jrra', ùuste wala ñus yajcytyi. Sa' Pedrowe'shtyi pëjytyi:

—Yacjtjê'jwe'sh, ächja' ¿ma'wë yüucytja'w? jîte', <sup>38</sup> Pedro pasrra':

—I'cue'sh pcaltyi nvijtrra, Dyus tashte mishawendwe, sa' Jesucristo's ùuste jypa'garra yu'teva ya'mbautisäywe, cyaj i'cue'sh pcaltyi peltunäyni yuuna.

Tyã'wë yüute', i'cue'shtyiva Dyusa' tyajy Espiritu's ùsuna. <sup>39</sup> Tyãa pa'gatey Dyusa' tyajy Espiritu's ùsya' neeyüuc tyã' i'cue'sh jii pety i'cue'sh luuch jii yã'jrra', sa' maanzcuëesa majüwe'shva ùstyna Dyus pa'yanisa tyãawe'shva jypa'gatyna jî'c.

<sup>40</sup> Tyã'wë we'wena wala yu'cypejc Pedro' na'jîna:

—Nasa ewmeesa cshavyte jypumbana fi'nzemée Dyus tashte mutyaawe ewte neeyüuya' jînac pta'sh. <sup>41</sup> Atsa' Pedro pta'shni's nwëese'jrra yu'te ya'bautisäytyi. Tyãa ente' tecj mil äjty Cristo's jypa'ga. <sup>42</sup> Sa' Pedrowe'sh caapiya'jni's piyarra', jyucaysa Dyusa's chjächja yajcynaty neeyüu. Sa' tyutemée cyteerrajty pcjaacjena fi'nze', Dyus yacj puuty we'wena, ü'wal'ja'sva cyteerraj ü'na.

### Puuty cyteerraj ewrráa fi'nzeni

<sup>43</sup> Tyajü' nasa jyucaysa wala cuj yajcyna ùsu'ty, naapcachja' Pedrowe'sha' ätsa'saty nuycatyjina quim yujva äjanimeesa'sva caavya'jal'naty ùsu'. <sup>44</sup> Jyucaysa Cristo's jypa'gas'a tyutemeety cyteerraj fi'nze', sa' quij jil'pjuni'sva ja'ndarrarráaty puuty peesu'sna fi'nze'. <sup>45</sup> Sa' tyãawe'sh jil'pjuni's tyweyrra vyu's cyteerraj pcjacjrraty peejiina fi'nzesaty peesu' tyãawe'sh peejini's pu'chna. <sup>46</sup> Een isaty dyuus yatte pcjaacje', sa' ü'wal'ja's yu' yat iisaty pi'qui' ùusju jyuca wechana, <sup>47</sup> sa' Dyusnava tyã'wëy wechana. Tyã'wë yüute', nasa' tyãawe'shtyi' wala ew we'we'ty. Atsa' Dyusa' een isac tyajy luuchtyi' nuypejnana u'jue' ewte neeyüuwal'jatsy.

### U'juya' äjásamée dyuus yat vityte catyjini

**3** <sup>1</sup> Teech ente' Pedro Juan yacjtyi dyuus yatte cüjuts yu', cusutste las treste Dyus yacj puuty we'wewa'l'j orate. <sup>2</sup> Cyte' teech pitstjê'l'j upyjii chinda puuple u'juya' äjasameec u'p yu'. Tyã'sa' een isaty yacjna cüjrra dyuus yat Vity Zhichcuesa jî'nisa pucate qui'pu' cytee nasa u'casaty lmushnu pe'wna

u'pcajn. <sup>3</sup>Tyāa puuple' Pedro Juan yacj dyuus yatte u'caya' cūjutste uyrra', Imushnu tjāascu. <sup>4</sup>Atsa' Pedrowe'sha' tyāa puuple dyi'pte ew tjengrra', Pedro' na'ljic:

—Mtjeng cue'shtyi jite!, <sup>5</sup>tyāa puuple' ¿quij peesya'vatyqui? sūjna ewcu tyāawe'sh dyi'pte tjeng. <sup>6</sup>Atsa' Pedro we'werra':

—Vyu yu' quij yujva jil'pmeetj. Nava andy jil'ptju tyā'srrāava peesu'nja: Jesucristo Nasaretjūwe'sh indya's āchjii nuycatyjina atsa' quiiterra ew mneeyūu jina'va, <sup>7</sup>Pedro' patsu cusetu uwena' pu'quiscu, atsa' naa dundtey findya' cu'lete', chinda' jyuca ewtyi neeyūu. <sup>8</sup>Tyājū' tyāa ātsa'sa' ūpjjrac quiite, sa' u'juya' ājarra tyāawe'sh yacjii dyuus yatte u'cac, ūpjuupjna Dyusna wechana tuutje'jna. <sup>9</sup>Tyājū' tyāa chinda puuple' tyā'wē ūpjuupjna Dyusna wechana yuute nasa jyucaysa uyrra', cuj yajcyna ūcjtji. <sup>10</sup>Tyāa nasa' chinda puuple's jiity yu' tyā'wē dyuus yat Vity Zhichcuesa jīnisa pucate cachrra Imushnu tjāasna u'psate.

### Dyus yuwe's Pedro pta'shni

<sup>11</sup>Chinda puuple u'juya' ājasameerrava catyjiyā'jrra', Pedrowe'shtyi uwerra tyjweetemēe u'ljute', nasa jyucaysa wala cuj yajcyna Pedrowe'shtyi tjengya' seena' wala cuj pcjaacjety dyuus yat pwa' Salomon jii jil'ty cytee. <sup>12</sup>Tyā'wē nasa pcjaacjete', Pedro' na'ljic:

—Israelwe'sh, ¿quij yuupa'gacue i'cue'sha' tyā'wē ūucj we'wena cuj yaaqui'? Naa pitstjē'ja's cue'sh tyā'wē Dyus na'wē nuycatyjirra ew u'juwa'ja's peesutstjas i'cue' yajcyna cue'shtyi tjengu'. <sup>13</sup>Mwēese'jwe: Cue'sh yatsgawe'sh Abraham, Isaac, Jacob tyāawe'sh Dyusa' tyajy Nchi'c Jesusa's cielute seena' jyutjtjesa vitcu na'wē i'cue'sh yu' ajtserra jycaajsa Pilato cusetu du'cji'cue. Atsa' Pilato yu' tyjweeteya' yajcyteva, i'cue'sh yu' caatyjweete'jmēe i'cue, <sup>14</sup>wejyva quijva yuuwemeesa', mityjwete jipcachte, i'cue'sh yu' teech pitstjē'j wala yuuwesa ewmeesarrā's i'cue tyjweete caaj. <sup>15</sup>Tyā'wē yūurra i'cue'sha' Jesus ityi caafi'nze'jwa'jsa yu'sa' quicje'jil'cue. Nava Dyusa' tyā'sa' qui' ityi vitni's cue'sha' uysaatja'w, tyāasa jii'tja'w. <sup>16</sup>Tyāasatja'w Jesusa' nuycatyjina sūjrra tyajy yase's cysusna pi'cy, naa pitstjē'j i'cue'sh jiyunisa's nuycatyjicajn. Tyāa Jesus nuycatyjipa'ga yuurrāa naa pitstjē'ja' jyuca ew catyjite', i'cue'sh jyucaysa uyna ūsil'cue.

<sup>17</sup>Yacjtjē'jwe'sh, tyā'wē yūui'cue nava jiimeerrane'cue tyā'wē yūu sūju'tj, tyā'wēy jycaajsawe'shva jiimeene'ta yu'. <sup>18</sup>Nava i'cue'sh tyā'wē yūuwa'ja's Dyusa' yatstey pta'shcu tyajy yuwee pta'shsawe'shtyi na'ljina: Cristo' wala pytjaa pa'ga yuuna jina atsa' tyā' cytey yuucajn i'cue tyā'wē icj. <sup>19</sup>Tyā'wē yūupa'ga Dyus tashte shawendrra i'cue'sh pcalpa'ga perdon mpējywe tyāa pcaltyi cūcjni yuuya'. Tyā'wē yūurra' wechana ūswal' ena's jil'pjune'cue, <sup>20</sup>Dyus caajni Cristo Jesus jycaajya' quijte. Tyā' i'cue'shtyi ew yūuwa'jsa' jinic yu' tyānii entey. <sup>21</sup>Āchjii yu' Jesucristo' cieluterrāa ūswal'jsa', Dyus naa quiwete quijnava jyuca pjeu'picach. Nyafy entey Dyus yuwe pta'shsawe'sh tyā'wēty Cristo' naa quiwete jycaajya' quiiwa'jsa' jina pta'sh naa pa'ga tyā' cytey yuuna. <sup>22</sup>Tyā'wēy Moisesva na'ljic: Dyusa' i'cue'sh jii teech caajya'va' i'cue'sh

ji'tjewe'sh tyajy yuwe's pta'shwa'jsa, andya's ma'wēga caaj tyā'wēy. Tyā's mwēese'jwe, ma'wē jycaatjeva jyuca cytey yuuna. <sup>23</sup>Tyā'wēme!, maava Dyus yuwe pta'shsa's nwēese'jsame!, Israelwe'sh tashuj tyundeni neeyūurra jyucaysa vituwa'tja' jīc.

<sup>24</sup>Ew mjiyuwe: Dyus yuwe pta'shsa Samuel fi'nzenijūywe'sh jyucaysaty āchj naa ensu Cristo quiiwa'ja'srrarráa we'wena pta'sh. <sup>25</sup>Atsa' i'cue'sha' Dyus yuwee pta'shsawe'sh ji'ji'cue, sa' tyā'wēy Dyusa' tyāniitey Abrahan yacjva puuty we'wec i'cue'shtyi ew yūuwa'ja's na'jīna: Naa quiwete nasa' jyucaysa bendiciona's jypa'gatyna iindy ji'j pa'gate jīna we'wec tyā'snava jypa'gasai'cue. <sup>26</sup>Tyajīc Dyusa' tyajy Nchi'ca's nyafyte' i'cue'sh tashte cjuē'yacu caaj i'cue'shtyi nwe'wecajn, cyaj i'cue'sha' teehsa na'wērraj ewmēe yūuni's nviitcajncu tyā'wē yūu jīc.

#### Pedro Juan yacj judiu npiitstjē'jwe'sh tashte cuutya'jni

**4** <sup>1</sup>Pedro Juan yacj nasaty we'wena ūsiyna, sacerdotewe'sh vite' dyuus yatte tjengsawe'sh npiitstjē'j vite' saduceo tyāawe'sh pa'jty tund-ya'.



(Hechos 4.2)



<sup>2</sup>Tyā'wē Jesusva ma'wēga ãtyi yuu tyā'wēy uusaawe'shva ãtyi yuuwa'ja' jīna Pedrowe'sha' nasaty caapiya'jna ũste jiyurraty wala ũsachana pa'jrra, <sup>3</sup>preesu'jrra carcelte cyuupj cuscuspcach, cusutsyā'cj yu' naa pa'ga. <sup>4</sup>Nava Pedrowe'sh pta'shni's wēse'jrra Cristo's jypa'gasa yu' seena' wala kuj yu'ty, pitstjē'jrráaty isani cinco miltyi yu'.

<sup>5</sup>Cuscus encjē' judiuwe'sh npiitstjē'jwe'sh vite' judiu ntjē'jsawe'sh vite' Dyus ley caapiya'jsa <sup>6</sup>vite' sacerdote npiitstjē'j Anas vite' Caifas, Juan, Alejandro vite' jyucaysa sacerdote npiitstjē'j nwe'shva pcjaacjety Jerusalente. <sup>7</sup>Sa' Pedrowe'shtyi pe'jya' caajrra tyāawe'sh cshavyte tyajrra paapējtyti:

—¿Quim pu'chtecue na'wē yūuya' āja'? meerrava ¿quimga jycaaj? jīte', <sup>8</sup>Pedro' tyajy ũste Dyus Espiritu's jyuca ji'p'jrra', na'wēc pas:

—Judiu npiitstjē'jwe'sh, Israel ntjē'jsawe'sh: <sup>9</sup>I'cue'sha' paapēyi'i'cue cue'sh ma'wē yūurra naa ātsa'sa's nuycatyjiteva jiyuya'. <sup>10</sup>Atsa' i'cue'sh dyi'pte teejwend āate pta'shitstja'w, cyaj Israelwe'sh jyuca jiyutyna. Naa pitstjē'j ayte i'cue'sh dyi'pte ũsa' tyā' Jesucristo Nasaretjūwe'sh nuycatyjini ũsa'. Tyāa Jesucristo's i'cue'sha' cluuste caafyutsu'ji'cue, nava Dyusa' uunijū qui' ãtyi vitcu. <sup>11</sup>Tyāa Jesusa's i'cue'sha' ajtsei'cue yat tyaa'sawe'shva ma'wēta: Naa cueta' selpime' jīrra wāatajteva tyāa'í wejy selpisáa yuu tyā'wēsac yu'. <sup>12</sup>Quim yujva tyāa na'wēy nasaty nwe'weya' ājawa'jsa yu' meea' naa quiwete, naasáa Dyus caajni Jesus yuurráa cue'shtyi nwe'wewa'jsa' jīc Pedro'.

<sup>13</sup>Pedrowe'sha' quim yacj yujva piyana ũssamée naasáa Jesus yacj yuurráa piyana ul'jusarrava wej yujva ũucjna shiingmée we'wete', judiuty jycaajsawe'sh wēse'jrra' cujty yajcy. <sup>14</sup>Tyāapcachja' catyjisa pitstjē'ja' tyāawe'sh yacj ijc ũsu', atsa' ewmée yūuna ũsi'cue jīya' ājameeta'. <sup>15</sup>Tyajū' Pedrowe'shtyi' eca casej caajty tyāawe'sh pwe'shrráa puuty we'weya'. <sup>16</sup>Sa' na'wēty puuty we'we:

—¿Quij yūucytja'w naa e'nz pitstjē'jwe'shtyi'? Tyāawe'sha' naa ātsa'sa's tyā'wē nuycatyjini's maa maava Jerusalentewe'sh jyuca jīita', atsa' cue'sha' tyā'wē nuycatyjimeeta' jīya' ājame'nja'w. <sup>17</sup>Nava mtee mteeva nasaty jwee tuutje'cjamen juuna' we'we'nja'w, cyaj peena yu' Jesus caapiya'jni's pta'shmeetya jīrra', <sup>18</sup>Pedrowe'shtyi' qui' pa'yarra, wala juuna' we'wety:

—Āchja' peena yu' bagachte yujva Jesus caapiya'jni's caapiya'jmeene'cue jīte', <sup>19</sup>Pedrowe'sha' na'wēty pas:

—I'cue'sh ũus miijajcywe. ¿I'cue'sh jycaajnirrá's nwēese'jrra', Dyus jycaajni yu'sa' nwēese'jmeete váa ewna? <sup>20</sup>Quijquijva cue'sh yafyju yuu uyna wēse'jna yuuni's wej yujva shuuna' yuuya' ājame'nja'w jīte', <sup>21</sup>judiuty jycaajsawe'sha' ma'wē yujva caapechucue'jya' ājameerra', juuna' we'werrarráa caatyjweete'jty. Tyā'wēme', nasa' jyucay Dyusráanaty tuutje'jna ũsu' tyā'wē ātsa'sa catyjipa'ga. <sup>22</sup>Tyāa catyjisa' cuarenta año jytaacuec ji'p'ju'.

### Dyus yuwe's ũucjmée pta'shwa'ja's pēyni

<sup>23</sup>Tyajū' Pedrowe'sha' tyjweetení yuurra', ul'ty tyāawe'shtyi pi'cyna ul'jusawe'sh tashna. Cyte pa'jrra', jyuca pta'shtyi judiuty jycaajsawe'sh ma'wē



we'wete tyã'wëy. <sup>24</sup>Atsa' tyã'jini's wëse'jrra', jyucaysa Dyus yacj na'jïnaty puuty we'we:

—Cielu, quiwe, ïcj wala, cyte quijquijrraj ùstyna tyãaty jyuca vit-sa Dyus, <sup>25</sup>na'wëng cwe'we'j indyna selpisáa Davida's:

¿Quij yuupa'gata vite nasa majúwe'shva tyacue úsachana suste', nasa' cyulrráava ma'wë yúuwa'ja'sva pacué'?

<sup>26</sup>Naa quiwete jycaajsa' weechi'ty,

Atsa' chjambte npiitstjê'j pcjaacjerra, Dyusa's ajtserra tyã'wëy Nchi'cnava atse'ty jï'c.

<sup>27</sup>Tyã'jini cytey yuuc. Tyãa pa'gaty Herodes vite' Poncio Pilato cytey Israelwe'sh pety vite nasa yã'jrra iindy Nchi'c Jesus quij pcal yujva ji'pjmeesa's caang tyã'sna ajtserra naa chjambte pcjaacje, <sup>28</sup>ma'wë yúuwa'ja'sva indy ma'wëne'nga vitrra nvijt tyãni entey tyã'sa' jyuca cytey yuuya'. <sup>29</sup>Nava indya' tyãawe'sh ewméé yúuya' yaacynijú nwe'werra cue'shtyi meen cchjäachja', cyaj iindy yuwe's quijte yujva úucjmée pta'shi'nja'w. <sup>30</sup>Sa' indy pu'chte', átsa'satyva nuycatyjirra quijquijva caavva'ja'ja'nja'w iindy Nchi'c Jesusa's pi'cyrra.

<sup>31</sup>Tyã'jina Dyus yacj puuty we'wena jyã'jatspcachja', tyãawe'sh pcjaacjenite' ejnd u'cj, naapcachja' Dyus Espiritu' tyãawe'sh úuste cjéete', Dyus yuwe's úucjméety pta'shi'.

### Tyãawe'sh ji'pjuni's cyteerraj ji'pjuni

<sup>32</sup>Cristo's úuste jypa'gasa' teehsa ma'wë yúuwa'ja's yajcyte', jyucaysa tyã'wërrarráa yúuwa'ja'srráaty yaaqui'. Maa yujva na' andy jï' jïmeety fi'nze'. Quijva ji'pjuni'sa' jyucaysa ja'ndarrarráaty jytyunde'. <sup>33</sup>Jesus jycaajnisawe'sha' jweefírráaty úucjmée pta'shi' Jesus uurrava qui' ityi yuuni's, atsa' Dyusa' jyucaysaty wala pu'chji'c. <sup>34</sup>Tyãawe'sh cshavyte quim yujva jypeejysameety yu'. Tyã'wë maava tyãawe'sh quiwe vite' yat tyã'wësaty tyweyrra vyu's jyúna pa'jrra, <sup>35</sup>Jesus jycaajnisawe'sh cusetety ducje', atsa' tyãawe'sha' maarraj jypeejyteva tyãawe'shtyi tyundeende'ty. <sup>36</sup>Tyã ensu' teech pitstjê'j levita José yaasesa úsu'c, Chipre quiwete upysa. Atsa' Jesus jycaajnisawe'sha' Bernabé yasety qui'p. Tyãa yase yu', Cviisha'jsa jïni'. <sup>37</sup>Tyãa pitstjê'ja' tyajy quiwe's tyweyrra vyu's jyúna pa'jrra Jesus jycaajnisawe'shtyi ducju.

### Ananiaswe'sh ptam íshiini

**5** <sup>1</sup>Tyã'wëy Ananiaswe'sh ptamva tyãawe'sh quiwe's tyweytyi. <sup>2</sup>Ananiasa' quiwee tyweyni vyu's pyãjnrráac jyúna u'jrra jyuca ducjetstju jïna Jesus jycaajnisawe'sh cusetete nvijt. Tyã'wë íshiiwa'ja's ptamíi puuty we'werraty tyã'wë yúu. <sup>3</sup>Atsa' Pedro' na'wëc we'we Ananiasa's: —Echtjê'ja's ¿quijya'nga iindy úuste ca'gal'na úsu', tyã'wë quiwee tyweyni vyu's pyãjnrráa ducjetsrra jyuca ducjetstju jïna Dyus Espiritu's íshiicajn? <sup>4</sup>Quiwe' iindy jïine' yu', atsa' tyweyte' vvyuuva iindy jïine' yu'.

Atsa' ¿quĩjya'nga teejwend isasarrá's pta'shmée ishiiya' yajcy? Cue'shtyirráa ishiiimée, Dyusnava ishiiing jíc. <sup>5</sup>Tyā'jīni's wēse'jna'va, Ananiasa' uuniic wete. Atsa' tyā'wē yūuni's nasa maava jyuca jiyusa' seena' wala ūucjwa'ja's ji'pjuty. <sup>6</sup>Tyajū' pitstacywe'sh cūjrra, tyāa uuní cacue's yaprra pendaaya' jyūna u'jty.

<sup>7</sup>Tyā'wē yūuni tecj ora scjēuutspcachja', Ananias nyu Safirava pa'cj, nmi' uuni's jiimée. <sup>8</sup>Atsa' Pedro' pējycu:

—Mpeeta'shwe, ¿i'cue'sh quiwe's cyanz pa'gaterráa dyij tyweycue'! jīna pējyte', tyāa u'y pasrra':

—Isa, tyā'wēterráa yuj tyweytja'w jīnac pas.

<sup>9</sup>Tyajū' Pedro' na'jīnac we'we:

—I'cue'sha' ¿quĩjya'cue Dyus Espiritu's ishiiwa'ja's ptamíi puuty we'we'? I'cue nmi'a' tyā'wē ishiiipa'ga uute', tyā'sna pendasáa āchjrráa cūjutsta', sa' i'cuenava jyūna u'juetyana pendaaya' <sup>10</sup>jītspcachja', tyāa u'yva Pedro tashga uuniic wete. Atsa' Ananiasna pendasáa pitstacywe'sh cūjrra, Safirava uuní ūste uyrra', jyūna u'jrra nmi' pucasuy pendaaty. <sup>11</sup>Atsa' Dyus yacj fi'nzesawe'sh tyā'wēy vite nasava tyā'wē seena' yūuni's jiyurra', wala ūucjwa'j ji'pjuty.

### Quim yujva ājanimeesaty wala caavya'ja'jni

<sup>12</sup>Jesus jycaajnisawe'sha' quim yujva ājānimeesa's quĩquĩjva caavya'ja'jnaty ūsu' chjambte nasaa cshavysu. Sa' Dyus yacj fi'nzesawe'sh tyāawe'sh pwe'sh yu' dyuus yat pwa'tety pcjaacj' Salomon jī jī'ty cytee. <sup>13</sup>Nava Dyus yacjmée fi'nzesa yu' quim yujva tyāawe'sh yacj pcjaacjena utya'tsmeeta', tyā'wē seena' yūute ūucjrra. Nava tyāawe'sha' ecaju yu' Dyus yacj fi'nzesaty wala ewrráa we'wena fi'nze'ty. <sup>14</sup>Tyā'wēteva pitstjē'j pety u'y yā'jrra Cristo's tyāawe'sh ūuste jypa'gasa jwee'irráaty seena' wala pejnana u'j. <sup>15</sup>Tyajū' ātsa'saty aandaste cutyi'jrra Pedro scjēuwa'jsuty cjicje', cyaj Pedro pshū'ju'nirrá'sva jypa'gasa' catyjityna sūjrraty tyā'wē yū'. <sup>16</sup>Jerusalen peecu'jsuwe'shva nasa seena' wala pa'jty, tyāawe'sh ātsa'saty pe'jrra vite' ech iyamunisatyva pe'jrra, sa' jyucay nuycatyjinity neeyū'.

### Pedro Juanwe'shtyi ajtserra icj wēeni

<sup>17</sup>Tyajū' sacerdote npiitstjē'ja' cytee ūssa saduceowe'sh yacj seena' wala ajtserra <sup>18</sup>Jesus jycaajnisawe'shtyi' tundrra carcelte tyajty. <sup>19</sup>Nava Dyus angel cus cūjrra carcel vitya's pjaanderra na'jīrrac eca cutyi'j:

<sup>20</sup>—Dyus yatna qui' u'jrra nasaty' pta'shine'cue Dyus yacj fi'nzewa'ja's jīte', <sup>21</sup>wala cusfitey Dyus yatna u'jrra pta'shya' tacjtyi. Naapcachja' sacerdote npiitstjē'j vite' cytee ūssa judiu ntjē'jsawe'sh jyucaysa pcjaacjerra Jesus jycaajnisawe'shtyi' carceluj cutyi'jya' caajty. <sup>22</sup>Atsa' policiawe'sha' carcelte uymeerra', pta'shya' qui' shawendtyi:

<sup>23</sup>—Carcel vitya' wala ew apjni ūsa', atsa' cytee tjengsava vityte lajcy méety ūs yu'. Atsa' cue'sh cūjrra vitya's pjaandete', Pedrowe'sha' meety yu' jīty.

<sup>24</sup>Tyã'jîna pta'shte', sacerdote npiitstjê'jwe'sh vite' cytee dyuus yatte tjengsawe'sh npiitstjê'j jyucaysa na'wêty yaaqui': Naa yuwe' ¿ma'wê yûuwa'jsacy? sÿjutspcachja', <sup>25</sup>teech pitstjê'j pta'shna cÿjc:

—Carcelte ctÿyaja'ji'cue tyãawe'sha' dyuus yatte yã'j qui' caapiya'jna ïsta' nasaty jÿc.

<sup>26</sup>Tyajÿ' dyuus yatte tjengsawe'sh npiitstjê'ja' policia yacj u'jrra jyûna cÿjty quïjva pcyumée, Pedrowe'sh ju'ngusa nasa' ïusacharra cuet wãatatajwe'shte. <sup>27</sup>Sa' judiu ntjê'jsawe'sh tashte jyûna cÿjte', sacerdote npiitstjê'ja' na'wêc pêjy:

<sup>28</sup>—Cue'sha' i'cue'shtÿi' bagachte yujva peena yu' pta'sh caajmeetja'w Jesus caapiya'jni's. Atsa' i'cue'sha' ¿quïjcue yuu? Naa Jerusalente mtee mteeva jyuca i'cue'sh caapiya'jni's yuutarra cue'shtÿi' yuuwesa vit ya'vai'cue Jesus uuni's.

<sup>29</sup>Tyã'jîte', Pedrowe'sh pasrra':

—Cue'sha' nasaa jycaajni yuutyi' nwêese'jwa'j jÿ'pjmeetja'w, naasáa Dyusrráana nwêese'jwa'jsatja'w. <sup>30</sup>Cue'sh yatsgawe'sh tyãawe'sh Dyusa' Jesusa's qui' ïtyi vitcu cluuscjê a'cyrra i'cue'sh icjni's. <sup>31</sup>Dyusa' tyã'wê yûurra cielute tyajy pucate patsu ju'ngte qui'prra Jycaajwa'jsac vit, cyaj Israelwe'sha' tyãawe'sh pcaltyi nvjÿrra Dyus tashte shawendte, Jesusa' nwe'wena. <sup>32</sup>Tyã'wê yûuni's cue'sha' jÿitja'w, atsa' Dyusa' tyajy Espiritu's ïscu tyã'sna nwêese'jsaty tyãa Espirituva jÿia' jÿite', <sup>33</sup>judiu ntjê'jsawe'sh jweefirráa ïusacharra Pedrowe'shtÿi icjya'vaty yu'. <sup>34</sup>Nava cytee tyãawe'sh cshavyte teech fariseo Gamaliel yaasesa u'pu'c, Dyus leya's caapiya'jsa wala jyutÿjtesa. Tyã' Jesus jycaajnisawe'shtÿi eca dundte cutÿi'cjaajrra, <sup>35</sup>judiu ntjê'jsawe'shtÿi na'wêc we'we yujurra:

—Israelwe'sh, naa pitstjê'jwe'shtÿi na'wê yûuya'vai'cue tyã'sa' mpa'yajcywe. <sup>36</sup>I'cue'sha' miyajcywe: teech ente' vyaac teech pitstjê'j Teudas yaasesa wala chjãchjasatj jÿina, atsa' tyajy ju'ngu u'jsa cuatrocientos nasaty yu'. Nava tyãa npiitstjê'ja's icjnic yuu, atsa' tyajy nasa' jyuca pÿshite', tyãa yuwe' ptsuuc. <sup>37</sup>Tyã'wê yûuni e'su, nasaty etste ãsh ente', teech pitstjê'j tyã'wêy vyaac, Judas Galileajÿwe'sh, atsa' tyajy ju'ngusa nasa wala kuj utyaaty. Nava tyãa Judasa's icjte', tyajy ju'ngusava jyuca pÿshity. <sup>38</sup>Tyãa pa'ga naa pitstjê'jwe'shtÿi' cuch yuunuwe. Naa yuwe' pitstjê'jwe'shrráa we'wenirra yu', quïjva yûumeeteva ptsuuna. <sup>39</sup>Nava Dyus jÿi váana atsa' tyã'sa' i'cue'sha' ïviituya' ãjãmeene'cue. Dyus yacj puiisáa yuuya'mée mpa'yajcywe jÿite', <sup>40</sup>Isa yuj we'wec sÿjnaty neeyûu jyucaysa. Tyajÿ' Jesus jycaajnisawe'shtÿi pa'yarra': Áchja' peena yu' Jesus caapiya'jni's pta'shmeene'cue jÿina we'werra, wala pechujcuerrarráa tyjwetety. <sup>41</sup>Atsa' Jesus jycaajnisawe'sha' judiu ntjê'jsawe'sh tashuj wala wechana casejty tyã'wê Jesus caapiya'jni's pta'shpa'ga pytjaa yuuwa'ja's jÿi'pÿjutja'w sÿjna. <sup>42</sup>Maa ente yujva shuuna' fi'nzemée een isa Dyus yuwe's caapiya'jna tyã'wêy Jesucristo ïtyi yuuni'sva pta'shna pecÿjna nestÿi yu' yat-su vite' dyuus yatte.

### Dyuus yatte tjengwa'jsa siete nasa tyjityjni

**6** <sup>1</sup>Tyāa enstu! Cristo's jypa'gasawe'sh wala pejnate!, cytee griego yuweju we'wesawe'sha! judiu yuweju we'wesawe'shtyi ūuscha we'wewa'l uytyi cue'sh jil'j viuda yuutyi! ew sāl'jīmée ūsta! een isa peesni ū'a's jīte!, <sup>2</sup>Jesus jycaajnisawe'sh docesa jiyurra!, Cristo's jypa'gasawe'shtyi jyuca pcjacjrra na'ljity: —Dyus yuwe's pta'shmée, sāl'jīwa'jrrá's jytjaacue pa'pchuya' yu' ājāme'nja'w cue'sha!. <sup>3</sup>Tyā'wē yūuya'mée i'cue'sh yacj ūssa yacjtjē'jwe'sh siete pitstjē'j mtyjiityjwe, Dyus dyi'pte ew fi'nzesa, Dyus Espiritu's ūuste jypa'gasa, ma'wē yūuwa'ja'sva ew jiisaty. Tyā'wē yuurra tyāawe'shtyi ducje'nja'w sāl'jīna ūswa'l mjīa's. <sup>4</sup>Atsa! cue'sha! Dyus yuwe's caapiya'jwa'jrrá's tjengu'nja'w, Dyus yacj pu'vitumée puuty we'wena jīte!, jyucaysa tyā'wē yūuwa'ja's yajcytyi. <sup>5</sup>Sa! Dyus yacj jypumbamée fi'nzesa Estebana'styi tyjityj Dyus Espiritu's ūuste jī'pjsa. Vite! Felipe, Prócoro, Nicanor, Timón, Parmenas, Nicolas Antioquía chjambuwe'sh tyāawe'shtyi tyjityjnisa neeyūu. Tyāa Nicolasa! judiumeerrava judiuwe'sh na'wēy yuuna fi'nzeya! utyasaac yu!. <sup>6</sup>Tyāa pitstjē'jty tyjityjrra!, pe'jna u'ljty Jesus jycaajnisawe'sh tashte, atsa! tyāawe'sha! dyictjesu peequinzerra Dyus yacj puuty we'wety tyāawe'sh pa'gate.

<sup>7</sup>Tyajū! Dyus yuwe' walaana u'cj, atsa! Cristo's jypa'gasava Jerusalente seena! wala pejnac, tyāa pa'ga cytee judiuwe'sh sacerdote yujva Jesus caapiya'jni's jypa'gaty wala cujsa.

### Estebana's preesu'jni

<sup>8</sup>Atsa! Estebana! Dyus pu'chte!, quim yujva ājanimeesa'sva caavya'ja'jnc fi'nze! tyāa chjambte. <sup>9</sup>Tyā'wē yūute!, judiu vite quiwejuwe'sh Cirene, Alejandría, Cilicia, Asia tyāa quiwesuwe'sha! Esteban yacj ūuscha we'wena casejty. Tyāawe'sha! carceluj tyjweetenisa tyāawe'sh pwe'shrráa fiity pcjaacjeni yat jī'pju!. <sup>10</sup>Nava tyāawe'sha! pasya! āja'tsmeeta! Estebana! Dyus Espiritu caaūusutje'jni's we'wete!. <sup>11</sup>Tyajū! vitety vyu ducjtyi tyā'wē Moisesa's atsewe'wena Dyusnava atse'c jīna īshiina pāatyjī'cjcajn. <sup>12</sup>Tyā'wē yūurraty caaūuscha'l nasa ecajuwe'sh vite! judiu ntjē'jsawe'sh vite! Dyus leya's caapiya'jsawe'shtyi. Sa! Estebana's tundrra jyūna u'ljty judiu ntjē'jsawe'sh tashte. <sup>13</sup>Sa! pacuety na'wē īshiina pta'shwa'jsa: Naa pitstjē'ja! een isa dyuus yata's atsewe'wena tyā'wēy Dyus leya'sva atsewe'wena nescu yu!. <sup>14</sup>Jesus Nasaretjūwe'sha! naa dyuus yata's iviiturma, Moises caapiya'jni'sva iviituwa'jsa! jīna caapiya'jni's cue'sha! wēse'tja'w. <sup>15</sup>Tyā'jīna īshiite!, judiu ntjē'jsawe'sh vite! cytee pcjaacjerra ūssa! Esteban dyi'pte tjengrra! Dyus angel na'wētety uy.

### Esteban pasni

**7** <sup>1</sup>Tyajū! sacerdote npiitstjē'ja! Estebana's pējyuc: —¿Na'wē pta'shi'ty tyā! jyuca isa yujna'? jīte!, <sup>2</sup>Estebana! pta'shya! tacjcu:

—Yacjtjē'jwe'sh, na's mwēese'jwe: Cue'sh Dyus cielutewe'sha' yatsgatjē'j Abrahana's vyaac Harán quiwete u'pya' u'jme y nee Mesopotamia quiwete ūsiyna. <sup>3</sup>Sa' na'wēc jycaaj: lindy quiwe pety iindy nwe'sh jyuca nvijtrra me'j quiwe ūsya'vatj cytee. <sup>4</sup>Tyā'jīte', Abrahana' Caldea quiweju casejrra Harán quiwetec u'pya' u'j. Tyajū' Abrahan neya' Harán quiwete uute', Dyusa' Abrahana's pe'jna yuwe'c naa quiwete āchj ūsi'cue cytee. <sup>5</sup>Nava Dyusa' Abrahana's naa quiwete nuypa'jrra', quiwe le'chcuērráa yujva tyagachjī yu' ūsme'. Nava indya's e'surráava naa quiwe's ūsu'nja, atsa' iindy uute', iindy luuch jī neeyūuna jīc. Tyān ensu' Abrahana' luuch jī'pjmeeteva tyā'wēc iindy luuch jī jīna puuty we'we. <sup>6</sup>Abrahan jī'j ma'wē fi'nzewa'ja'sva Dyusa' pta'shcu: lindy jī'jwe'sha' vite quiwesu pcyuuna jype'jni cuatrocientos año fi'nzetya. <sup>7</sup>Tyā'wēteva tyāa pcyuusawe'shtyi' castiga'īnja, cyaj iindy jī'ja' tyajū casejrra naa quiwete andya's selpiiya' yuwetya jīc. <sup>8</sup>Dyusa' Abrahan yacj puuty we'werra', tyāa puuty we'weni's pechcanaya'mée jīrra circuncidāy caacj tyajy luuchtyi'. Tyāa pa'gac Abrahana' tyajy nchi'c Isaac upyjni ocho en ājatspcachja', circuncidāy. Tyā'wēy Isaacva tyajy nchi'c Jacoba's circuncidāy. Atsa' Jacobva tyajy nchi'cwe'sh docesaty tyā'wēyrrarráac yuu. Tyāa Jacob nchi'cwe'sh tyā'wē Israelwe'sh jī'j docesa neywe'shta'.

<sup>9</sup>Tyāa Jacob nchi'cwe'sha' nyacj Jose's ajtserra tyweytyi, Egipto quiwen jyūna u'cjan. Nava Dyusa' José yacj tyuteméc ūsu' ūuste fi'nzetsteva nwe'wena. <sup>10</sup>Tyāasac Egiptote jycaajsa Faraon dyi'pte ew fi'nzewa'ja's ūs. Tyā'wē yūute', Faraona' Jose's Egiptote ne'jue'sh qui'prra jycaajsa yata's tjengwaj'sac nvijt.

<sup>11</sup>Tyān ensu' Egipto quiwete jyuca Canaan quiwete yā'jrra wala wēje pa'c cyūusu'jwa'jsa, atsa' cue'sh yatsgatjē'ja' ū'wal'j uymeeta'. <sup>12</sup>Nava Jacoba' Egipto quiwete scuutyj tyweywal'j ūsa' jīni's jiyurra', tyajy nchi'c cue'sh yatsgawe'shtyi caacj. Tyāa entety nyafyrraj Egipto quiwen u'j. <sup>13</sup>E'su qui' u'tje', Jose' pta'shcu: Andya' i'cue'sh nyacjtju jīna. Atsa' Egipto quiwete jycaajsa' jiyuc Jose' quiim jī'tjeva. <sup>14</sup>Tyajū' Jose' tyajy ney Jacob pety nwe'sh jyucaasaty yuucacj. Tyāawe'sha' setenta y cinco ājty yu'. <sup>15</sup>Tyā'wē yūupa'gac Jacoba' Egipto quiwen u'pya' u'jrra cytee uu, atsa' cue'sh jī'j nyafytewe'shva tyāa quiwetee uuty. <sup>16</sup>Nava e'su tyachte', José dyi'tjtyi jyūna yujrra Siquem quiwetety pendáa, Abrahana' Hamor nchi'cwe'shtyi quiwe weycu uusaaty pendawal'j jīrra cytee.

<sup>17</sup>Dyusa' Abrahana's quiwe ūswal'j en ājatste', Israelwe'sh Egiptote ūssa wala pejnaty. <sup>18</sup>Naapcachja' Egipto quiwete jycaajwa'jsa' Jose's jiimeesac u'ca. <sup>19</sup>Tyāa jycaajsa' cue'sh yatsgawe'shtyi ajtsena pcyuuya' tacjcu, luuch u'se upysaty ctjengu'jmée uucajn. <sup>20</sup>Naapcachja' tyāa ensu' Moisesva upycu Dyus peeygāani wala zhichcuesa. Atsa' neywe'sha' yatte tecj a'te jype'jty. <sup>21</sup>Nava jwee yu' jype'jya' ājameerra', yu'wala pucaga sūtjte', jycaajsa niisa uyrra', tyāac nuywala tyajy luuch na'wē vitrra. <sup>22</sup>Tyāa

pa'gac Moisesa' quíjteva jyuca caapiya'jni yuu Egipto quiwetewe'sh na'wēy, sa' quíjteva jytujtjesac yu'.

<sup>23</sup> Moisesa' cuarenta añu ji'pjurra', tyajy nwe'sh Israelwe'sh ũsnite tjengya' u'jya' yajycyu. <sup>24</sup> Cytee ũsrra uycu teech Egiptotewe'sh tyā'wē Israelwe'sh teehsa's pcyuuna ũste, atsa' Moisesa' ājmeecuesa ju'ngu yuurra Egiptotewe'sha's icjcu. <sup>25</sup> Israelwe'sha' Dyusne' caaj cue'shtyi nwe'weya' sūjcajncu tyā'wē yūu Moisesa', nava tyāawe'sha' tyāa sūjmeeta'. <sup>26</sup> Cuscuscjē' Moisesa' uycu e'nz Israelitawe'sh puina ũste, sa' na'jīnac nwe'we wēe: I'cue'sha' pyacjsai'cue, sa' ¿quijya'cue pui'? jīte', <sup>27</sup> vite's uyisá' Moisesa's chatyrra na'jīc: ¿Quimga indya's npiitstjē'jsa cue'shtyi nwe'wewa'jsa na'wē vitrra nvijt? <sup>28</sup> Jū'na ma'wēnga Egiptotewe'sha's icj ¿tyā'wēy andynava icje'nja sūjvá'nga? jīte', <sup>29</sup> Moisesa' tyāa quiweju ũpjna u'jrra Madian quiwencu u'j. Cyteec tyajy quiwemeete pa'jrra u'pu', sa' e'nz luuchcu ji'pju.

<sup>30</sup> Tyāa quiwete Sinai vits utyasu nasa u'pnimeete cuarenta añu fi'nzetste', tsjūtsj tashte ipy bejnac vyaa. Tyāa pyājte Dyus angela'scu uy. <sup>31</sup> Tyā'wē uyrra', Moisesa' cuj yajcyna utyaac ew tjengya'. Naapcacha'j Dyus we'weni na'wēc ptjūuse: <sup>32</sup> Andya' iindy yatsgawe'sh Abrahan, Isaac, Jacob tyāawe'sh Dyustju jīte', Moisesa' ũucjna yayarra tjengme'. <sup>33</sup> Atsa' Dyusa' Moisesa's we'werra': Iindy pelgatyi's mpajnde, ayte' quíj pcal yujva ji'pjmeesa ũstju naa pa'ga. <sup>34</sup> Sa' Egiptote andy nasa pytjaa yuuni's uytju, sa' pytjaa we'weni'sva wēse'tj. Tyāasatj yuwē' nwe'weya'. Atsa' andy jycaajni's nwēese'jrra Egipto quiwen u'juene'nga jīc. <sup>35</sup> Israelwe'sha' nyaff' Moisesa's na'jīnaty ajtse: ¿Quimga indya's npiitstjē'jsa cue'shtyi nwe'wewa'jsa na'wē vitrra nvijt? Tyā'jīna ajtseteva, Dyusa' tsjūtsj tashte ipy cshavyuj vyaarra', Moisesa's caacj npiitstjē'jsa na'wē nwe'weya'. <sup>36</sup> Moisescu tyā'wē cue'sh yatsgawe'shtyi Egipto quiwejuj cutyi'lj tyāa quiwete quíjquijva seena'sa caavya'jal'jrra. Tyā'wēy Ícj Wala Bejsajuva cutyi'cj sa' nasa u'pnimeesu cuarenta añuc tyā'wē quim yujva ājānimeesa's caavya'jal'jna ũsu'. <sup>37</sup> Tyāa Moisesírraac Israelwe'shtyi na'wē pta'sh: I'cue'sh jil'j teehsa's cutyi'jrra Dyusa' caajya'va' tyajy yuwē's pta'shcajn, na'wēc andynava caaj tyā'wēy. Atsa' tyā'sa' nwēese'jwal'j ji'pji'cue jīc Moisesa'. <sup>38</sup> Moisescu tyā'wē nasa u'pnimée quiwete ũsu' cue'sh yatsga Israelwe'sh yacj. Sa' Dyus angel yacjva Sinaí vits walate puuty we'werra cue'sh yatsgawe'shtyi pta'shcu. Sa' Dyus jycaajna cuet taplate fi'jnityva jypa'gac cue'shtyi ũsya'.

<sup>39</sup> Tyā'wē yūuteva, cue'sh yatsga Israelwe'sha' Moisesa's nwēese'jmée ajtserra, Egipto quiwení shawendya'vaty yu'. <sup>40</sup> Tyajū' Aaronas na'wēty we'we: Cue'shtyi pe'jna u'jwa'jsa dyus na'wēsa mpjeu'j. Tyā'wēme' Moises Egipto quiweju cue'shtyi cutyi'jsa quíjne' yuu nava vyaame'. <sup>41</sup> Tyā'jīrra' tyāawe'sh cuseju claa luuch na'wē pjeu'jrra tyā'snaty wala wechana tajcy icjrra camb. <sup>42</sup> Tyā'wē yūute', Dyusa' tyāawe'sh tashuj tyuteec, ēe walasu

estrella ũsta' tyãarráaty neewe'wecajn. Tyã'wě yūuwa'ja's Dyus yuwe pta'shsawe'sh librute na'wě fi'jni':

Israelwe'sha' nasa u'pnmée quiwete cuarenta año ũsrra',  
¿andyna wechaya'cue tajcy icjrra cambna ũsu'á'?

43 Wej yujva tyã'wě yūumée andyna wechapcachte,  
Naasáa dyus ityimeesa Molocrráanai'cue tyaja',  
Tyã'wěy estrella Renfán yaasesa's i'cue neewe'we' i'cue'sh cuseju  
pjeu'jnisaty.

Tyãa pa'ga i'cue'shtyi naa quiwejū cutyi'jrra Babilonia quiwen  
caajya'vatj jīna fi'jni'.

44 Cue'sh yatsgawe'sha' nasa u'pnmée quiwete ũsrra', Dyusna wechana ũsni yat ji'pju'ty, Dyusa' ma'wēne' Moisesa's vitcaaj tyã'wěy vitrraty ji'pju'. 45 Atsa' tyã'snaty cue'sh yatsgawe'sh Josué yacj yuusa' jypa'garra jyūna yuwé'. Sa' judiu ji'jmée vite nasa ũsni quiwete ca'ga'jrra, David entepcachtyi ji'pju'. Tyãa quiwe's Dyus pu'chte vite nasaty cutyi'jrra tyãawe'shtyi iiyamu. 46 Dyus peeygāanisa Davida' teech dyuus yat tyaajwa'j pjeu'cj cytee Jacob ji'jwe'sh Dyus ũswa'j. 47 Nava tyãa dyuus yata's Salomoncu tyaj. 48 Tyã'wēteva, Dyus cielutewe'sha' pitstjē'jwe'sh tyaajni yatte yu' ũswa'jsa yu'tsme'. Tyã'wērraific Dyusa' tyajy yuwee pta'shsa's na'wě cwe'we'j:

49 Cielurráa andy jycaajna ũswa'ja',  
Atsa' quiwe' andy chinda tyajwa'jrráa vitnisa'.  
Tyã'wēte', ¿ma'wě andy ũswa'j yat tyajaqui'cue naa quiwete?  
¿Teech ajte andy jycaasewa'j andy vitnimeesa ũsmañ?

50 Nacue seena' quijquijva ũsta' nava tyã' jyuca andy vitnisarrarráata'  
jī'c Dyusa'.

51 Tyã'wēteva, Dyus yuwe's i'cue'sh ũuste jypa'gaya' wa'llra tju'wě's apjrra i'cue fi'nze' Dyusa's jiimée na'wě. Bagachteva Dyus Espiritu's ajtsenarráa ũsi'cue i'cue'sh yatsgawe'sh na'wěy. 52 I'cue'sh yatsgawe'sh ¿maarra' Dyus yuwe pta'shsawe'shtyi pcyuusamée ũstymañ? Teech yuja' quij pcal yujva ji'pjmeesa jīna pta'shsawe'shtyi icjtyi. Áchja' i'cue'sha' tyãa pcal ji'pjmeesa's ajtserra icji'cue. 53 Dyus angel i'cue'shtyi Dyus leya's ũsteva, nwēese'je'tsmée i'cue jīte', 54 tyãawe'sha' wēse'jrra', qui'tjtyi csuusul'naty ũusacha Estebana's.

#### Estebana's icjni

55 Tyã'wēteva, Estebana' Dyus Espiritu's ũuste jyucac ji'pj yu', sa' cielute pagayrra Dyus u'pni seena' zhichuesa's uycu, tyã'wěy Jesusva Dyus pucate yujrra ũstec uy. 56 Sa' tyã'wěsa's uyrra' na'ljīc:

—Mtjengwe, andya' uyna ũstju cielutewe'sh Dyus Nchi'c Nasa Yuusá' Ney pucate ũsa' jītspcachja', 57 tyãawe'sha' tju'wěty yaapjrra, sus weyrra jyucaysa Estebana's āapjtyi icjya'. 58 Sa' chjambuj cutyi'jrra Estebana's





(Hechos 7.58)

atesawe'sha' cuet wāatatajty, tyāawe'sh atyjty teech pitstacy Saulo yaasesa's ctjengu'jrra. <sup>59</sup>Cuet wāatatajatspcachja', Estebana' na'jīnac Dyus yacj puuty we'we:

—Jesus, andy ūsa's miipa'ga jīna'va, <sup>60</sup>peejyūcuerra suscu we'we na'jīna:

—Meen peltunaī na'wē yūutsta' tyāawe'shtyi'.

Tyā'wē we'wena'va uuc Estebana'.

#### Dyus yacj fi'nzesawe'shtyi Saulo ajtserra pacuení

**8** <sup>1</sup>Estebana's icjetste', Saulo' wechanac ūsu'.

Isa tyān entety iiméj seena' ajtseya' tacj Dyus yacj fi'nzesa Jerusalentewe'shtyi. Tyā'wē yūute', jyucaysa pūshity Judea quiwesu vite' Samariasu, naasáa Jesus jycaajnisawe'shrráaty neeyūu Jerusالente. <sup>2</sup>Estebana's icjte', pendaaya' jyūna u'jty Dyus yacj fi'nzesa yacjtjē'jwe'sh wala ū'nena. <sup>3</sup>Naapcachja' Saulo' Dyus yacj fi'nzesawe'shtyi ajtserra yat iisac pacuena u'j tyajū juuna' yuuna cutyi'jrra carcelte ctyaaja'jya' pitstjē'j pety u'y yā'jrra. <sup>4</sup>Nava Jerusalem chjambu ūpjna u'jsa yu', Dyus yuwe's mteeva iipta'shtyi u'jue'.

#### Dyus yuwe's Samariate pta'shni

<sup>5</sup>Tyajū' Felipe' Samaria quiwete teech chjambte pa'jrra Cristo' quimteva pta'shcu. <sup>6</sup>Atsa' cytee nasa pcjaacjesa' Felipe we'weni's wala jypa'yajcy wēse'jty, sa' quim yujva ājānimeesa's caavya'ja'jni'sva uytyi. <sup>7</sup>Tyā'wē maanzcuēe nasava catyjinity neeyū' tyā'wē tyāawe'sh ūuste ech ewmeesa

sus weyna casejte. Sa' tyā'wēy ēseyā' ājasamée vite' chinda puuple u'juya' ājasameeva catyjity. <sup>8</sup>Tyā'wē yūute!, tyāa chjambte nasa jyucaysa wala wechana ūsu'ty.

<sup>9</sup>Tyāa chjambte' teech dyijyuusāa Simon yaasesa' Samariate nasaty wala caypumba'jna ūsu'c, andya' quijteva jyuca jiisatj jīna. <sup>10</sup>Atsa' tyā'snarrarrāaty nwēese'jna wechana ūsu' luuch ma'c yuu tjē'jsa ma'c yuu nava jyuca na'jīna:

—Naa pitstjē'ja's Dyusne' pu'chji' jī'ty. <sup>11</sup>Sa' tyajy jycaajni's jyucaty nwēese'je!, tyā'wē tyajy dyijyuuni yacj wala tyachyā'j caypumba'jna ūsu'ne' naa pa'ga. <sup>12</sup>Nava Felipe' Dyus jycaajwa'ja's pta'shna pa'jrra, Jesucristo' Dyus caajnisa' jīte' jiyurra', pitstjē'j pety u'y yā'jrra yu'te ya'bautisāytyi. <sup>13</sup>Atsa' tyā'wē tyāa dyijyuusaava Felipe pta'shni's jiyurra', yu'te ya'bautisāyrra Felipe yacj u'ju'c. Sa' tyā'wē quijquijva caavya'ja'tje' tyā'sna uyrra' cujc yajcyna u'ju'.

<sup>14</sup>Tyajū' Jesus jycaajnisa Jerusalente ūssa' tyā'wē Samariatewe'shva Dyus yuwe's tyāawe'sh ūuste jypa'garra ya'bautisāytyi jīni's jiyurra', caajty Pedro's Juan yacj. <sup>15</sup>Atsa' cytee tyāawe'sh pa'jrra', Dyus yacj puuty we'wety Dyus yuwe's jypa'gasa Samariatewe'sh pa'gate, Dyus Espiritu's jypa'gacajn. <sup>16</sup>Tyā'wēme!, nyaffi yu' Dyus Espiritu's jī'pjmeety yu', naasāa Jesusa'srrāaty jypa'garra yu'te ya'bautisāysa yu'. <sup>17</sup>Tyajū' Pedrowe'sha' tyāawe'sh dyictjesu peequinzerra Dyus yacj puuty we'wete!, Dyus Espiritu's jypa'gaty.

<sup>18</sup>Atsa' tyā'wē yūuterrāa Dyus Espiritu quijjatste uyrra', tyāa dyijyuusāa Simona' vyy ūs wēec <sup>19</sup>na'jīna:

—I'cue'sh tyā'wē ājani's andynava majwe, cyaj andyva dyictjesu peequineterrāa maava Dyus Espiritu's jypa'gatyna jīte!, <sup>20</sup>Pedro pasrra':

—Iindy vyy' indy yacj ja'nda vituna, Dyus peesni's vyy yacjngu wey wēje' naa pa'ga. <sup>21</sup>Indya' cue'sh na'wēy yuuwa'j yu'sa' le'chcuc yujva jypa'gawa'j jī'pjmeeng, Dyus dyi'pte ewmeeng yaaqui' naa pa'ga. <sup>22</sup>Tyā'wē ewmēe yūuwa'jrrā's yaacyni's nvijrra, Dyusa's mneewe'we. Tyā'wē yūute!, peltunaivāana. <sup>23</sup>Tyā'wēme' iindy ūuste iivejch iivejch yaacywa'jrrāana uta jī'pjngu, atsa' tyā'wē yaacynisa' jyuca indya's tundrra jī'pja' jīte!, <sup>24</sup>Simon pasrra':

—I'cue'sha' andy pa'gate Dyus yacj meen puuty we'wewe. Tyā'wēme!, Dyusa' peltunāywe'shmeeta' andya's jīc.

<sup>25</sup>Tyajū' Jesus jycaajnisawe'sha' Dyus yuwe's pta'shrra tyajū casejty Samaria quiwesu vite' chjambcuēsu Dyus yuwe's pta'shya'. Sa' tyā'wē yūurraty Jerusalenna qui' shawend.

### Felipe' Etiopajuwe'sh yacj puuty we'weni

<sup>26</sup>Tyāa e'su' Dyus angela' Felipe's na'jīnac jycaaj:

—Ayjyu casejrra me'j Jerusalenu Gasa chjambna u'jni dyi'jsu.

Tyāa dyi'ja' nasa u'pnimeesuc scjēwna ūsu'. <sup>27</sup>Tyā'jīte', Felipe' tyāa dyi'tje u'juetsrra' teech pitstjē'j eunuco Etiopía quiwejuwe'sh u'juetstec uy. Tyāa pitstjē'ja' Etiopía quiwete reina Candace tashte vyyu jyaawsac yu'. Sa' Dyusa's wechaya' pal'sac yu' Jerusalente. <sup>28</sup>Tyāasac tyajy quiwenūi shawendna tyajy u'jni carretillate cachrra Dyus yuwe pta'shsa Isaias libru's lēeyna u'juets yu'. <sup>29</sup>Tyajū' Dyus Espiritu' Felipe's we'wec: Carretillate u'jsa's cpajcyya' me'j jīte', <sup>30</sup>Felipe utyaana sējrra' Isaias libru'te na'jīna lēeyni's wēse'jrra' pējycu:

—¿Jiyu'ngá' iindy lēeyni's? jīte', <sup>31</sup>tyāa pitstjē'ja' na'jīc:



(Hechos 8.29)

—¿Ma'wē yūurra jiyuqui'tj? quimva pta'shmeete' jīrra', Felipe's carretillate tejcarra pucate cachcaacj. <sup>32</sup> Sa' Dyus librute na'wē fi'ljni'scu lēeyna u'juets yu':

Piishacuē na'wēc icjya' jyūna u'ljni yuu.

Piishacuēva ma'wēga cjas wacatste' pembe'tsmée, tyā'wēy tyāava pembeeme'.

<sup>33</sup> Ājmeecuesa na'wē yuupa'ga, nwe'wenimeec uu,  
Atsa' tyajy luuch jīnisa quim yujva neeyūumeeta'.

Tyā' naa quiwete tyach fi'nzemeyna icjnic yuu naa pa'ga.

<sup>34</sup> Tyajū' tyāa pitstjē'j lēeyna u'jsa' pējycu Felipe's:

—Andya's meen peeta'sh, Dyus yuwe pta'shsa ayte we'we'c tyā' ¿quimnaga we'we'? ¿Peecy uuwa'ja's vá' we'we'? meerra' ¿vitesa uuwa'ja's vá' pta'shi'? jīte', <sup>35</sup> Felipe' tyāa lēeyni's pta'shcu: Na' Jesus uuwa'ja'scu we'we' jīna. <sup>36</sup> Tyajū' teech ajte yu'te pa'jrra', tyāa pitstjē'j Etiopajuwe'sha' na'ljīc:

—Ayte yu' u'pa' atsa' andya' āchjīi ya'bautisāy wēevatsa', ¿ājāma'tj? jīte', Felipe' na'ljīc:

<sup>37</sup>—Íindy úusuj jyuca tyā'wē Jesusa' Dyus Nchi'cne' yu' sūjrra yu', ya'bautisāyya' ājane'nga jīna pta'shte', tyāa pitstjē'j pasrra':

—Jesucristo' Dyus Nchi'c yuj yu'ne' sūju'tj andya' jīc.

<sup>38</sup> Tyajū' carretilla's cyuujul'jrra, e'nzfi yu'te quijrra Felipe' bautisāycu tyāa Etiopajuwe'sha's. <sup>39</sup> Tyāa yu'ju casejetspcachja', Dyus Espiritu' Felipe's jyūna u'cj, atsa' tyāa Etiopajuwe'sha' peena yu' uymeerrava tyajy dyi'tje wala wēt wēt wechana u'cj. <sup>40</sup> Tyajū' Felipe' Azoto chjambte pa'jrra', chjamb iisac Dyus yuwe's pta'shna u'j, Cesarea chjambte pa'pjcach.

### Saulo' Dyus yacj fi'nzeyā' utyani

(Hch. 22.6-16; 26.12-18)

**9** <sup>1</sup> Naapcachja' Saulo yu' icjwēena nescu yu' Jesusa's nwēese'jsawe'shtyi. Tyāasac sacerdote npiitstjē'j tashna u'j, <sup>2</sup> carta pējyya' Damasco chjambna u'jrra judiuwe'sh pcjaacjeni yat-su Jesusa's nwēese'jsaty pacuerra' pitstjē'j pety u'y tundrra Jerusalenna preesu jyūna u'ljya'. <sup>3</sup> Damascote pa'ljya' utyaana u'juetspcachja', tyajy dyi'pte uymeenuscu cieluju eena'sa cweetj. <sup>4</sup> Atsa' Saulo' weterra' wēse'cj na'wē we'weni's:

—Saulo, Saulo, ¿quij yūupa'ganga andya's ajtserra pcyuuya' pacué'? jīte', Saulo' pējycu:

<sup>5</sup>—Indya' ¿quimnga? jīna. Sa' na'wē we'weni'scu wēse'j:

—Andyíi Jesustju, indy na'wē ajtserra pcyuuya' pacue'ng tyāatj. Indya' peequírráa ya'cpā'yuuwa'ja's pacuena ūsngu jīte', <sup>6</sup> Saulo' ūucjnite yayana na'ljīc:

—Indya' ¿quĩjnga yũu jytjãasu' andya's? jite', na'wēc pas Jesusa':

—Quiiterra me'j chjambna. Cytee pa'tje ya'pta'shina quĩj yũuwa'ja'sva jic.

<sup>7</sup>Tyã'wē yũute', Saulo yacj u'jsa' wala ũucjtyi, tyã'wē puuty we'weteva quimnava uymeerra. <sup>8</sup>Tyajũ' Saulo' quiiterrava uyya' ajame!. Atsa' pu'quisrra jyũna u'ljty Damascón. <sup>9</sup>Cyte' tecj en uyya' ajamée, tyã'wēy quĩjva ũ'meec u'pu'.

<sup>10</sup>Damascote' Jesusna nwēese'jsa Ananias yaasesac u'pu'. Tyã'sa' Jesus vyaarra na'wēc we'we:

—Ananias jina pa'yate', Ananias pasrra':

—¿Quĩj caajya'vanga? jite', <sup>11</sup>Jesus we'werra':

—Teech cliicjún Cu'le yaasesate me'j. Cytee pa'jrra Judas yatte pēyine'nga: Teech pitstjē'j Tarsojuwe'sh Saulo yaasesa's peejytju jina. Tyãa pitstjē'ja' Dyus yacj puuty we'wena u'pa'. <sup>12</sup>Sa' teech pitstjē'j Ananias yaasesa pa'jrra qui' uyya' ajacajn tyajy cacuete peequinzeetstec csha'w.

<sup>13</sup>Tyã'jina we'weni's wēse'jrra' Ananiasa' na'jic:

—Andya's maava wala iipta'shta' Jerusalente indy yacj fi'nzesawe'shtyi tyã'wē wala pcyuusa' tyãa pitstjē'ja' jĩ'ty. <sup>14</sup>Sa' āchva naa chjambte yuja' sacerdote npiitstjē'jwe'shtyi carta pējyrra indyna yaacysawe'shtyi preesu jyũna u'jya' jite', <sup>15</sup>Jesus pasrra':

—Indya' me'jrráa. Tyãa pitstjē'ja' andy tyjityjnisa' andy yuwe's pta'shwa'jsa nasa vite quiwejuwe'shtyi, jycaajsawe'shtyi, sa' Israelwe'shtyiva pta'shwa'jsa'. <sup>16</sup>Andya' tyãa pitstjē'ja's pta'shi'nja andyna selpiina u'jupa'ga macue pcyuuni yuuwa'ja'sva jite', <sup>17</sup>Ananiasa' Saulo u'pni yatna u'jrra', tyajy cacuete peequinzerra na'jic:

—Yacjtjē'j Saulo, dyi'tje indy yujte Jesus vyaane' tyãac andya's caaj indy qui' uyya' ajarra Dyus Espiritu's ũuste jyuca jypa'gacajn jĩtspcachja', <sup>18</sup>yafyte apjsa umbute', qui' uyya' ajarra', quiiterra ya'bautisāyuc.

<sup>19</sup>Tyajũ' ũ'wa'ja's qui' jypa'garra chjāchjac, sa' Damascotee ũsu'c manz enva Jesusa's nwēese'jsawe'sh yacj.

### Saulo' Damascote Dyus yuwe's pta'shni

<sup>20</sup>Tyajũ' Saulo' Dyus yuwe's pta'shya' tacjcu judiuwe'sh pcjaacjeni yat-su Jesusa' Dyus Nchi'ca' jina. <sup>21</sup>Atsa' wēse'jsa jyucay cuj yajcyna na'wēty we'we':

—¿Naa pitstjē'jii tyã'wē Jerusalente Jesusa's neewe'wesaty icj wēena fi'nzesameená'? Sa' ¿tyã'wēy aytewe'shtyiva preesu jyũna u'jrra sacerdote npiitstjē'jwe'sh cusete ducjya' sũjrra yuusa yu'tsmeená'? jĩ'ty.

<sup>22</sup>Tyã'jĩtsteva Saulo yu' jweeírráac chjāchja pta'shi' Jesusa' Dyus tashu yuusa Cristo yuj yu'c jina, sa' cytee Damascote judiuwe'shtyi ma'wē paswa'ja's yujva j'i'pjmeec nviitu'.

### Judiuwe'sh icjya'vateva Saulo iyuni

<sup>23</sup>Tyāa e'su tyachte', judiuwe'sha' Saulo's icjya' puuty we'werra <sup>24</sup>chjambu casejni vityte en cusva yupna nestyi yuu. Atsa' tyā'wē yūuni's Saulo' jiyuc. <sup>25</sup>Atsa' Saulo's pi'cyna u'jusawe'sha' cusrrāa Saulo's canasta walate acjrria chjamb peecu'j upjnicjēty ecaju spajcy atsesa cusejū nwe'weya'.

### Jerusalente Saulo pa'jni

<sup>26</sup>Tyāa e'su' Saulo' Jerusalente pa'jrria', Jesusa's nwēese'jsawe'sh yacj pcjaacje wēc. Nava cyteewe'sh jyucaysa ūcjtjy Jesusa's nwēese'jsameevāana sūjrria. <sup>27</sup>Tyā'wēteva Bernabé yu' pe'jna u'jrria Jesus jyciaajnisawe'sh tashte nuypa'jrria na'wēc pta'sh:

—Saulo's Jesus vyaac Damasco dyi'tje u'juetste, sa' tyāa yacj puuty we'wec. Atsa' Saulo' Damascote pa'jrria Jesus caapiya'jnirrarrá'scu pta'shna ūsu' jīna pta'shte', Saulo's ūcjmée jypa'gaty. <sup>28</sup>Atsa' Jerusalente ūsu'c tyāawe'sh yacj pcjaacjena. <sup>29</sup>Sa' judiuwe'sh griego yuweju we'wesa yacj ūcjmeecc puuty we'we' Jesus caapiya'jni's pta'shna. Nava tyāawe'sh yu' ajtserra icjya'vaty yu'. <sup>30</sup>Atsa' tyā'wē yūuni's yacjtjē'jwe'sh jiyurra', Saulo's pe'jna u'jty Cesarea chjambna. Tyajū Tarso chjambnaty caaj.

<sup>31</sup>Tyajū' Dyus yacj fi'nzesa Judea, Galilea, Samariasuwe'sha' quim yujnava ūcjmée jweefírráaty chjächjana u'j Dyusráana nwēese'jna. Atsa' Dyus Espiritu pu'chte', jweefírráaty pejnana u'j.

### Eneas catyjini

<sup>32</sup>Tyajū' Pedro' yacjtjē'jwe'shtyí Dyus yuwe's pta'shya' casejrria', Lida chjambte Jesusa's nwēese'jsawe'shtyíva tjengya' u'cj. <sup>33</sup>Cyte' teech pitstjē'j Eneas yaasesa ocho añuc ātsa'na ūsu' ēseyá' ājameerra. <sup>34</sup>Atsa' Pedro' na'jīc:

—Eneas, indya's Jesucristo nuycatyjina. Atsa' quiiterra iindy deeni's mquii jītspcachja', tyāa pitstjē'ja' naa dundtey quiitec. <sup>35</sup>Atsa' cytee Lida chjambte vite' Sarón quiwete ūssa jyucaysa uyrra', Jesusa's nwēese'jya' utyaaty.

### Dorcasc qui' ityi yuuni

<sup>36</sup>Tyān ensu' Jope chjambte Jesusa's nwēese'jsa teech u'pu'c Tabita yaasesa. Tyā' griego yuwete' Dorcascu yaase yu'. Tyāa u'ya' wala pu'chna fi'nze'c maava peejysatyí'. <sup>37</sup>Tyāa ensu' Dorcasa' ātsa'rra uuc. Atsa' uuní cacue's cpēu'jrria ēe yatgaty cjcj. <sup>38</sup>Pedro ūsni Lida chjamba' Jope chjamb yacj utyac yu'. Atsa' Jope chjambte Jesusa's nwēese'jsawe'sha' Pedro' Lida chjambte ūsa' jīni's jiyurra', e'nz pitstjē'j caajty Pedro's na'wē pta'shya':

—Jytjēyuumée Jope chjambna myuj jīte', <sup>39</sup>Pedro tyāawe'sh yacj u'jrria cyte pa'tje', pe'jna u'jty uusáa ūsniga. Atsa' viudawe'sh jyucaysa ū'nena pcjaacjerra pta'shtyí Dorcas nee ityiy cmiisa umrra peesnity.

40 Tyajū' Pedro' jyucaysaty eca cutyi'jna'va, peejyūcuerra Dyus yacj puuty we'wena'va uusá's tjengrra na'jīnac we'we:

—Tabita, mquiitewe jītspcachja', tyāa uusá' tjengrra Pedro's uyna'va quiiterra cachcu. 41 Tyajū' Pedro' pu'quisrra cyuujū'jna'va, Dyus yacj fi'nzesawe'sh vite' viudawe'shtyi pa'yarra, ityic ducj. 42 Tyā'wē yūuni's Jope chjambtewe'sh jyucaysa jiyurra', wala cujsa Jesusa's nwēese'jya' utyaaty. 43 Tyajū' Pedro' Jope chjambte kuj encu ūsu' cja'ty weysáa Simon yatte.

### Pedro Cornelio yatte pa'jni

**10** 1 Cesarea chjambte teech soldau cpiitan Cornelio yaasesa u'pu'c. Tyā' Italiajuwe'sh soldauty jycaajsac yu'. 2 Tyāa pitstjē'ja' Dyusna wechana fi'nzesac yu', tyajy yattewe'sh jyucaysa yā'jrra. Sa' Dyus yacj pu'vituméc puuty we'wena fi'nze', tyā'wēy vyyuwa wala pu'chji'c judiuwe'shtyi. 3 Teech ente cusutste las treste' Dyus angel tyajy tashte u'carra na'jīna we'wetstec uy:

—¿Cornelio! jīna pa'yate', 4 tyāa pitstjē'ja' wala ūucjna Dyus angela's tjengrra' na'wēc pas:

—¿Quīj pējynga? jīte', Dyus angel we'werra':

—Indya' tyā'wē peejisaaty pu'chna Dyus yacj pu'vitumée puuty we'wena fi'nzeni's Dyusa' wēse'cj. 5 Atsa' indya' Pedro's pe'jya' mcaaj Jope chjambna. 6 Tyāa Pedro' cja'ty weysáa Simon yatte paandejna ūsa' ícj wala pucate. Atsa' Pedro pa'jrra pta'shina indy ma'wē yūuwa'ja'sva jīte', 7 tyāa angel u'juetspcachja' Cornelio' e'nz selpisáa vite' teech soldau Dyus dyi'pte ew fi'nzesa tyāawe'shtyi pa'yarra, 8 jyuca pta'shna'va Jope chjambna caacj.

9 Tyāawe'sha' cuscuscjē Jope chjambte utyaana pa'jatspcachja', ēepyāj yuutste' Pedro' tejcac ēe yat pwa'te Dyus yacj puuty we'weya'. 10 Sa' Pedro' wala wēec, atsa' tyajy ū'wa'j pjeu'jutsty yu'. 11 Naapcachja' Pedro' uycu cielucjē tela wala na'wēsa puuty vitste tundrra nuyquījatste. 12 Cyte yu' niimal yu'cj ech, ul, vichacue canzhsaty jyuca āshnisac ji'pju'. 13 Tyajū' na'wē we'weni'scu wēse'j:

—Pedro, quiiterra naa niimaltyi' icjrra mē' jīte', 14 Pedro pasrra':

—Andya' bagachte yujva na'wē niimal canzhsa yuutyi' ū'wa'jsameetj jīc.

15 Atsa' qui' we'weni wēse'cj:

—Dyus yaatenisatyi' indya' canzhsata' jīwa'j ji'pjmeeng āchja'.

16 Tyā'wē tecj usva vyaarrac, tyāa tela wala na'wēsa' qui' cieluní pu'quisni yuu. 17 ¿Quīj yūucajnqui'c tyā'wē vyaa? sūjna Pedro u'ppcachja', Cornelio caajnisal' pa'jty Simon yata's paapējyina. 18 Sa' sustyi pa'yana cūj:

—¿Naa yatte paandeesa Simon Pedro yaasesa ūsmeená'? jīna.

19 Pedro' tyā'wē uyni's ūus yajcyna u'piyna, Dyus Espiritu' we'wec:

—Tecj pitstjē'j indya's paapējyina ūsta'. 20 Atsa' quiiterra tyāawe'sh yacj me'j kuj yajcymée. Tyā'wēme', tyāawe'sha' andy caajni yujta' jīte', 21 Pedro sa'jrra Cornelio caajnisawe'shtyi pējycu:

—¿Mal'jīya'cue yuwé'? I'cue'sh pacuenisa' andytju jīte', 22 tyāawe'sha' pta'shtyi:



—Soldau cpiitan Cornelio caajni yujtja'w. Tyāa pitstjē'ja' wala ew zhichcue fi'nze'c Dyusna nwēese'jna, atsa' tyā'sa' judiuwe'sh jyucaysa wala wendyi'ty. Sa' teech ente' Dyus angel vyaarra' indya's pa'yacajn yuwe nvijtga. Cyaj Cornelio' jiyuna quīj pta'shwa'j ji'pjne'nga tyā'sna.

<sup>23</sup>Tyā'jīte', Pedro' tyajy deenite ca'ga'jrra, cyte dejrra cuscuscjē' Pedro' u'cj tyāawe'sh yacj, atsa' cyte Jope chjambte yacjtjē'jwe'shva u'jty pi'cyna.

<sup>24</sup>Cuscuscjē' Cesarea chjambte pa'jty, atsa' cyte' Cornelio' ūytjasnac ūsu' tyajy nwe'sh vite' tyajy namicu yacj pcjaacjerra. <sup>25</sup>Pedro pa'jatspcachja', Cornelio' jypa'gaya' casejrra Pedro tashte peejyūcuc wechana. <sup>26</sup>Nava Pedro' pu'quisrra na'wēc we'we:

—Andya's peejyūcuen. Andya' indy na'wēysa firráatj jīrra', <sup>27</sup>Cornelio yacj puuty we'wena dyiite u'catsrra', cyte yu' wala cuj pcjaacjerra ūstec uyna cūj. <sup>28</sup>Sa' Pedro' na'jīc:

—I'cue'sha' jiine'cue, judiuwe'sha' pcjaacjena puuty we'wewa'jsameeta' vite nasa judiumeesa yacja'. Nava Dyusa' andya's pta'shrra', quim yujnava atsecaajme'. <sup>29</sup>Tyāa pa'gatj pa'yatspcachja', wa'lmée yuwé'. Āchja' andya's mpeeta'shwe quīya'cue yuucacj jīte', <sup>30</sup>Cornelio' pta'shcu:

—Āchja' pajnz en yuutsa' naapcachja' naa oratey las treste naa yattey quījva ū'mée Dyus yacjrráa puuty we'wena u'pu'tj. Naapcachja' teech pitstjē'j atjni ropa cuentetesa ji'pjsa vyaac. <sup>31</sup>Sa' na'wēc we'we: Cornelio, indya' tyā'wē peejisaaty pu'chna Dyus yacj puuty we'wena fi'nzeni's Dyusa' wēse'cj. <sup>32</sup>Atsa' Jope chjambna mcaaj, Simon Pedro yaasesa's pe'jya'. Tyāa Pedro' cja'ty weysáa Simon yatte paandejna ūsa' ĩcj wala pucate. Atsa' tyā' ayte pa'jrra puuty we'wena indy yacj jīnac we'we. <sup>33</sup>Tyā'wē jycaaj yā'tje', jytjēyuumée pacueya' caatj. Atsa' wech yuwe'ne'nga. Āchja' ayte Dyus dyi'pte jyucaysa pcjaacjerra ūstja'w, sa' wēse'jya'vatja'w ma'wēne' Dyus we'wecaaj tyā'sna.

### Cornelio yatte Dyus yuwe's Pedro pta'shni

<sup>34</sup>Tyajū' Pedro' pta'shcu:

—Āchja' jiyutj Dyusa' quim yujnava ajtsemée, <sup>35</sup>maa quiwejuwe'shrrava tyā'sna nwēese'jna ew yūuna fi'nzesa yuutyi' jypa'ga'rráac. <sup>36</sup>Dyusa' Israelwe'sh ji'jty yuwe caacj Dyus yacj fi'nzewa'ja's Jesucristo yuurráa ūsuna sa' tyāa'írráa naa quiwetewe'sh jyucaysaty jycaajana jīna. <sup>37</sup>I'cue'sha' jiine'cue na'wēc yuu: Galileajū tacjrra judiuwe'sh quiwete jyuca tuutje'jnic yuu, Juan Dyus yuwe's pta'shrra yu'te bautisāynijū. <sup>38</sup>Dyusa' Nasaretjuwe'sh Jesusa's tyajy Espiritu's ūste', Jesusa' quījteva nuycatyjinac fi'nze echtjē'j cusete ūssaty. Dyusa' tyāa yacjcu ūsu' naa pa'gac tyā'wē yūu. <sup>39</sup>Jesusa' tyā'wē Judea quiwesu vite' Jerusalente quījteva ew yūuna fi'nzeni's cue'sha' jyuca uysaatja'w. Tyā'sa' cluuscjē a'cyrra icjtyi. <sup>40</sup>Nava Dyusa' tecj ente qui' ĩtyi vitrra caavya'ja'cj cue'shrráaty, nasa jyucaysaty yu' mée. <sup>41</sup>Dyusa'

maarrajtyn'e' cue'shtyi tyjityj tyãarráatycu vyaa. Atsa' cue'sha' tyãa yacj pcjaacjena ũ'na fi'nzesatja'w uurra qui' ityi yuunijũ. <sup>42</sup>Tyajú' tyã' cue'shtyi caacj tyajy yuwe's nasaty na'wẽ pta'shcajn: Dyusa' tyãa Jesusa's tyãarrarráa castigáywa'lsac vitrra qui'p naa quiwete ityisa ma'ty yuu uusáa ma'ty yuu nava jyucaysaty. <sup>43</sup>Tyã'wẽy Dyus yuwe pta'shsawe'shva yatscjẽy we'wety Jesusa' na'wẽ yũuwa'jsa' jĩna: Maava jyucay tyã's nwẽese'jsa' tyãawe'sh pcaltiyi peltunãyni yuutyna jĩnaty we'we.

### Judiu ji'jmeerrava Dyus Espiritu's jypa'gani

<sup>44</sup>Pedro' tyã'wẽ pta'shna ũsiyna, cyte wẽse'jna ũssawe'sh cacuete Dyus Espiritu qui'jte', jyucaysa jypa'gaty. <sup>45</sup>Atsa' Jesusna nwẽese'jsawe'sh judiu Pedro yacj yuusá' wala cuj yajcyna neeyũuty tyã'wẽ judiuwe'shmée vite nasava Dyus Espiritu's jypa'garra, <sup>46</sup>tyã'wẽ vite yuweju we'wena Dyusa's tuutje'jna ũste.

<sup>47</sup>Tyajú' Pedro' na'ljic:

—Naa nasava cue'sh na'wẽy Dyus Espiritu's jypa'ga yã'tje', yu'te bautisãywa'jsa' ¿quimrrá' yupya' ajama'c? jĩrra', <sup>48</sup>ya'bautisãy caacj Jesucristo yasete. Tyajú' Pedro's neevishaty tyãawe'sh yacj manz en cytee ũscajn.

### Dyus ma'wẽ yũuni'sva Jerusalente pa'jrra Pedro pta'shni

**11** <sup>1</sup>Jesus jycaajnisá vite' yacjtjẽ'jwe'sh Dyus yacj fi'nzesa Judea quiwete ũssa' jiyuty tyã'wẽ judiu ji'jmée vite nasava Dyus yuwe's jypa'gaty jĩni's. <sup>2</sup>Sa' Pedro Jerusalen chjambte shawendna pa'tje', cyte judiu circuncidãynisawe'sha' ũuschawe'wety Pedro's na'jĩna:

<sup>3</sup>—¿Quijya'nga judiumée vite nasa tashsu u'jrra tyãawe'sh yacj pcjaacjerra ũ'we'?

<sup>4</sup>Tyajú' Pedro' pta'shcu ma'wẽ yũuni'sva jyuca:

<sup>5</sup>—Andya' Jope chjambte Dyus yacj puuty we'wena u'prra uytju tela wala na'wẽsa puuty pajnz vitste tundrra ãe walacjẽ caajni qui'jc andy tashte pa'j. <sup>6</sup>Atsa' ew tjengte', dyyite yu' niimal yu'cj ech, ul, vichacue canzhac ji'pj yu'. <sup>7</sup>Tyajú' na'jĩni'stju wẽse'j: Pedro, quiiterra icjrra mẽ' jite', <sup>8</sup>na'wẽtj pas: Andya' bagachte yujva na'wẽ niimal canzhsa yuutyi' ũ'wa'lsameetj. <sup>9</sup>Tyajú' qui' ptjũusec cieluju we'weni: Dyus yaatenisatyi' indya' canzhsata' jĩwa'j ji'pjmeeng jic. <sup>10</sup>Tyã'wẽ tecj usva vyaarrac ãe walate qui' pu'quisni yuu. <sup>11</sup>Naapcachja' Cesareaju caajnisá tecj pitstjẽ'j pa'jty andya's pacuena. <sup>12</sup>Atsa' Dyus Espiritu' andya's u'cjaacj tyãawe'sh yacj wa'lmée. Tyajú' Jope chjambtewe'sh seis yacjtjẽ'jwe'sh yacj u'jrra' jyucaysa Cornelio yatte u'catja'w. <sup>13</sup>Atsa' tyãa pitstjẽ'ja' pta'shcu Dyus angel vyaarra na'wẽ we'weni's: Jope chjambna Simon Pedro yaasesa's pa'yaya' mcaaj. <sup>14</sup>Atsa' tyãa pa'jrra pta'shina iindy yatte jyucaysawe'sh Dyus yacj fi'nzewa'jsa's. <sup>15</sup>Tyã'wẽ pta'shte', andy we'wetspcachja', Dyus

Espiritu' tyāawe'sh cacuete quījc, cue'sh cacueteva ma'wēga nyaffi quīj tyā'wēy. <sup>16</sup>Tyājū' yajcytju cue'shtyi jype'ljsa Jesucristo na'wē we'weni's: Juana' yu'terrāc acjna bautisai'. Nava i'cue'sha' Dyus Espiritute yuu bautisāyni yuune'cue jīni's. <sup>17</sup>Cue'sha' Jesucristo's nwēese'pja'ga Dyusa' ma'wēga tyajy Espiritu's ūs, tyā'wēycu tyāawe'shtyiva ūs. Atsa' andya' ġma'wē yūurra Dyus wendyni's wa'lna ūsuqu'itj?

<sup>18</sup>Tyājū' Jerusalente ūssa yacjtjē'jwe'sha' wēse'jrra', peena yu' pasmée Dyusrāanaty na'wē tuutje'j:

—Judiuwe'shmée vite nasatyva Dyusa' ūsne' pcaltyi nvijtrra Dyus tashte ptsuwa'jmée fi'nzewa'ja's jīnaty wechá'.

### Antioquía chjambte Dyus yacj fi'nzesawe'sh

<sup>19</sup>Āchja' nyaffi na'wē Estebana's icjrra vite neeyūusāa yuutyi' ajtserra pcyuute', tyāawe'sha' ūpjna u'jrra' maafī yu' Fenice quiwen, vite' Chipre quiwesu, vite' Antioquía chjambsu cysū pa'jrra vite nasa yuutyi' pta'shmée judiu jil'j pwe'sh yuurraaty pta'shi' Dyus yuwe u'sesa's. <sup>20</sup>Nava Dyus yacj fi'nzesa Chipre vite' Cirene quiwejuwe'sh maafī yu' Antioquía chjambte pa'jrra', judiuwe'shmeetyva pta'shtyi Jesus caapiya'jni ewte fi'nzewa'ja's. <sup>21</sup>Atsa' Dyus pu'chte', tyāawe'sha' nyaffi jypumbana fi'nzeni's nvijtrra Jesus caapiya'jni's nwēese'jty.

<sup>22</sup>Tyā'wēty Dyusa's nwēese'j jīni's Jerusalente pcjaacjena ūssa' jiyurra', Bernabea's caajty Antioquía chjambna. <sup>23</sup>Atsa' Bernabea' cyte pa'jrra' wala wechac Dyus tyā'wē pu'chni's uyrra. Sa' jyucaytyi yu'cypejc jypumbamée ew Dyus yacj fi'nzeczajn. <sup>24</sup>Tyāa pa'gatey Bernabea' Dyus Espiritu's tyajy ūuste jyuca jypa'garra Dyus yacj yuurraa fi'nzesac yu'. Tyājū' nasaty wala ya'cnaycu Dyus jīi.

<sup>25</sup>Tyā'wē yūurra', Bernabea' Tarso chjambna Saulo's pe'jya' u'jrra', Antioquía chjambte nuypa'cj. <sup>26</sup>Sa' cyte teech añuty pcjaacjena ūsu' nasa ma'wēsatyva jyuca caapiya'jna. Antioquátaty nyafyrraj cristiano jīna cysusnisa yuu Cristo's nwēese'jsawe'shtyi.

<sup>27</sup>Tyān ensu' Dyus yuwe pta'shsawe'sh Jerusalenu yuusa pa'jty Antioquíate. <sup>28</sup>Teechsa Agabo yaasesa' Dyus Espiritu caajiyu'tje', yacjtjē'jwe'sh cshavyte yujurra: Judiuwe'sh quiwete jyuca wēje en pa'jana jīnac pta'sh. (Tyā'wē pta'shni' cytey yuuc jycaajsa Claudio ente.) <sup>29</sup>Tyā'wē wēje en pa'jana jīni's wēse'jrra', Dyus yacj fi'nzesa Antioquátatewē'sha' tyāawe'sh jil'pjuni yacj pu'chya' yajcytyi yacjtjē'jwe'sh Judea quiwetewe'shtyi. <sup>30</sup>Tyājū' peeswa'ja's pcjacjrra caajty Bernabé Saulo yacj Judeate ancianowe'shtyi ducjajn.

### Jacobo's icjrra Pedro's carcelte tyajni

**12** <sup>1</sup>Tyān ensu' jycaajsa Herodesa' pcyuuya' yajcyu Dyus yacj fi'nzesaty. <sup>2</sup>Sa' cchilluj quicje'cj Juan nyacj Jacobo's. <sup>3</sup>Tyā'wē

yūute' Jacobowe'shtyi atsesa judiuwe'sha' wechaty jycaajsa Herodesa's, atsa' Pedronava preesu'cjaacj quicje'jya'. Pan levadura ji'pjmée ū'wa'j fiesta entec tyā'wē yūu. <sup>4</sup>Herodesa' Pedro's preesu tundrra' carcelte ctyaaja'cj. Custe pajnz us yu'ptjejna pe'tewa'jsa soldau tyajc, yu'ptjej iisa pajnz pajnz yujucajn. Pascua fiesta en scjēwte nasaa cshavyte cutyi'jya' sūjrrac tyā'wē yūu. <sup>5</sup>Atsa' Pedro' carcelte wala ew yupni ūsu'c, nava Dyus yacj fi'nzesawe'sh yu' Dyus yacj pu'vituméety puuty we'wena ūsu' Pedro pa'gate.

### Dyusa' Pedro's carceluj cutyi'jni

<sup>6</sup>Herodesa' Pedro's nasaa cshavyte cutyi'jwa'j en ājatste', tyāa custe Pedro' dejc e'nz soldau pyājte, e'nz cadenaju tundni. Naapcachja' vite e'nz soldau yu' carcel vitytety yupna ūsu'. <sup>7</sup>Tyāa dundte Dyus angel vyaarrāa yuute', carcelte jyuca eena'c cweetj. Tyajū' angela' na'jīnac tu'cacana Pedro's fity:

—Dund yuj mquiite jītspcachja', tsam cadena' chucuetety Pedro cuseju. <sup>8</sup>Atsa' qui' we'wec tyāa angela':

—Indy jytundni's ya'jytundrra, pelgatyi's mpaatj jīte', Pedro' tyā'wē yūuc. Tyajū' tyāa angela' qui' we'wec:

—Atyja's jycaatsrra myuj andy e'stey jīte', <sup>9</sup>Pedro' angel e'stey casejc, isa angela' eca cutyi'jītsteva csha'wnavāa ūsne'tca sūjnarrāa yajcyna. <sup>10</sup>Nava nyafy vityte soldau yupna ūsnite scjēwrra', e'ste vityte soldau yupna ūsniteva scjēwtyi. Sa' eca casejwa'j tsam vityte sējetspcachja', tyāa vitya' peecyrrāa pjaatec. Atsa' casejrra u'jty clliicjunsu. Tyajū' angela' Pedrorrāana nvijtrra u'cj. <sup>11</sup>Tyajū' Pedro' naasūjc: Csha'wnimeega yu',



(Hechos12.7)

isa Dyusne' tyajy angela's caaj Herodes cuseju andya's nwe'weya', vite' judiuwe'shva nacie wala ewmée yūuya' ūytjasu'ty tyāaju nwe'wecajn sūjnac yajcy.

<sup>12</sup>Pedro' tyā'wē ew jiyurra' u'cj Juan Marcos njī'j Maria yatna. Cyte' wala kuj pcjaacjerra Pedro pa'gate Dyusa's neewe'wenaty ūsu'. <sup>13</sup>Cyte cūjrra vityte uca'cate', teech luuch u'y Rode yaasesac tjengya' casej. <sup>14</sup>Nava Pedro we'weni's jiyurra', vitya's pjaandemée wechana qui' shawendcu dyiigay wuwuurráa:

—Pedro' vityte ūsa' jīna pta'shya'.

<sup>15</sup>Atsa' na'jīnaty we'we:

—Luucu we'wena ūsi'cha jīteva:

—Īshijja'tsmeetj, isa yuja' jīte':

—Pedromée, tyāa yacj pi'cyna u'jusa angelrráana jīty.

<sup>16</sup>Tyā'wēteva, Pedro yu' vityte uca'cana nescu yu'. Atsa' vitya's pjaandeya' u'jrra', Pedro's uyrra wala kuj yajcytyi. <sup>17</sup>Nava shuuna' yuucajn Pedro' cuseju pta'shrra', Dyus ma'wē carceluj nwe'weni's jyuca pta'shcu. Sa':

—Jacobo vite' cue'sh yacjtjē'jwe'shtyi mpeeta'shwe tyā'jīna'va, tyāa yu' casejna u'cj vite ajte.

<sup>18</sup>Cuscuuscjē cjcjynite', wala kuj yajcyna ūucjtyi soldauwe'sha' tyā'wē Pedro ma'wē yūuteva jiyumeerra. <sup>19</sup>Tyājū' jycaajsa Herodesa' pacueya' caacj, nava uymeete' cyte carcelte tjengsa soldautycu icj caaj. Tyāa e'surráa Herodesa' Judea quiweju casejrra Cesarea quiwetec u'pya' u'j.

### Herodes uuníi

<sup>20</sup>Herodesa' wala puiina ūsu'c Tiro Sidón quiwete nasa yacj. Tyāa pa'gaty tyāa nasa' Herodes tashte mjīisa Blasto yaasesa's vyu ducjrra tyāa yacj u'j jycaajsa tashte utyaarra puiimée fi'nzewa'ja's puuty we'weya'. Tyā'wē yūumeete', tyāa nasa' jycaajsa quiwejurráaty ū'a's jypa'gana fi'nzesa yu'. <sup>21</sup>Atsa' jycaajsa Herodesa' pta'shcu quīj ente tyajy tashte utyaawa'ja'sva. Sa' tyāa en ajte', Herodesa' jycaajsa atjni ropaty atjrra tyajy u'pnite cachrra we'wec. <sup>22</sup>Tyājū' nasa' na'jīnaty wechana sus we'we:

—Na'wē we'wesa' naa quiwete nasamée, Dyusa' jītspcachja', <sup>23</sup>tyāa dundtey Dyus angela' acasa ūscu Herodesa's, atsa' jyuca wes ū'te' uuc, tyā'wē nasaa wechani's wechana yaacypa'ga.

<sup>24</sup>Nava Dyus yuwe yu' jweeírráac walaana u'j mtee mteeva pta'shni.

<sup>25</sup>Tyājū' Bernabé Saulowe'sha' mjīia's jyā'jrra Jerusalenuj qui' shawendtyi Juan Marcosa's pe'jrra.

### Bernabé Saulo yacj Dyus yuwe's pta'shya' nyafyrraj casejni

**13** <sup>1</sup>Antioquía chjambte pcjaacjena ūssa yacj ūsu'ty Dyus yuwe pta'shsa vite' Dyus leya's jīsava: Bernabé, vite' cjūch Simon

jīnisa, vite' Lucio Cirene chjambuwe'sh, vite' Manaén Galileate jycaajsa Herodes yacj ij walaasáa, vite' Saulo'. <sup>2</sup>Tyāawe'sha' teech ente' Dyusna selpiina yūunaana ūste', Dyus Espiritu' na'wēc we'we:

—Saulo Bernabé yacj mcaajwe andya's selpicajn, tyāawe'sha' andy pa'yanisata' mjīiwa'jsa jīc.

<sup>3</sup>Tyājū' yūunaana jyā'jrra', tyāawe'sh dyictjesu peequinzerra Dyusna neewe'wena' caajty.

### Bernabewe'sha' Chipre quiwete Dyus yuwe's pta'shni

<sup>4</sup>Dyus Espiritu caatje', Bernabé Saulowe'sha' Seleucia chjambna u'jrra tyājū' barcote cjēerra icj pyājte Chipre quiwentyi u'j. <sup>5</sup>Tyāa quiwete Salamina chjambte pa'jrra', judiuwe'sh pcjaacjeni yat-su Dyus yuwe's pta'shya' tacjtyi. Sa' Juan Marcosnava iipe'jty yu' pu'chwa'jsa. <sup>6</sup>Chipre quiwe's pecūjna jyā'jatsrra', Pafos chjambtety pa'j. Sa' cyte' teech judiu dyijyuusáa Barjesus yaasesa'styi uy. Tyāa pitstjē'ja' wala išhiisa yu'c Dyus yuwe pta'shsatj jīna išhiina. <sup>7</sup>Tyāa dyijyuusá' cyte ne'jue'sh wala jiisa Sergio Paulo tashte mjīisac yu'. Tyāa ne'jue'sha' Dyus yuwe's wēse'j wēerra Bernabewe'shtyi pa'yac. <sup>8</sup>Nava tyāa dyijyuusáa Elimasa' Bernabewe'shtyi' cwe'we'j wēeme', ne'jue'sha' Dyus yuwe's jiyucajmen. <sup>9</sup>Tyā'wē yūute', Dyus Espiritu's ūuste jyuca ji'pjsa Saulo Pablo yaasesa' dyijyuusáa dyi'pte ūuscha tjengrra', na'jīc:

<sup>10</sup>—İshiina fi'nzesa, ewmeesa, echtjē'j luuch, ewsa yu'sa' jyuca ajtsena fi'nzesa ħmjīitenga Dyus yuwe ewsa's yupmēe fi'nze'tsmēe? <sup>11</sup>Tyāa pa'ga Dyusa' indya's āchjīi castigaīna, atsa' uyya' ājamēe fi'nzene'nga naa ensu' jītspcachja', tyāa dundtey uyya' ājameerra' maarrāatyva pacuec pu'quisrra pe'jna u'cjan. <sup>12</sup>Tyājū' cyte ne'jue'sha' tyā'wē yūuni's uyrra', Jesus caapiya'jni's isa yujna sūjna ūuste jypa'gac.

### Pablowe'sh Pisidia quiwesu pecūjni

<sup>13</sup>Pablo vite' tyāa yacj pi'cyna u'jusa yā'jrra barcote cjēerra Pafos chjambu casejty Panfilia quiwete Perge chjambte pa'jya'. Nava Juan Marcos yu' Perge chjambte pa'jrrarráa qui' shawendcu Jerusalennay. <sup>14</sup>Pablowe'sha' Perge chjambu casejrra Pisidia quiwete Antioquía chjambnaty u'j. Cyte pa'jrra', jycaase ensu' judiuwe'sh pcjaacjeni yatte u'caty. <sup>15</sup>Atsa' pcjaacjeni yatte npiitstjē'ja' Dyus ley vite' Dyus yuwe pta'shsa fi'jni's lēeyna jyā'jrra', na'wēty we'we:

—Yacjtjē'jwe'sh, quīj we'wewa'j ji'pjrra', myu'cypejwe nasaty āchjīi jīte', <sup>16</sup>Pablo' quiitena'va cuseju shuuna' yuuwa'ja's pta'shna'va we'wec:

—Israel ji'jwe'sh, vite nasava Dyusna nwēese'jsa, jypa'yacy mwēese'jwe: <sup>17</sup>Israelwe'sh Dyusa' cue'sh yatsgawe'shtyi tyjityjrra wala cpeena'cj Egipto quiwete nee ūsiyna, sa' tyāa quiwejū cutyi'cj quījva seena'sa caavya'ja'jrra. <sup>18</sup>Dyusa' nasa u'pnimēe quiwete cuarenta añu wantāyycu

nasa ãjmée yũuna fi'nze'tsteva. <sup>19</sup>Sa' Canaan quiwete nasaty jyuca iviituc tyãa quiwe's cue'sh yatsgawe'shtyi ũsya'. <sup>20</sup>Tyajú' cuatrocientos cincuenta año ãjpcach jycaajwa'jsa ji'pjmée cue'shtyi tjengwa'jsa cjuësrráac nvijt, Dyus yuwe pta'shsa Samuel entepcach. <sup>21</sup>Tyájuty tyãawe'shíi pējy teech jycaajwa'jsa, atsa' Dyusa' ũscu cuarenta año jycaajwa'jsa Cis nchi'c Saul yaasesa's. Tyãa pitstjē'ja' Benjamin ji'cj yu'. <sup>22</sup>Tyãa e'su' Dyusíi Saula's jycaajni'jū cutyi'jrra, Davida'scu jycaajwa'jsa qui'p. Sa' na'wēc we'we: Isaí nchi'c David yuurráa andy jycaajni's cytey yuuwa'jsa uytju tyã' andy wendynisa' jīc. <sup>23</sup>Jesusa' David ji'tjewe'shcu yu', atsa' tyã'snac Dyusa' nvijt Israelwe'shtyi nwe'wewa'jsa, nyafiitey Dyusa' ma'wēne' ũsya' neeyũu tyã'sa' cytey yuuc. <sup>24</sup>Jesus pa'jmeyna Juana' Israel nasa jyucaysaty pta'shcu: I'cue'sh pcaltyi jyuca nvijtrra Dyus tashte mishawendwe yu'te ya'bautisãyna jīna. <sup>25</sup>Sa' Juana' tyajy uu en utyaatste', na'wēc we'we: Andya' i'cue'sh ũytjasu'i'cue tyãameetj. Andy e'ste teech yuja' tyajy pelgatyi wesrráa yujnava andya' cijimbya' selpimeesatj jīc.

<sup>26</sup>Yacjtjē'jwe'sh Abrahan ji'j, vite nasava Dyusna nwēese'jsa i'cue'sh ewte neeyũuwa'ja's pta'shnic yuu. <sup>27</sup>Nava Jerusalente ũssa vite' tyãawe'sh npiitstjē'jsava jiyumeeta' Jesusa' quimteva. Sa' Dyus yuwe pta'shsa fi'jni'sva jiyumeeta' pcjaacjeni yat-su jycaase een isa lēeyrrava. Sa' tyãawe'shíirráa Jesusa's ewmeete nvijtrra', Dyus yuwe pta'shsa fi'jni tyãawe'sh lēeyni's cytey yuuty. <sup>28</sup>Tyã'wē Jesus ewmée yũuni's uymeerrava Pilato's yuwe ũstyí Jesusa's quicije'cjan. <sup>29</sup>Tyajú' Dyus libruete ma'wēne' fi'jni ũsu' tyã'sa' jyuca cytey yuurra', Jesusa's cluus spajcyrra pendaaty. <sup>30</sup>Nava Dyusa' uunijū qui' ityi vitcu. <sup>31</sup>Atsa' Jesusa' wala cuj en vyaac Galileajuwe'sh Jerusalenna pi'cyna yuusaty. Tyãasa tyãawe'sha' Jesus quimteva pta'shsata'.

<sup>32</sup>Tyãa pa'ga cue'shva i'cue'shtyi pta'shitstja'w nyafiitey cue'sh yatsgawe'shtyi Dyusa' ũsya' neeyũuc tyã'sna. <sup>33</sup>Cue'sha' yatsgawe'sh ji'tja'w, tyãa pa'gac Dyusa' tyajy ũsya' neeyũuni's cue'sh yacj cytey yuurra, Jesusa's uunijūva ityi vit, salmo doste na'wē fi'jni ũsa' tyã'wēy: Indya' andy nchi'cngu. Atsa' indya's uunijūva ityi vittju áchja' jīc. <sup>34</sup>Uute' tyãa cacue' suweecajmen ityi yuuwa'ja's Dyusa' pta'shcu tyajy libruete na'jīna: I'cue'shtyi peeygãawa'ja's David yacj puuty we'wetj tyã'sa' cytey yu'nja jīc. <sup>35</sup>Tyãasac salmo vite ajcjēva na'jī': Indyna selpisáa peeygãanisa cacue's nvijtmeene'nga suweewe'shte jī'c. <sup>36</sup>Tyã'wē we'weni' isa cytey yuuyujc. Tyajíic Davida' tyãn ensu' Dyus jycaajni's cytey yuurra e'su' uuc, atsa' tyajy cacue's yatsgawe'sh pendaniitey pendaate', tyajy cacue' cytee jyuca ptsuuc. <sup>37</sup>Nava Dyusa' Jesusa's uunijūva ityi vitcu, atsa' tyãa cacue' ptsuume'. <sup>38</sup>Áchja' yacjtjē'jwe'sh i'cue'sha' mjiyuwe: I'cue'sh pcaltyi peltunãywa'ja's pta'shi'tja'w, nava peltunãywa'jsa' Jesus yuurrá'. <sup>39</sup>Nyafíi Moises leya's nwēese'jrrava, perdona's uyme'e'cue. Nava Jesusna yajcyrra nwēese'jrra', perdona's



uyuune!cue maava. <sup>40</sup>Mpa'yajcywe, tyā'wēme!, nyaffi Dyus yuwe pta'shsa na'wē we'wety tyā' cytey yuuwe'shta:

<sup>41</sup>Weechsawe'sh, mpa'yajcywe. I'cue'sh vituwa'ja's müucjwe.

Tyā'wēme!, andyíi Dyustju na',

Tyā'wē yūuwa'j en äjte!, quijva seena'rráa yu'nja.

Tyā'wē yūuwa'ja's pta'shteva, i'cue'sha' jypa'gameene'cue jīnaty we'we jīc Pablo'.

<sup>42</sup>Tyajü' Pablo' tyā'wē pta'shrra', tyāa yacj pi'cyna u'jusa yacj judiuwe'sh pcjaacjeni yatu casejetste!, cyte üssa judiu jil'jmeerrava Pablowshtyí qui' pi'cytyi vite jycaase ente tyā'wēy pta'shya' yuucajn.

<sup>43</sup>Cyte pcjaacjeni ptsuute!, judiuwe'sh wala cujsa vite! judiu jil'jmeerrava judiuwe'sh caapiya'jni's jypa'gasa Dyus yuwe's wala ew nwēese'jrra', Pablowshtyí caapiya'jni's nwēese'jsaty yuu. Atsa' Pablowshta' wala yu'cypejty Dyus peeygāanite wa'lmée fi'nzecajn.

<sup>44</sup>Vite qui'su jycaase ente!, chjambte nasa jyucay pcjaacjety Dyus yuwe's wēse'jya!. <sup>45</sup>Nava tyā'wē nasa wala pcjaacjete!, cyte judiuwe'sha' wala üusacharra Pablowshtyí atsewe'wena wēeshuty. <sup>46</sup>Tyā'wēteva, Pablowshta' üucjmeety na'jīna we'we:

—Dyus yuwe's nyafyte i'cue'sh judiu jil'j cjuē'ytyi pta'shwa'cj yu', cyajtja'w pta'sh. Nava jypa'gameeyā'jil'cue ptsumée ityi fi'nzewa'ja's, atsa' ächja' u'juetstja'w judiumée vite nasaty pta'shya!. <sup>47</sup>Dyusa' cue'shtyí na'wēc we'wena caaj:

Nasa cshavysu eena' cweetjwa'jsatj nvijt i'cue'shtyí!,

Sa' tyā'wēy maa quiweteva ewsa's pta'shwa'jsa jīc.

<sup>48</sup>Atsa' judiu jil'jmée vite nasa tyā'jīni's wēse'jrra', Dyus yuwe' wala ewsa yu'ga jīna wecharra maarrājne'ta bagachte yujva ptsumée ityi fi'nzewa'jsa yu' tyāa yu' jyucay Dyus yuwe's jypa'gaty. <sup>49</sup>Tyā'wēc Dyus yuwe's pta'shni yuu tyāa quiwete jyuca. <sup>50</sup>Nava tyāa chjambte judiuwe'sha' nasa jytujtjesa pety u'y yā'jrra cyteerraj puuty we'werra, Pablowshtyí pcyuuya' yajcytyi tyāa quiwejū cutyi'pjcach. <sup>51</sup>Tyā'wē yūute!, Pablowshta' tyāawe'sh chindate quiwe tujnda's sacueecuerra u'jty Iconio chjambna. <sup>52</sup>Nava cyte nasa Dyus yuwe's nwēese'jsa yu', wala wechana neeyūuty, Dyus Espiritu's üuste jypa'garra.

### Iconio chjambte Pablowshtyí pa'jni

**14** <sup>1</sup>Pablowshta' Iconio chjambte pa'jrra', judiuwe'sh pcjaacjeni yatte u'carra, Dyus yuwe zhichcuesa's pta'shte!, wala jypa'gaty judiuwe'sh vite! judiuwe'shmeesava. <sup>2</sup>Nava judiuwe'sh Jesus caapiya'jni's atsesa yu' judiu jil'jmée vite nasaty ewmée yu'tywe'werra yacjtjē'jwe'shtyí atseyaacywa'ja's vittiyi. <sup>3</sup>Tyā'wē atsepa'gaírráaty Pablowshta' jweefírráa cyte tyach üsu!, Dyusa' pu'chjina sūjna üucjmée pta'shna. Atsa' Pablowshtyí tyā'wē Dyus peeygāani's pta'shte!, Dyusa' cyte nasa wēse'jsa yuutyí ewcu

caajiyu'lj Pablowe'shtyi quĩjva seena'sa's caavya'ja'jya' ãjawa'ja's ũsrra. 4Atsa' tyãa chjambtewe'sha' tyuteety, vite' judiu atsesawe'sh ju'ngu, vite' Pablowe'sh ju'ngu. 5Tyãjũ' judiuwe'sh vite' judiuwe'shmeesava cjuẽswe'sh yacj puuty we'wety Pablowe'shtyi wẽeshuna cuet wãatatajrra icjya'. 6Nava Pablowe'sh jiyurra', ũpjna u'ljty Licaonia quiwete Lистра Derbe chjambna cysũ jyuca pecũjrra 7Dyus yuwe ewte nviitwa'jsa's pta'shya'.

### Listra chjambte Pablo's cuet wãatatajrra icj wëeni

8Sa' Lистра chjambte pa'tje', cyte' teech pitstjẽ'j chinda ãtsa'sac u'pu'. Tyã' upyjĩ tyã'wẽ yã'cj yu', sa' bagachte yujva u'ljyua' ãjasameec yu'. 9Tyãa pitstjẽ'ja' Pablo pta'shni'scu wẽse'jna u'pu'. Atsa' Pablo' tyajy dyi'pte tjengrra' jiyuc nuycatyjina sũjni's. 10Sa' suscu we'we:

—Cu'le myuju jĩna. Naapcachja' tyãa pitstjẽ'ja' ũpjrra yujuna'va ew yã'cj u'ljyua' ãja. 11Pablo tyã'wẽ yũuni's nasa uyrra', na'wẽty Licaonia yuweju weyna we'we:

—jNasa na'wẽ yuurra dyuswe'sh cue'sh tashte quĩjty! jĩrra', 12Bernabea's Jupiter jĩnaty cysusu', sa' Pablo's Mercurio jĩnaty we'we', wejy tjaacue we'wesa yuupa'ga. 13Tyãawe'sh dyus Jupiter jĩ'ty tyã'sna neewe'wena ũsni yata' chjamb pecu'tjec ũsu', atsa' cyte selpisãa sacerdote' cla jyũna pa'cj quite zhichcuesa cju'ũ'jũ'jrra. Atsa' nasa' Pablowe'shtyi wechana peejuũcuerra neewe'weya'vaty yu' tyãa claty icjna. 14Nava Pablowe'sh jiyurra' tyã'wẽ yũute ñusrra peecy atjni ropaty sundena'va nasaa cshavyte cũjrra na'jĩnaty sus we'we:

15—l'cue'sha' ¿quĩjya'cue tyã'wẽ yũ'? Cue'sha' nasa l'cue'sh na'wẽysa fĩrrãatja'w. Sa' tyã'wẽ yũuna fi'nzenisa' seelpimeesa' naa pa'ga nvijrra Dyus ãtyãsa cielu's pjeu'cj, quiwe, ãcj wala cyte quĩjrraj ũstyna tyãaty jyuca tyã'snarrãa selpiina neewe'wewa'ja' jĩna pta'shya' yuusarrãatja'w. 16Tyãa Dyusa' nyaffĩ ensu' nasaty' nvijtcu ma'wẽva yũuna fi'nzeczajn. 17Nava Dyus ũsyujna sũjcajn caajiyu'jna nescu yu', nus caapa'jal'jna, uutjashtyi ew cchjãachja'jna, ũ'wal'ja's peejymée peesna, wõt fi'nzewa'ja'sva ũsna jĩnac pta'sh. 18Tyã'wẽ pta'shrrac wala tjẽyrrãava pejca nasaty cnay, tyãawe'shtyi wechana cla icjna peejuũcuezajmen.

19Tyãa e'su' judiuwe'sh Antioquía Iconio chjambuwe'sh pa'jrra cyte nasaty ewmée yu'tywe'werra cuet wãatatajty Pablo's. Tyã'wẽ yũurra', uuyã'ljne' sũjrra wenzhna u'ljrra chjamb ecãjty wãatãj. 20Nava cyteewe'sh Dyus yuwe's nwẽese'jsa yu', Pablo's tjengya' u'tje', Pablo' qui' ũus ji'pjurra quiiterra qui' chjambtey u'cac. Sa' vite cuscuscjẽ' Bernabé yacj Derbe chjambnaty u'lj.

21Derbe chjambte pa'jrra', Dyus yuwe ewte nviitwa'jsa's pta'shrra nasaty wala cnayty Dyus jĩi. Tyã'wẽ yũurraty shawend Lистра, Iconio, Antioquía chjambsu iipa'j. 22Tyãa chjambsu pa'jrra', Dyus yuwe's nwẽese'jsaty wala yu'cypejty Dyus jycaajna ũsnite u'ca wẽerra' Dyus

yacj tyutemée fi'nzewa'ja', macue pytjaa ñuswa'j en pa'tjeva jīna. <sup>23</sup>Sa' cysū pcjaacjena ūsnisu jycaajwa'jsa ancianova pacuerra qui'ptyi. Tyā'wē yūurraty yūunaarra Dyus cusete neewe'werra nvijt.

### Pablowe'sh Antioquía chjambnay qui' shawendni

<sup>24</sup>Tyajū u'jrra', Pisidia quiwesu scjēwrra Panfilia quiwetety pa'j. <sup>25</sup>Tyāa quiwete Perge chjambte Dyus yuwe's pta'shrra Atalia chjambnaty u'j. <sup>26</sup>Tyajū' barcote cjēerra u'jty Antioquía chjambna, majūne'ta Dyus cusete neewe'werra mjīiya' caajnisu yuu tyāa chjambnay. <sup>27</sup>Antioquía chjambte pa'jrra', cyte pcjaacjena ūssa yacjtjē'jwe'shtyi pta'shtyi Dyus ma'wēne' tyāawe'shtyi pu'chrra judiu jil'mée vite nasatyva Dyus yuwe's caajiyu'j tyā'sna. <sup>28</sup>Sa' Pablowe'sha' cyte wala tyach ūsu'ty Dyus yuwe's nwēese'jsawe'sh yacj.

### Pablo Jerusalentewe'shtyi paapējyja' u'jni

**15** <sup>1</sup>Tyāa e'su' Judeajuwe'sh judiu Antioquía chjambte pa'jrra cyteewe'shtyi na'wēty caapiya'jna ūsu': Ya'circuncidāywa'j jil'pji'cue Moises jycaajni's cytey yuuna. Tyā'wē yūumeerra', ewte neeyūuya' ājameene'cue jīna. <sup>2</sup>Atsa' tyā'wē caapiya'tje', Pablowe'sha' wala juuna' puuty we'wety tyā'wē pta'shsa yacj. Tyajū' cyte pcjaacjena ūssa yacjtjē'jwe'sha' Pablowe'shtyi vite caapi'qui'jrra Jerusalenna caajty Jesus jycaajnisawe'sh vite' anciano cyteewe'sh yacj tyāa yuwe's paapējyja puuty we'wecajn.

<sup>3</sup>Antioquía chjambte pcjaacjesa yacjtjē'jwe'sh caatje', Fenicia Samaria quiwesu scjēwnaty u'j, judiu jil'mée vite nasava Dyus yuwe's jypa'garra nyaffi jypumbana fi'nzeni's nvijtyi jīna pta'shna. Atsa' cysū yacjtjē'jwe'sha' wala wechaty tyā'wē jiyurra'.

<sup>4</sup>Pablowe'sh Jerusalente pa'tje', cyte pcjaacjena ūssa vite' Jesus jycaajnisawe'sh ancianowe'sh yā'jrra jypa'gaty. Atsa' Pablowe'sha' jyuca pta'shtyi tyā'wē judiu jil'mée vite nasatyva Dyusa' ewte neeyūuwa'ja's ūscu jīna. <sup>5</sup>Nava maai' yu' cyte ūssa fariseowe'sh Jesus caapiya'jni's jypa'gasarrava na'wēty we'we yujurra: Judiu jil'mée vite nasa āchj u'se Dyus yuwe's jypa'gasawe'shtyi' circuncidāyrra, Moises jycaajni leya's jyuca nwēese'cjan jycaatje yuuna jīty.

<sup>6</sup>Tyajū' Jesus jycaajnisu vite' ancianowe'sh yacj pcjaacjerra tyāa yuwe's pjeu'jya' puuty we'wety. <sup>7</sup>Tyā'wē wala tyach tyāa yuwe's puuty we'wenijū', Pedro' quiiterra na'wēc we'we:

—Yacjtjē'jwe'sh, i'cue'sha' jii i'cue Dyusa' andya's tyjityjcu tyajy yuwe ewte nviitwa'jsa's pta'shcajn judiu jil'mée vite nasatyva, cyaj tyāawe'shva jiyucajn. <sup>8</sup>Dyusa' jii' maarra'j nwēese'jwa'jsateva, tyāasa íc vite nasava tyā'sna nwēese'jwa'jsa yuutyi's tyajy Espiritu's ūs, cue'shtyiva ma'wēga tyajy Espiritu's ūs tyā'wēy. <sup>9</sup>Dyusa' maa yujtyva nasa fiisata'

sūju'tsme' cue'sh yacj vite nasa yacj. Tyāasaáírráac vite nasarrava Jesusa's yaacysa yuutyi's tyāawe'sh pcaltyi' peltunāy. <sup>10</sup>Dyus tyā'wē yūurra nwe'wenisatyi's ¿quíjya'cue i'cue'sha' jweeírráa tjēysa's yuutyana jycaaj wēje'? Tyāa tjēysa's cue'sh yatsgawe'sh yujva cytey yuuya' ājameeta', atsa' cue'sh yu' wejytja'w ājāmée. <sup>11</sup>Tyā'wē cue'sha' tyāa tjēysa's cytey yūuya' ājāmeeteva, Jesusa' peeygājrra yuurráane' cue'shtyi' nwe'we sūju'tja'w. Tyāasane' vite nasatyva tyā'wēyrráa nwe'we.

<sup>12</sup>Pedro tyā'wē we'wete', jyucaysa shuuna'ty yuu, Pablowe'sh pta'shni's wēse'jya'. Atsa' tyāawe'sha' pta'shtyi Dyusa' tyā'wēc quim yujva ājānimeesa's caavya'ja'jya' ājāwa'ja's cue'shtyi ūsrra judiu jil'jmée vite nasatyva jyuca pu'ch jīna. <sup>13</sup>Tyāawe'sh pta'shna jyā'tje', Jacoboc we'we:

—Yacjtjē'jwe'sh, mwēese'jwe. <sup>14</sup>Simon Pedro na'wēc pta'sh judiu jil'jmée vite nasatyva Dyusa' nyafyrraj peeygājrra tyāawe'shtyi tyjityjcu tyajy luuch yuuwa'jsa. <sup>15</sup>Tyā'wē yuuwa'ja's Dyus yuwe pta'shsawe'sh fi'jty tyā' cytey yuuc. Tyāa fi'jni' na'jī'c:

<sup>16</sup> Tyā'wē yūunijū shawendrra, qui' tyaja'nja David tyaa'jni yat wetenisa's.

Tyāa wetenisa's pjeu'jrra u'se vitrra nviitu'nja.

<sup>17</sup> Cyaj maava jyuca Dyusa's pacueya' ājatyna,

Maa quiwejuwe'shva andya's jiyusa yu' jyuca.

<sup>18</sup> Tyā'wē yūuwa'ja's Dyusa' nyaffi enteycu tyā'wē we'wena caajiyu'j.

<sup>19</sup> Tyāa pa'gatj andya' naasūju': Judiu jil'jmeerrava Dyusna nwēese'jya' pacuesaatyi' cuch cue'sh leytyi nwēese'jwa'ja's jycaajmée, <sup>20</sup> naasáa na'wē pta'shna fi'tjerráa ewna: Naa quiwega dyus ityimeesa's wechaya' tajcy icjni chicha's ū'wa'jme'. Sa' ptammeesa pcal yuuna fi'nzewa'jme'. Tyā'wēy tajcynava tjucrra icjnisa chicha's ū'wa'jme', eenava ū'wa'jme'. <sup>21</sup> Tyā'wē yūumeete', Moises leya's nyaffi enteytyi tyāasu we'wena pta'shna yujna ūsu' chjamb iisa judiuwe'sh pcjaacjeni yat-su jycaase ensu jīc Jacobo'.

<sup>22</sup> Tyajū' Jesus jycaajnisawe'sh vite' ancianowe'sh cytee ūssa jyucaysa puuty we'wety Pablowe'sh yacj Antioquía chjambna caajya'. Sa' tyjityjtyi Judas Barsabás yaasesa's vite' Silas tyāawe'sh wala jyujtjesaty.

<sup>23</sup> Tyāawe'sh yacj carta na'jīna fi'jrra caajty:

Jesus jycaajnisawe'sh vite' ancianowe'sh wechana yuwe cajastja'w ayte ūssa yacjtjē'jwe'sh jyucaysa yā'jrra judiu jil'jmée vite nasa Antioquíate ūssa i'cue'shtyi, vite' Siria Cilicia quiwetewe'shtyiva. <sup>24</sup> Cue'sha' jiyutja'w cue'sh yacj ūssa judiu maafi yu' cue'sh jycaajmeeteva u'jrra tyāawe'sh caapiya'jni yacj i'cue'shtyi caypumba'jna ūsu'ne'ta Moises leya's nwēese'jrra ya'circuncidaíne'cue jīna. <sup>25</sup> Tyā'wē yūupa'ga cue'sh jyucaysa na'wē yūuya' puuty we'werra cue'sh yacj ūssaty tyjityjrra i'cue'shtyi tjengya' cajastja'w cue'sh yacjtjē'j Pablowe'sh <sup>26</sup> na'wē nūs cnaytyi cue'shtyi jype'jsa Jesucristo caapiya'jni's pta'shpa'ga tyāawe'sh yacj. <sup>27</sup> Atsa' cue'sh caajni Judas vite' Silas tyāawe'sh pa'jrra i'cue'shtyi



(Hechos 16.2)

pta'shityna ma'wē yūuwa'ja'sva ew āate. <sup>28</sup>I'cue'shtyi' jwee yu' tjaacue jycaajmēe na'wērrāa yūuwa'ja'scu Dyus Espiritu' cue'shtyi caaūsutje'j; <sup>29</sup>Naa quiwega dyus ityīmeesa's wechaya' tajcy icjni chicha's ũ'wa'jme', eenava ũ'wa'jme', tajcynava tjucrra icjnisa chicha's ũ'wa'jme'. Ptammeesa pcal yuuna fi'nzewa'jme'. Na'wē neewe'we'tja'w tyāaty cytey yuuterrāa ewna. Dyus yacy tyutemēe mfi'nzewe.

<sup>30</sup>Tyā'wē caatje', Silaswe'sha' Antioquíate pa'jrra cyteewe'sh yacj pcjaacjerra carta's ducje', <sup>31</sup>tyāa carta's lēyrra wala wechaty tyā'wē zhichcue yu'cypejna fi'jni's uyrra. <sup>32</sup>Tyāa Silaswe'sha' Dyus quīj yūuya'vateva dyiicjēy pta'shya' ājasaty yu', tyāasa cyte yacjtjē'jwe'shtyi yu'cypejna wala cchjāachja'jty. <sup>33</sup>Tyāawe'sha' cyte manz en ūsrra qui' shawenduutste', cyte yacjtjē'jwe'sha' yuwe wala wechaa caajna caajty quimne'ta caaj tyāawe'sh tashnay. <sup>34</sup>Nava Silas yu' cyte neeyūuya'c yajcy. <sup>35</sup>Tyajū' Pablowe'sha' Antioquíate Dyus yuwe's caapiya'jna nestyi yuu vite yacjtjē'jwe'sh yacj.

**Pablo' Bernabé yacj tyuteerra Dyus yuwe's pta'shya' qui' casejni**

<sup>36</sup>Tyāa e'su' Pablo' Bernabea's na'jic:

—Yacjtjē'jwe'shtyi qui' tjengya' u'juega maa chjamsurraj ne'tca'w Dyus yuwe's pta'sh cysū jyuca, ma'wē ūsteva uyya' jite', <sup>37</sup>Bernabea' Juan Marcosna pe'jrrac u'j wēe. <sup>38</sup>Nava Pablo yu' pe'jna u'jya' wa'lcu, tyā'wē mjii pu'chna jyā'jmée Panfiliajūrráa shawendsa' sūjrra. <sup>39</sup>Tyajū' puuty ūuscha we'werra tyuteety. Bernabea' Juan Marcosna pe'jrra Chipre quiwencu u'j, <sup>40</sup>naapcachja' Pablo' Silasnac tyjityj, tyāa yacj u'juwa'jsa. Atsa' cyte yacjtjē'jwe'sha' tyāawe'shtyi Dyus cusete neewe'wena



(Hechos16.24)

iyã'jatspcachja', casejty. <sup>41</sup>Sa' u'ljrra Siria Cilicia quiwesu yacjtjê'jwe'shtyi chjãachja'jty Dyus yuwe's pta'shna.

### Pablowe'sh yacj Timoteo u'jni

**16** <sup>1</sup>Pablo Silas yacj Derbe Listra chjamsu pa'ljrra cyte puuty uytyi Jesucristo's jypa'gasa Timoteo yaasesa yacj. Tyajy nji'ja' Jesucristo's jypa'gasa judiu ji'tjeva, Timoteo ney yu' judiu ji'jmée griegoc yu'. <sup>2</sup>Listra Iconio chjamsu u'psa yacjtjê'jwe'sh maava jyucaty tyãa Timoteo's wala tuutje'je!. <sup>3</sup>Tyajú' Pablo' tyãa Timoteo's pe'ljrra u'ljya'c yajcy, sa' caacircuncidaí'cj tyã'wê griego nchi'ca' jina cysü judiuwe'sh atsewe'wecajmén. <sup>4</sup>Sa' Jerusalente Jesus jycaajnisá vite' ancianowe'sh fi'jni carta's jyucaty pta'shna u'ljue' maa chjamsuwa yacjtjê'jwe'shtyi. <sup>5</sup>Tyã'wê jiyurra', cysü pcjaacjesawe'sha' jweefirráaty chjãchja Dyus yacj fi'nze!, atsa' nasa yu' een isaty pejnana u'ljue' Jesus caapiya'jni's nwêese'jna.

### Pablo csha'wte teech pitstjê'j Macedoniajúwe'sh pi'cyni

<sup>6</sup>Tyajú' Pablowe'sha' Frigia Galaciasuty ctejcana u'lj, Dyus Espiritu' Asia quiwesu jwee yu' Dyus yuwe's caapta'shi'jme' naa pa'ga. <sup>7</sup>Sa' Misia quiwete utya cújrra', Bitinia quiwen u'ljue'nja'w sújteva, Espiritu' u'cjaajme!. <sup>8</sup>Tyã'wê yũuyã'tje!, Misia quiwen teejwend u'ljrra, Troas chjambtety pa'lj ícj wala pucate. <sup>9</sup>Cyte úsrrac Pablo' teech custe csha'w teech pitstjê'j Macedoniatewe'sh na'wê pytjaa we'wena úste: Macedoniate ctejcarra, cue'shtyi myuj pu'chya' jina. <sup>10</sup>Pablo csha'wte tyã'wê pa'ya yã'tje!, Macedonia quiwen u'ljya' pjeu'tja'w, cue'shtyi! Dyus tyã'wê cajatsna Macedoniatewe'shtyi tyajy yuwe ewte nviitwa'jsa's pta'shya' sújrra.

### Pablo Silas yacj Filipos chjambte cyuupjni

<sup>11</sup>Troas chjambuj barcote cjêerra u'tja'w ícj pyãjte Samotracia quiwen. Sa' vite cuscuscjê' Neapolis chjambte pa'tja'w. <sup>12</sup>Tyajú qui' u'ljrra', Filipos chjambte pa'ljrra manz en úsu'tja'w. Tyãa chjamba' romanowe'sh iiyamunisa wala jytujtjesa yu'c Macedonia quiwete. <sup>13</sup>Teech jycaase ente' chjamb eca casejtja'w yu'wala pucate Dyus yacj puuty we'weya' pcjaacjenite, sa' Dyus yuwe's pta'shtja'w cyte u'y pcjaacjesaty. <sup>14</sup>Atsa' cyte pcjaacjesa teechsa' Lidíac yaase yu', Tiatira chjambuwe'sh, tela zhichcuesaty tyweysáa. Tyãa u'ya' Dyusna nwêese'jsac tyã'wê Pablo pta'shni's wêse'jna u'pu'. Atsa' Dyusa' tyajy úuste caajiyu'cj Pablo pta'shni's. <sup>15</sup>Tyajú' tyajy yattewe'sh yã'jrra jyuca yu'te ya'bautisãyrra', na'ljinac cue'shtyi pytjaa we'wena pi'cy:

—Ú'cue! Dyus yacj fi'nzewa'jsate i'cue'sha' ew jiirra!, ú'cue yatte myujwe de'ya' jirra áandyijimeerra pe'jna u'cj.



<sup>16</sup>Teech ente nyaffi ūsnitey u'juetsrra', puuty uytja'w teech cna'sa'sa echtjē' tyajy ūuste caajiyu'tje pta'shna u'jusa yacj. Tyāa cna'sa' patron jype'lnisa cu'ga yu', sa' patronwe'shtyi wala vyu caacnayuju'cu'ga tyā'wē quij̄nava ūuste jiyurra nasaty pta'shna. <sup>17</sup>Tyāa cna'sa' cue'sh e'stey yuwe' Pablo's na'wē sus we'wena:

—Naa pitstjē'jwe'sha' cielute Dyusna selpisaata', tyāasaty i'cue'shtyi' pta'shi' ewte u'jwa'j dyi'ja's jīna.

<sup>18</sup>Manz enva tyā'wē yūute', nmejte' Pablo' cuchrra na'wēc we'we tyāa cna'sa ūuste u'psa echtjē'ja's:

—Jesucristo jycaajni's nwēese'jrra, tyāa cna'sa ūusuj mcaasej jītspcachja', echtjē'ja' casejc.

<sup>19</sup>Nava patronwe'sha' tyāa cna'sa pa'garrāa vyu cnayna fi'nzeni's iviituyā'jrra', Pablowe'shtyi uwerra chjamb pyājte jyūna u'jrra <sup>20</sup>cyte cjuēswe'shtyi na'jīnaty pāatyjī'cj:

—Naa pitstjē'j judiuwe'sha' wala cuch yuuna ūsta' cue'sh chjambte. <sup>21</sup>Quij̄va cue'shtyi selpiwa'jmeesarrāanaty caapiya'ja', atsa' tyā'sa' cytey yuuya' ājāme'nja'w, cue'sha' romano nasatja'w naa pa'ga jīte', <sup>22</sup>nasa' wala ūusachana ajtsety. Atsa' cjuēswe'sha' Pablowe'shtyi csūupi'jrra pechuucue caajty. <sup>23</sup>Tyā'wē wala pcyurra', carcelte ctyaaja'jrra cyte tjengna ūssa's wala jypa'yacy tjeng caatje', <sup>24</sup>cyte tjengsa' carcel dyiite jwee dyiiju pe'jna u'jrra telte chindaty se'wrrac qui'p.

<sup>25</sup>Nava Pablowe'sh cuspyāj Dyus yacj puuty we'wena memna u'pte', vite preesu' wēse'jna u'ppcachja', <sup>26</sup>ejnd seena' chjāchja u'tje', carcel vitya' jyuca pjaatety, atsa' preesu tundni cadenava chuctetety. <sup>27</sup>Tyājū' carcelte tjengsa yajcyrra', carcel vity jyuca pjaaterra ūste uyrra', cchilla's cutyi'jrra peequírrāa ya'icjya'vac yu', preesu' jyuca casejrra u'jne'ta sūjna ūucjrra. <sup>28</sup>Atsa' Pablo' na'wēc we'we:

—Tyā'wē yūunu. Jyuca ūstja'w ayte jīte', <sup>29</sup>carcelte tjengsa' bela pqui'tarra ūucjna wuwuurrāa cūjrra, Pablowe'sh tashte peejyūcuc.

<sup>30</sup>Tyājū' Pablowe'shtyi cutyi'jrra na'wēc pējy:

—I'cue'sha' mpeeta'shwe, ¿ma'wē yūurra Dyusa's uyuuqui'tj? jīte', <sup>31</sup>Pablowe'sha' na'wēty pta'sh:

—Cue'shtyi jype'jsa Jesucristo's jypa'garra yuurrāa Dyus yacj fi'nzewa'ja's uyuune'nga pety iindy yattewe'sh yā'jrra jyuca.

<sup>32</sup>Tyājū' Dyus yuwe's pta'shtyi tyajy yattewe'sh jyucaysaty. <sup>33</sup>Sa' carcelte tjengsa' tyāa custey Pablowe'sh cpā'ty pcji'cyna'va tyajy yattewe'sh yā'jrra jyucaysa ya'bautisātyti. <sup>34</sup>Tyājū' tyajy yatna pe'jna u'jrra puutscu, sa' wala wechana ūsu'c Dyus yacj fi'nzewa'ja's ji'pjutja'w jyucaysa jīna.

<sup>35</sup>Tyājū' cjuēswe'sha' cusíi policia caajty carcelte tjengsa tashna Pablowe'shtyi' tyjweetecajn pta'shya'. <sup>36</sup>Atsa' carcelte tjengsa' pta'shcu Pablo's:

—Cjuēswe'sha' tyjweete caajty i'cue'shtyi'. Atsa' casejrra ūucjmée me'ljwe jíte', <sup>37</sup>Pablo' na'wēc we'we policiawe'shtyi:

—Cue'sha' romano nasateva ajtserra nasa jyuca uyna ūste pcyuurra carcelte cyuupjtyi, quīj yūupa'ga yuuweteva tyā'sa' jiyumey. Sa' āchja' paatste quīm yujva jiyunimeete tyjweete'nja'w ¿sūjuvá'nta? Tyā'wē yūuya' yu' ājameetyna. Cue'shtyi cutyi'jya' tyāawe'sh yuu yuwetyna jíte', <sup>38</sup>policiawe'sha' u'jrra cjuēswe'shtyi tyā'wēy pta'shte', tyāawe'sha' wala ūucjtyi, Pablowe'sha' romano nasateva jiyurra'. <sup>39</sup>Tyajū' cjuēswe'sha' Pablowe'sh tashna u'jrra jypumbane'tca'w jīna pytjaa we'werra carceluj cutyi'jrra chjambuj casej caajty. <sup>40</sup>Atsa' Pablowe'sha' carceluj casejrra', cyte chjambte Lidia yatnaty u'j. Sa' ūucjmée meswe jīna yacjtjē'jwe'shtyi cviisha'jrraty tyajū casej.

### Tesalonicate nasa ūuschani

**17** <sup>1</sup>Pablo Silas yacj Anfípolis Apolonia chjamsu ctejcana u'jrra, Tesalónica chjambtety pa'l judiuwe'sh pcjaacjeni yatte. <sup>2</sup>Pablo' jycaase ensu' tecj qui'supcachcu Dyus libru ma'wēne' we'we' tyā'sna caapiya'jna ūsu' judiuwe'sh pcjaacjeni yatte. <sup>3</sup>Sa' āatec pta'sh:

—Dyus tashuj yuusa' wala pytjaa yuurra uurrava qui' ityi yuuwa'jsac yu', atsa' andy i'cue'shtyi pta'shi'tj Jesus jīna tyāafic Dyus tashuj yuusa Cristo yu'.

<sup>4</sup>Tyajū' judiuwe'sh maafí yu' tyā'wē Jesusa' Dyus tashuj yuusa Cristo yuj yu'ne' sūjrra Pablowe'sh ju'nguty yuu. Tyā'wēy wala cuj griego Dyusna nwēese'jsava utyaaty, vite' u'yva wala cuj utyaaty jytujtjesawe'sh. <sup>5</sup>Tyā'wē yūute', vite judiuwe'sh Pablo pta'shni's atsesa yu' wala ūusacharra nasa ewmeesaty pcjajrra chjambte wala seena' csuusuty cuch yuuna. Sa' Jasón yatte Pablowe'shtyi pacueya' u'jty tyajū cutyi'jrra nasaa cshavyte ducjya'. <sup>6</sup>Nava tyāawe'shtyi uymeerra', Jasón vite' yacjtjē'jwe'sh cyte ūssarráatyva wenzhna u'jrra chjambte cjuēs tashte cuutya'jrra na'wēty wēeshu:

—Tyāa nasa naa quiwe's jyuca caypumba'jsawe'sh ayteva pa'tja, <sup>7</sup>atsa' Jasona' tyajy yattega jypa'ga. Tyāawe'sha' jyucaysa atse'ty Romate jycaajsa leya's, tyā'wē vite jycaajsa Jesus yaasesa ūsa' jīrra.

<sup>8</sup>Tyā'jīna we'wete', cjuēswe'sh nasa jyucaysa wala seena' sustyi. <sup>9</sup>Nava Jasón vite' tyāa yacj ūssawe'shtyi vyu cusa'jrrarráa tyjweetety.

### Pablo Silas yacj Bereate pa'jni

<sup>10</sup>Cyte yacjtjē'jwe'sha' tyāa custey wala dund caajty Pablowe'shtyi' Berea chjambna. Cyte pa'jna'va u'jty judiuwe'sh pcjaacjeni yatna. <sup>11</sup>Cyte judiuwe'sha' wala ew yu'ty Tesalonicatewe'sh na'wēmée. Dyus yuwe's wala wechana jypa'garra, een isaty Dyus libroute pacué' Pablowe'sh pta'shni isa dyijteva jiyuya'. <sup>12</sup>Tyā'wē cyteewe'sh wala cujsa jiyuty Pablo

pta'shni' isa yuj yu'ga sũjna, vite' u'y griego jytujtjesa pety pitstjê'lj yâ'jrra. <sup>13</sup>Nava judiu Tesalonicatewê'sha' tyâ'wê Pablo' Dyus yuwe's pta'shna ũsa' Bereate jĩni's jiyurra', Berae chjambna u'jrra cyte nasaty wala seena' caaũscha'ljty. <sup>14</sup>Atsa' cyte yacjtjê'ljwê'sha' jwee yu' caajytjêyuljmée Pablo's caajty Atenas dyi'lj. Naasáa Silas Timoteo tyāawê'shrráaty neeyũ Bereate. <sup>15</sup>Pablo yacj pi'cyna u'jsawe'sha' Atenas chjambna pa'ljty u'lj. Sa' qui' Bereate shawendna pa'jrra', Pablo' i'cue'shtyi wala dund yuuccacj tyāa yacj ũsya' jĩnaty pta'sh Silaswê'shtyi'.

### Atenas chjambte Pablo pa'jni

<sup>16</sup>Pablo' Atenas chjambte Silas Timoteo tyāawê'shtyi ũytjasna ũsra', wala kuj yajcyna fi'nze'c tyāa chjamba' naa quiwete dyus ũyimeesarrarráatycu tyacue wala ji'pj yu' naa pa'ga. <sup>17</sup>Tyāasac judiuwê'sh pcjaacjeni yatte judiuwê'sh yacj vite' judiumeerrava Dyusa's yaacysawê'sh yacj puuty we'we', sa' chjamb pyājsuva een isac we'we' Dyus ũyimeesaty neewe'wesawê'sh yacj. <sup>18</sup>Tyājũ' cyte epicúreo caapiya'jni's piyana ũssawê'sh vite' estóico caapiya'jni's piyana ũssawê'sh pitstjê'ja' Pablo yacj puuty we'wety, naapcachja' maái yu' na'ljĩnaty we'we' tyāawê'sh pwe'sh:

—Naa tjê'ja' ¿quiiqui'c tyacue wala we'we'? jĩ'ty. Naapcachja' vite we'werra':

—Dyus jiyunimeesaty cysusnac pta'shi' jĩ'ty.

Pablo' Jesus uurra qui' ũyĩ yuuni's pta'shpa'gaty tyā'jĩna we'we'.

<sup>19</sup>Tyājũ' Pablo's teech ajte Areópago yaasesate pe'jna u'jrra paapêjtyti: —Cue'shtyi meen peeta'sh na'wê yuwe u'sesa pta'shi'ng tyā'sa' jiyu wêetja'w. <sup>20</sup>Na'wê quĩjva fiysa pta'shi'ng tyā'sa' ew āate mcaajiyulj jĩna.

<sup>21</sup>Tyā'wê Atenastewê'sha' jyucaysa pcjaacjerra quĩjva u'se caapiya'jni's wêse'jna puuty paapêjynarráa fi'nzesaty yu', atsa' vite quiwejuwê'sh Atenaste u'p-ya' paljsava tyā'wêytyi yu'.

<sup>22</sup>Tyājũ' Pablo' Areópagote tyāawê'sh cshavyte yujurra we'wec:

—Atenastewê'sh i'cue'sha' dyusa's wala yaacysane'cue sũju'tj.

<sup>23</sup>Msuuva i'cue'sh dyusa's neewe'wenu' tjengna u'jrra', uytju teech altalte na'wê fi'jnisa: Jiyunimeesa Dyusa' jĩnisa. I'cue'sh na'wê jiyunimeesa dyus jĩna neewe'wene'cue tyāa Dyus jiyunimeesa'stju andya' āate caajiyul'ju'. <sup>24</sup>Tyāa Dyuscu naa quiwê's vitrra cyte quĩjquĩjrraj ũstyna tyāatyva jyuca vit. Tyāa pa'ga tyāaái namu' naa quiwe, cielu yâ'jrra. Tyā' pitstjê'ljwê'sh tyaajni yat-su ũsu'tsme'. <sup>25</sup>Tyā' naa quiwete nasa pu'chni fi'nzewa'jsame'. Tyāaái cue'sh jyucaysa ũyĩ fi'nzewa'ja's ũs, quĩjquĩjnavá jyuca. <sup>26</sup>Sa' nasa maanzcuēesava teech pitstjê'lj ji'jrrarráa yuuwa'ja's vitrra, msuurraj u'pwa'jsateva pta'shna ena'sva tyujndec nus pa'jn qui' secna yuuwa'ja's. <sup>27</sup>Dyusa' ũsna sũjrra pacuerra' tjêymée uycajncu tyā'wê yũu. Atsa' Dyusa's pacuete yu' cue'sh yacj jyu'ljmeete ũsa'. <sup>28</sup>Cue'sha' Dyus ũste írráatja'w ũtyi ēse'sena fi'nzeya' āja'. Dyus ũste ítyi i'cue'sh

ji'j wala fi'l'ya' jiisawe'sh na'wē we'we: Dyus taqui'nitja'w jīna. <sup>29</sup>Tyā'wē Dyus taqui'niyā'jrra', pitstjē'jwe'sh ūs yajcyrra nasa na'wē piisani ūsta' vyuu bej, vyuu chijme, cuet tyā'wēsa' cue'shtyi taqui'satyna sūjwa'j ji'pjmeetja'w. <sup>30</sup>Dyusa' nyaffi ensuy yu' ma'jīme' nasa' jiimeerra ma'wēva yūuteva. Nava āchja' jyucaytyi jycaaja'c pcaltiyi nvijrra Dyusa'srrāa pacuecajn. <sup>31</sup>Tyā'wēme', Dyusa' teech ente naa quiwete yuuwesaty castigāywa'jsa tyjityjcu. Atsa' tyāa tyjityjnisa' cytey yuuyujuna. Tyā'wē yuuya' írrāac uurrava qui' ityi yuu.

<sup>32</sup>Tyā'wē uurrava qui' ityi yuuc jīni's wēse'jrra', maafi yu' weechtyi, naapcachja' vite we'werra':

—Vite encjē qui' pta'shine'nga, tyagach qui' wēse'je'nja'w jī'ty.

<sup>33</sup>Tyā'jīyā'tje', Pablo' u'cj. <sup>34</sup>Nava maafi yu' Pablo pta'shni isa yujna sūjrra tyāa yacj utyaaty. Cyte utyaasaawe'sh teehsa' Dionisio Areópagote pcjaacjesatewe'shcu yu', sa' teech u'y Dámaris yaasesava utyaac, vite yā'jrra.

### Corinto chjambte Pablo pa'jni

**18** <sup>1</sup>Tyāa e'su', Pablo' Atenasuj casejrra Corinto chjambnac u'j. <sup>2</sup>Cyte' teech judiu Aquila yaasesa yacjcu puuty uy, Ponto quiwejuwe'sh. Aquila tyajy nyu Priscila yā'jrra u'serrāa Italiaju pa'jrraty cyte ūsu', Romate jycaajsa Claudio' judiwe'shtyi tyājū jyuca cutyi'pja'ga. Atsa' Pablo' tyāawe'sh yatna u'jrra Aquilawe'sh yattec yuju. <sup>3</sup>Tyāawe'sh na'wēy tultu catsrrac tyweyna fi'nzesa yu', tyāasac cyte neeyūu tyāawe'sh yacj mjīina. <sup>4</sup>Sa' jycaase ensu' judiwe'sh pcjaacjeni yatna u'jrra, cyte judiwe'sh vite' judiumeesatyva Dyus yuwe's pta'shi'c Dyus jīi cnayya'.

<sup>5</sup>Silas Timoteo yacj Macedonia quiweju pa'tje', Pablo' vite mjīia's nvijrra, Dyus yuwe pta'shwa'tje yuurrāac yuju een isa, Jesusa' Dyus tashuj yuusa Cristo yuj yu'c jīna judiwe'shtyi caajiyu'jna. <sup>6</sup>Nava tyāawe'sha' tyā'wē pta'shni's jypeejymetja'w jīrra ajtsena wechwa'ja's uytyi. Atsa' Pablo':

—Andya' yuuwemeetj, i'cue'shtyi pta'sh yā'tj. Atsa' yuuwesa' i'cue'shi'cue peecy uuwa'ja's pacuena ūspa'ga jīna tyajy atjni rop'a's ya'tatac. Sa' tyā'wē yūupa'ga āchja' u'juetstju judiu ji'jmēe vite nasaty pta'shya' jīc.

<sup>7</sup>Tyā'jīna'va judiwe'sh pcjaacjeni yatuj casejna'va, teech pitstjē'j Justo yaasesa yatnac u'j, judiwe'sh pcjaacjeni yat pucateyrrāa. Tyāa pitstjē'ja' Dyusna neewe'wena fi'nzesac yu'. <sup>8</sup>Tyājū judiwe'sh pcjaacjeni yattewe'sh npiitstjē'jsa Crispo' tyajy ūuste Jesusa's nwēese'jya' yajcyu pety tyajy yattewe'sh yā'jrra jyuca. Tyā'wēy Corintotewe'shva wala cujsa Cristo's jiyurra ūuste jypa'gaty yu'te ya'bautisāyna.

<sup>9</sup>Tyāa e'su' Jesusa' teech custe na'jīnac vyaarra we'we Pablo's:

—Wej yujva ũucjmée Dyus yuwe's mpeeta'sh. Tyā'wēme', naa chjambte andyna nwēese'jwa'jsa wala ũs írráata'. <sup>10</sup>Tyāa pa'ga andya' indy yacj pi'cyna ũstju, atsa' quim yujva indya's icjya' yu' ājameetyna.

<sup>11</sup>Tyā'jyā'tje', Pablo' Corinto chjambte tyāawe'sh cshavyte Dyus yuwe's caapiya'jna ũsu'c añu y medio ājpcach.

<sup>12</sup>Nava Acaya quiwete ne'jue'sh Galión ensu' judiuwe'sha' Pablo's ajtserra cjuēs tashte jyūna u'jty. <sup>13</sup>Sa' na'jīnaty pta'sh ne'jue'sha's:

—Dyusa's nwēese'jwa'ja's ley jycaaja'c tyāa jycaajni' casejrra Dyusa's fiy nwēese'jwa'ja'scu caapiya'ja' naa pitstjē'ja' jīte', <sup>14</sup>Pablo pasya'vagachja', ne'jue'sh Galión cjuē'y judiuwe'shtyi we'wec:

—Yuwe ewmeesa's andya's pāatyji'cjetsvatsa', pu'chjivá'nja i'cue'sh pāatyji'cjni's. <sup>15</sup>Nava i'cue'sh pwe'sh fi'nzeni leyrrá' atsa' tyā'sa' i'cue'sh pwe'sh mpjeu'jwe. Andya' tyāasu' tjengu ji'pjmeetj jīrra, <sup>16</sup>tyajū eca cutyi'cj. <sup>17</sup>Atsa' judiuwe'sh pcjaacjeni yatte npiitstjē'jsa Sostenesa's uwerra, pāpaty griegowe'sh jyucaysa ne'jue'sh dyi'pte. Nava Galiona' cuch ma'jīme'.

### **Pablo Dyus yuwe's pta'shya' qui' casejc naa yacja' tecj us**

<sup>18</sup>Tyā'wēteva, Pablo' wala cuj en ũsu'c cyte. Tyāa e'suc cyte yacjtjē'jwe'shrráaty nvijtrra, Siria quiwen u'jwal' ji'pju barcote cjēerra Priscila Aquila yā'jrra. Tyāa dyl'j u'juetsrra', Cencrea chjambte pa'jrra barcote cjēemey tyajy dycjasa's jyuca ctyiindyi'c. Dyus yacj yuurráa fi'nzewa'ja's Dyus yacj puuty we'wenac tyā'wē yūu. <sup>19</sup>Tyajū' Efeso chjambte pa'jrra', Pablo' Priscila Aquilawe'shtyi nvijtna'va, judiuwe'sh pcjaacjeni yatna u'cj, cyte judiuwe'shtyi Dyus yuwe's caajiyu'jya'. <sup>20</sup>Atsa' tyāawe'sha' wala pytjaa we'wety cuj en ũscajn. Nava Pablo' cytey yuumée, <sup>21</sup>tyajū qui' casejc na'jīrra:

—Jerusalente fiesta u'puya'va' cyte ũswa'j ji'ptju. Nava qui' shawendu'nja i'cue'shtyi tjengya', Dyus ma'wē jyjtjāaste' jīna we'werra, Efeso chjambuj barcote cjēerra u'cj. <sup>22</sup>Sa' Cesarea chjambte pa'jrra', Jerusalennac u'j cyte pcjaacjesawe'shtyi wechaya'. Tyajū' Antioquía chjambnac u'j. <sup>23</sup>Cyte manz en ũsrrarráa, tyajū qui' casejc Galacia Frigia quiwesu nyafii pta'shni'su jyuca pecūjya', Dyus yacj fi'nzesawe'shtyi cchjāachja'jna.

### **Efeso chjambte Apolos Dyus yuwe's pta'shni**

<sup>24</sup>Tyāa ensu' teech judiu Apolos yaasesa Alejandría chjambuwe'sh pa'cj Efeso chjambte, Dyus libru Moises fi'jni's ew jiisa caapiya'jya' shiingmeesa. <sup>25</sup>Sa' Jesucristo quimteva pta'shni jiic yu', tyāasac Juan yu'te bautisāynirráana jiirrava tyajy jiyuni yu'sa' jypumbamée caapiya'ja'. <sup>26</sup>Apolosa' judiuwe'sh pcjaacjeni yatte u'carra shiingmeec pta'shi'. Atsa' Priscila Aquilawe'sh jiyurra', tyāa Apolos tyā'srráa fii pe'jna

u'jrra, jweeírráaty ew pta'sh Jesucristo yacj fi'nzewa'ja's jyuca. <sup>27</sup>Atsa' Apolosa' Acaya quiwen u'juetste!, yacjtjê'jwe'sha' u'jwa'ja's pu'chrra teech carta fi'jty Acayate yacjtjê'jwe'sh wa'lmée jypa'gacajn. Tyā'wē Acayate pa'jrra', wala pu'chcu Dyus peeygājrra nwe'wenisaty na'wē yūuna: <sup>28</sup>Jesusa' Dyus tashuj yuusa Cristo yuj yu'c, i'cue'sh ūytjasni tyā'sna i'cue judiwe'sh jypumba jīnac pta'shi', Dyus librute ma'wē fi'jni ūsna tyāa yacj caaja'nda'jna.

### Efeso chjambte Pablo pa'jni

**19** <sup>1</sup>Apolosa' Corinto chjambte ūspcachja', Pablo' yatscjēy pecūjni quiwesu pa'jna u'jrra Efeso chjambtec pa'j. Cytea' Jesucristo's iiwēse'jsa yacj puuty uyrra', <sup>2</sup>na'wēc pējy:

—I'cue'sha' Jesucristo's jiyunijū' ¿Dyus Espiritu's jypa'gacue'? jīte!, na'wēty pas:

—Dyus Espiritu's naa quiwete caajnic yuu jīnirráa yujnava iiwēse'jmeetja'w cue'sha'.

<sup>3</sup>Tyajū' Pablo' pējyca:

—I'cue'sha' ¿quīj yūuya' sūjrracue ya'bautisāy? jīte!, tyāawe'sh pasrra':

—Juan pta'shrra': Ya'bautisāywa'ja' jīc atsráatja'w ya'bautisāy jīty.

<sup>4</sup>Tyajū' Pablo' na'wēc pta'sh:

—Juana' yu'te bautisāyca pcaltyi nvjtrra peena yu' pcalte fi'nzemeene'cue, Dyus tashuj yuusa Cristo andy e'ste yuja' tyā'sna jypa'gaya' jīrra bautisāysac yu' jīte!, <sup>5</sup>tyāawe'sha' ya'bautisāytyi Jesusa's nwēese'jya' sūjrra. <sup>6</sup>Tyajū' Pablo' tyāawe'sh dyictjesu peequinzerra Dyusa's neewe'wete!, Dyus Espiritu' tyāawe'sh ūuste cjēec. Atsa' vite yuweju we'weya' ājawa'ja's jypa'gaty, sa' Dyus quīj yūuya'vateva dyiicjēy pta'shya' ājaty. <sup>7</sup>Tyā'wē yūusa' doce pitstjē'jty yu'.

<sup>8</sup>Pablo' cyte ūsrra' judiwe'sh pcjaacjeni yatna u'jna nescu yu' tecj a'tepcach. Sa' nasaty ewcu caajiyu'ju' Dyus jycaajwa'j ena's. <sup>9</sup>Nava vite yu' tyā'wē pta'shni's wēse'j wēemeerra, atsewe'wety nasaa cshavyte. Atsa' Pablo' tyāawe'sh tashuj tyuteerra Jesucristo's jypa'gasawe'shtyi pe'jna u'cj Tiranno caapiya'jni yatna, sa' cyte' een isac pta'shi' e'nz añupcach. <sup>10</sup>Atsa' Asia quiwesu u'psa jyucaysa jiyuty judiu vite' judiumeesava Jesus caapiya'jni's. <sup>11</sup>Tyajū' Dyus pu'chte!, Pablo' nuycatyjil'c quīj weete ātsa'satyva jyuca. <sup>12</sup>Tyā'wē yūuyā'tje!, Pablo' ropa meerra' pañuelo quījrráanava jyūna u'jue'ty ātsa'sawe'sh jya'ndycajn. Atsa' tyā's jya'ndyrrarráa quīj weejuva catyjil'ty, tyā'wēy echva tyāawe'sh ūusuj caseje'ty.

<sup>13</sup>Tyā'wē yūute!, judiwe'sh dyijyuurra echtyi nasaa ūusuj cutyi'jsawe'shva Jesus yase's cysusrra echtyi cutyi'jya' na'wēty we'we':

—Pablo cysusnisa Jesus yasete jycaajatstju casejcajn jīnaty we'we'.

<sup>14</sup>Tyā'wē yūusa' sacerdote npiitstjē'j Esceva nchi'c sietesaty tyā'wē yu'.

<sup>15</sup>Macue tyā'wē we'weteva, echa' na'wēc pas:



(Hechos 19.19)



—Jesusa's jiiitj quimteva, sa' Pablo'sva iiyujtju. Nava i'cue'sh yuutyi' jiimeetj quimteva. <sup>16</sup>Tyã'ljina'va tyãa ech iiyamunisa nasa' jycaajna we'wesawe'sh cacuete äapjrra, tyãawe'sh atjni ropaty sundena cpã'vitna yüute!, tyãawe'sha' üpjna u'ljty süpyrráa. <sup>17</sup>Tyã'wë yüuni's Efeso chjambte üssa judiuwe'sh vite! judiumesava jiyurra' Jesus yase's cysusya' wala üucjtyi, sa' Jesusa's wechanarráaty fi'nze!.

<sup>18</sup>Tyajú' Pablo pta'shni' ewsa yujna sùjrra maanzcuëesava utyaaty tyãawe'sh ewmëe yüuna fi'nzeni's äate pta'shna. <sup>19</sup>Atsa' tyã'wëy dyijyuuna fi'nzesava jyucay tyãawe'sh libru ewmeesaty jyüna pa'ljrra', jyucaysa dyi'pte cambtyi. Tyãa libru' jyucarraj yu' cincuenta mil peso äjty pa'gasa yu'. <sup>20</sup>Tyã'wë yüute!, Dyus yuwe' jweeifrráac chjächja walaana u'j.

<sup>21</sup>Tyãa e'su', Pablo' Jerusalenna u'juetsrra', Macedonia Acaya quiwesu pa'ljna u'jya'c yajcy. Sa' Jerusalenuj Roma chjambnava u'jue'nja sùjnac yajcy. <sup>22</sup>Tyajú' Macedonia quiwen caacj tyã'sna pu'chna u'ljusa Timoteo vite! Erasto tyãawe'sh e'nzsaty. Nava tyãa yu' nee Asia quiwete üsu'c manz en.

### Efeso chjambte nasa üuschani

<sup>23</sup>Tyãn ensu' wala seena' sustyi Dyus yuwe's ajtserrarráa. <sup>24</sup>Tyãa yuwe quiissa yu' Demetrio vyyu chijme's dyus Diana üsni yat na'wë pjeu'ljrra tyãa yacj mjüisaty wala vyyu caacnayu'ljsac tyã'wë yüu. <sup>25</sup>Sa' tyãa yacj mjüisa vite! tyãa na'wëy pjeu'ljsatyva jyuca pcjacjrra na'ljic:

—I'cue'sha' jii i'cue na'wë mjüirra' quij yujva peejymetja'w vyyu uyu'. <sup>26</sup>Nava i'cue'sha' iiwëse'ljne'cue Pablo jïnisa' naa chjamb Efesoterráamëe, Asia quiwete msuuva nasaty! jyuca tyajy ju'ngu tupjitsa', tyã'wë pitstjël'jwe'sh pjeu'jni dyusa' ityimeesata' jïrra. <sup>27</sup>Na'sa' mpa'yajcywe. Tyã'wë yüumeete!, cue'sh mjüinirráa vitumëe, dyus Diana üsni yat tyacue wala jytujtjesa yuu vituna. Atsa' Asia quiwetewe'sh jwee vite quiwetewe'shva dyus Diana tyacue zhichcuesa's jwee yu' nwëese'ljmeetyna.

<sup>28</sup>Tyã'ljina we'wete!, wala üusacharra na'ljïnaty sus we'we:

—¡Efeso chjambte dyus Diana yuurráa maateva jytjaacue jytujtjesa! jïnaty sus. <sup>29</sup>Atsa' tyãa chjambtewe'sh jyuca üusacharra e'nz pitstjël' Macedoniajüwe'sh Pablo's pi'cyna yuusa Gayo Aristarco tyãawe'shrráaty uwerra wenzhna u'ljty chjambte tyãawe'sh üsnite. <sup>30</sup>Pablo' cyte u'ca wëec nasaty we'weya!. Nava cyte yacjtjël'jwe'sha' ca'gal'jmeeta!. <sup>31</sup>Tyã'wëy Pablo namicu cjuëswe'sh jytujtjesava Pablo's cuch cyte u'cacaajmeeta!. <sup>32</sup>Naapcachja' pcjaacjesa yu' quijquijva üuscha we'wena seena'ty susna üsu!. Nava cyte pcjaacje pu'chsa jwee cujsa yu' jiimeety yu' quij yüupa'ga tyã'wë pcjaacjeteva. <sup>33</sup>Nava cyte üssa maafi yu' quij yüupa'ga üusachana üsteva jiisa!, teech pitstjël' Alejandro yaasesa's pta'shrra nasaa cshavyte

ucapajcyna nuycūjty we'wewa'jsa. Atsa' tyāa pitstjē'ja' shuuna' yuuwa'ja's cuseju pta'shrra judiuwe'sha' yuuwemeetja'w jīna we'we wēec. <sup>34</sup>Nava judiu írráateva jiyurra', jyucaysa qui' sus we'wety e'nz ora ājpcach na'jīna:

—¡Efeso chjambte dyus Diana yuurráa maateva jytjaacue jytujtjesa'! jīna.

<sup>35</sup>Tyajū' chjambte secretario' pejca shuuna' vitrra' na'jīc:

—Efesotewe'sh mwēese'jwe. Naa chjambte nasa' dyus Diana ūsni yata's wala jypa'yacy tjengna vite' Diana's piisanisa cieluju quīj tyā'snava tyā'wēy ew jype'jwa'jsateva jyuca jiita' maa quiwetewe'shva. <sup>36</sup>Atsa' ¿ma'wē yūurra tyā'sa' tjengmēe nvijt-ya' ājatyqui? Tyā'wē yu' yuumeetyana. Tyāa pa'ga wejy cuj yajcymēe shuuna' myuuwe. <sup>37</sup>Tyāa pa'gatey e'nz pitstjē'j i'cue'sh jyūna cūji'cue tyāawe'sha' i'cue'sh dyus Diana's suwvameeta' sa' atsewe'wenava ūsmeeta'. <sup>38</sup>Meerra' Demetrio vite' tyāa yacj mjīisawe'shrráa maa yacj iipuisarrava, pāatyjī'cjwa'j jī'pjta', tyāa pa'gatey cjuēswe'sh ūsta', atsa' tyāawe'sh tashte pāatyjī'cjya' u'juetyana, cyaj caapdyi'pu'jrra yuwe's pjeu'jutyna quījterraj yuuwesateva. <sup>39</sup>I'cue'sha' cjuēs tashtemēe i'cue'sh pwe'shrráa puuty we'wewa'j jī'pjrrava, zhichcue mpuutywe'wewe tyā'wē susmēe. <sup>40</sup>Na'wē āchj susni yuwe's gobierno' paapēyiváana atsa' seena' ewmeete neeyūuwa'tje ūstja'w, quījva yuuwemeete suspa'ga.

<sup>41</sup>Tyā'wē we'werra', caaptsu'juc tyāa susni's.

### Macedonia vite' Grecia quiwen Pablo u'jni

**20** <sup>1</sup>Yuwe susni ptsuute', Pablo' Dyus yacj fi'nzesawe'shtyi pa'yarra wala ew yu'cypejrrac tyāawe'shtyi wecharra Macedonia quiwen u'j. <sup>2</sup>Tyāa quiwesu jyuca pecūjc yacjtjē'jwe'sh ūucjwe'shte cchjāachja'jīna. Sa' tyajū' Grecia quiwenva u'cj. <sup>3</sup>Cyte tecj a'te ūsrra', barcote cjēerra Siria quiwen u'jya'vac yu'. Nava judiuwe'sh icjya'vata' tyāa dyi'tje jīni's jiyurrarráa, barcote u'jmēe chindarráa maa dyi'june' pa'j tyā'wēycu shawendya' yajcy, Macedonia quiwejuy uycjēwna. <sup>4</sup>Tyāa yacj pi'cyna u'jty Sópater Bereajuwe'sh, Aristarco vite' Segundo Tesalonicajuwe'sh vite' Gayo Derbejuwe'sh vite' Timoteo vite' Tíquico Trófimo tyāawe'sha' Asia quiwetewe'shtyi yu'. <sup>5</sup>Tyāa yacjtjē'jwe'sha' dyi'j pyājū yatste u'jrra Troas chjambtety cue'shtyi ūytjas. <sup>6</sup>Pan levadura jī'pjmēe ū'ni fiesta scjēwniitetja'w cue'sha' casej, Filipos chjambuj barcote cjēerra, sa' tajts ente' cpajcytja'w Troas chjambte. Cyte siete entja'w ūsu'.

### Troas chjambte Pablo wechaya' pa'jni

<sup>7</sup>Qui'sen ente', Dyus yacj fi'nzesawe'sh yacj pcjaacjetja'w cyterraj pcjaacjerra ū'ya'. Naapcachja' Pablo' Dyus yuwe's caapiya'cj. Tyā'wē cuscuscjē' u'jue jī'pjrra', tyach cuspyājnpcachcu pta'shna ūsu', <sup>8</sup>teech

piesate ãete wala kuj lampara pqui'tanisa ũsu'ty cytee. <sup>9</sup>Atsa' cyte teech pitstacy Eutico yaasesac ventanate cachrra u'pu'. Tyã'wẽ Pablo' wala jyu'j we'wete!, tyãa pitstacya' dee wẽerra dejna u'píi saapajcyu yat ãe walaju, atsa' uuniisa'styi quiiis. <sup>10</sup>Tyã'wẽ yũute!, Pablo' sa'jrra, tyãa uusa's psha'ndrra na'wẽc we'we:

—Yacjtjẽ'jwe'sh, ñusnuwe, qui' ityi yuuc jĩnac pta'sh. <sup>11</sup>Tyajũ' Pablo' qui' ãe yatte tejcarra Santa Cena's puutscu. Tyã'wẽ yũurra cjicjyna sějpcach pta'shrrac u'j. <sup>12</sup>Tyãa pitstacya' qui' ityi yuute!, pe'jna u'jrra jyucaysa wala wechana neeyũuty.

### Troas chjambu Mileto chjambna u'jni

<sup>13</sup>Cue'sha' barcote cjẽerra yatste u'tja'w Asón chjambna, Pablo's cyte ũytjasya'. Naapcachja' tyã' chindajc u'j. <sup>14</sup>Asón chjambujc cue'sh yacj barcote cjẽe, atsa' tyajũtja'w Mitilene chjambna u'j. <sup>15</sup>Tyajũ qui' casejrra vite encjẽ' Quío quiwe pucasutja'w scjẽw. Sa' vite encjẽ' Samos quiwetec barco' dundte utyaa. Tyajũ qui' u'jrra', teech ajte Trogilio yaasesate pa'jrratja'w jycaase. Tyajũ' vite encjẽ' qui' u'jrra' Mileto chjambte pa'tja'w. <sup>16</sup>Pablo' Asia quiwete jytjẽyuyua'mée, Efeso chjambte u'came', Jerusalemte dund pa'jrra Pentecostes fiestate ũsya' sũjrra.

### Mileto chjambu Efesotewe'shtyi pa'yani

<sup>17</sup>Sa' Mileto chjambte pa'jrra', Efeso chjambte ancianowe'shtyi pa'yac na'wẽ we'weya!:

<sup>18</sup>—Andya' Asia quiwete nyafyrraj pa'jĩi quĩjtca yũuna fi'nze ãchpcach tyã'sa' i'cue'sha' jii i'cue. <sup>19</sup>Judiuwe'sh atsepa'ga tyacue wala ñuswa'j en pa'tjeva, Jesucristo's een isa selpiina bagachteva i'cue'shtyi ũ'ne pety cjacj pu'chna nestju yu' quim yujnava iijewech we'wemée. <sup>20</sup>I'cue'shtyi selpiwa'jsa Dyus yuwe's pta'shmée yu' yuumée, nasaa cshavysu yat-suva caapiya'jna nestju yu'. <sup>21</sup>Tyã'wẽy judiuwe'sh vite! judiu jil'mée tyãawe'shtyiva jyucaysaty pta'shtju: Dyus tashte shawendya' pcaltyi nvijrra cue'shtyi jype'jsa Jesucristo'sva ũuste miipa'gawe jĩna. <sup>22</sup>Ãchja' u'juetstju Jerusalemte Espiritu caajni. Nava jiiimée u'juetstju cyte jwee quijrra yuune'tjeva. <sup>23</sup>Naasáa na'wẽ yuurráa jiiitj: maa chjambte u'tjeva Dyus Espiritu' pta'shna nescu yu' carcelte cyuupjni wala ñuswa'j jip'jngu jĩna. <sup>24</sup>Nava tyã'sa' yaaquĩtsmeetj, sa' andy uuwa'ja's yujva ũucju'lsmeetj. Jesucristo neewe'wec Dyus peeygãani's tyã'sna uu entepcach wechana pta'shna fi'nzevatsrráa, tyã'wẽena sũju'tj.

<sup>25</sup>Ayte i'cue'sh yacj ũsrra' Dyus jycaajwa'j ena's pta'shtju tyã's wẽse'jsa aytewe'sha' andya's ãchjuyã'ja' peena yu' uymeene'cue sũju'tj. <sup>26</sup>Nava andya' i'cue'shtyi caapiya'jyã'tj na' yuuwemeetj, <sup>27</sup>tyãa pa'gatey Dyus jytjãasni's paatste nvijtmée jyuca ãaterrarráatj pta'sh naa pa'ga. <sup>28</sup>Atsa' ãchja' peequíi ya'mpa'yajcywe, tyã'wẽy Jesucristo ee pcawrra weynisa

Dyus luuchtyiva ew jype'jna, Dyus Espiritu' i'cue'shtyic tjengwa'jsa nvijit naa pa'ga. <sup>29</sup>Jiitj andy u'tje', vite pa'jatyna Dyus yacj fi'nzesawe'shtyi iviitu wēena, shi'j weesweeva ma'wēta piishaaty iviitu' tyā'wēy yūuya'. <sup>30</sup>Jypa'yacymeerra', i'cue'sh pwe'shīiva casejene'cue isasa's pta'shipcachte caypumba'jwa'jrrá's pta'shna Dyus yacj fi'nzesaty caypumba'jna. <sup>31</sup>I'cue'sha' miijajcywe, andya' tecj añutj teehsa na'wērraj yu'cypejna ūsu' en pety cus yā'jrra ū'ne pety cjajc.

<sup>32</sup>Āchja' yacjtjē'jwe'shtyi Dyusa's neewe'werra tyajy cusete nviitutstju tyajy caapiya'jni's pechcanamée fi'nzecajn, tyāa pa'gatey tyajy yuwe' cchjāachja'jna wechana caafi'nze'jrra cielute tyajy nwe'wenisa jyucaysa yacj ūswa'ja'sva ūsya' ājawa'jsa'. <sup>33</sup>Andya' i'cue'sh yacj ūsra', vyu, ropa, tyā'wēsa pees jytjāasna fi'nzemeetj quim yujnava. <sup>34</sup>I'cue'sha' ew jii i'cue tyā'wē yūumée, andy cuseju mjīirratj quij peejini'sva uyu', vite' andy yacj u'jusawe'sh jīiva tyā'wēy. <sup>35</sup>Tyā'wē vite jypeejysaty pu'chwa'ja's caapiya'jnatj fi'nze bagachteva. Tyā'wē yūucajnīc Jesucristova na'jī': Peessa yacj wejy wecha yuja' jypa'gasate jytjaacue jī'c.

<sup>36</sup>Pablo' we'wena jyā'jrra', jyucaysa yacj peejyūcuerra Dyus yacj puuty we'wec. <sup>37</sup>Tyajū' jyucaysa ū'nena psha'ndrra Pablo's wechaty. <sup>38</sup>Tyā'wē peena yu' uymeene'cue jīte', wala ūsna ūsu'ty, sa' pi'cyna u'jty barcote cjēepcach.

### Jerusalenna Pablo u'jni

**21** <sup>1</sup>Yacjtjē'jwe'shtyi nvijtrra, barcote cjēena'va teejwend u'tja'w teech ajte Cos yaasesate. Sa' vite encjē' Rodas quiwete pa'tja'w. Tyāajū Pátara chjambnatja'w u'j. <sup>2</sup>Pátara chjambte pa'jrra, teech barco uytja'w Fenicia quiwen u'jsa, tyāatetja'w cjēerra u'j. <sup>3</sup>Chipre quiwe's uynatja'w scjēw, tyā' jembu ju'nguc neeyūu. Tyā'wē u'jrratja'w Siria quiwete palj. Sa' Tiro chjambte u'catja'w barco' cyte carga spāashwa'cj jī'pju' naa pa'ga. <sup>4</sup>Cyte' Cristo's nwēese'jsawe'shtyitja'w uy, sa' siete entja'w ūsu' tyāawe'sh yacj. Atsa' tyāawe'shtyi Dyus Espiritu caajiyu'tje', Pablo's pta'shtyi Jerusalenna u'jmeene'nga jīna. <sup>5</sup>Tyā'wēteva, siete en scjēuutspcachja', casejtja'w. Atsa' Cristo's nwēese'jsawe'sh jyucaysa nyuuwe'sh pety luuch yā'jrra pi'cyna yuwe'ty chjamb ecaju casejpcach. Sa' cyte ĩcj pucate peejyūcuerra Dyus yacj puuty we'werra, <sup>6</sup>psha'ndna wechana'va barcote cjēetja'w. Naapcachja' tyāawe'sha' shawendtyi yatna.

<sup>7</sup>Cue'sha' Tiro chjambuj barcote u'jrra, Tolemaida chjambtetja'w pa'j. Cyte teech entja'w ūsu' yacjtjē'jwe'shtyi wechana. <sup>8</sup>Vite cuscuscjē' Pablo vite' tyāa yacj u'jusa yā'jrra casejtja'w Cesarea chjambna u'jya'. Cyte pa'jrra', Felipe yatna u'jrra cytetja'w dej. Tyāa yu' Pedro tyjityjcu siete diácono tyāatewe'shcu yu' Jesucristo caapiya'jni's jypa'garra pta'shna pecūjsa. <sup>9</sup>Tyāa Felipe' pajnz niisa cna'sasac jī'pju', Dyus we'weni's pta'shsa. <sup>10</sup>Cyte manz en ūspcachja', teech pitstjē'j pa'cj, Agabo yaasesa

Judea quiwejuwe'sh, Dyus quiŷ yũuya'vateva dyiicjĕy pta'shsa. <sup>11</sup>Tyā' cue'shtyi puuty uyrra', Pablo jytundni's pĕjyrra peequírráa chinda pety cuse yacj ya'jytundrra na'wĕc we'we:

—Dyus Espiritu' pta'shi'c, Jerusalente judiuwe'sha' naa jytundni namu's na'wĕ tundrra vite nasaty ducjetyna jĭc.

<sup>12</sup>Tyā'jĭni's wĕse'jrra', cue'sh vite' Cesareatewe'sh yā'jrra wala neevishatja'w Pablo's Jerusalenna u'cjamen. <sup>13</sup>Nava Pablo' na'wĕc pas:

—¿Quijya'cue tyacue ñusna ũ'ne', andyna cjaawāshi'j wĕerra? Andya' Jesucristo's selpiipa'ga tundnirráa yuumée, Jerusalente uuwa'j ma'c yuu nava tyā'sa' ũucju'tsmeetj jĭc.

<sup>14</sup>Neevishaya' ājameeyā'jrra', Dyus ma'wĕ jytjāaste' cytey yuuna jĭnarráatja'w we'we.

<sup>15</sup>Tyāa e'su', pjeu'jna'va Jerusalenna u'tja'w. <sup>16</sup>Atsa' Cesareate yacjtjĕ'jwe'sh pi'cyna yuwe'ty, vite' tyāawe'sh yacj teech pitstjĕ'j Chipre quiwejuwe'sh, wala tyachyā'j Dyus yacj fi'nzesa Mnasón yaasesava yuwe'c. Atsa' cue'sha' tyajy yatte de'jya'tja'w puuty we'we.

#### Pablo Jerusalente pa'jrra Jacobo tashna u'jni

<sup>17</sup>Jerusalente pa'tje', cyte yacjtjĕ'jwe'sha' wala wechana jypa'gaty.

<sup>18</sup>Vite encjĕ' Pablo' cue'sh yacj u'cj Jacobo yatna pa'jya', atsa' cytea' ancianowe'sh jyucaysaty ũsu'. <sup>19</sup>Pablo' wechana jyā'jrra', pta'shcu judiu jĭ'jmée vite nasa cshavysuva Dyus yuwe's pta'shte', tyāawe'shtyi Dyus ma'wĕ yũuni'sva jyuca. <sup>20</sup>Atsa' wĕse'jrra', Dyusa's wala wecharra na'wĕty pta'sh Pablo's:

—Yacjtjĕ'j, indya' jĭiyā'jne'nga judiu jĭ'jwe'sh wala cujsa Jesus caapiya'jni's jypa'gasa ũsta', sa' tyāawe'sha' Moises leya's nviitmeete ewna jĭ'ty. <sup>21</sup>Tyāawe'sha' na'jĭni'sta jiyu: Indya' judiuwe'sh jyucaysaty vite quiwejuwe'shtyi caapiya'jrra Moises jycaajni's nwĕese'jmeene'cue, sa' i'cue'sh luuchtyiva circuncidāimeene'cue, quĭj yujnava cytey yuuwa'jme', tyā'jĭnac pta'shi' jĭni's jiita'. <sup>22</sup>Sa' iindy pa'jni's jiyurra', tyāawe'sha' indya's wĕse'jya' pcjaacjetyna, atsa' ¿quĭj yũucytja'w? <sup>23</sup>Wejyva na'wĕ yũune'nga: Ayte pajnz pitstjĕ'j ũsta'. Tyāawe'sha' Dyus yatte u'caya' ājawa'ja's Moises ley jycaaja'c tyā'sa' cytey yuuya' ũsta'. <sup>24</sup>Atsa' indya' tyāawe'shtyi dyuus yatna pe'jna u'jrra ley jycaajni qui'swalja's cytey cyu'ju'june'nga pety indy yā'jrra. Sa' cyte ducjwalja'sva indyrrarráa deweene'nga. Tyajū' tyāawe'sha' dycjasa's ctyiindy'jityna indyva tyā'wĕy. Tyā'wĕ leya's cytey yuute', maava jiyutyna tyā'wĕ Pablo' leya's nviitwalja' jĭnac jycaaja' jĭrra' ĩshijja'ne'ta sũjna. <sup>25</sup>Nava judiu jĭ'jmée vite nasarrava Jesus caapiya'jni's jypa'gasawe'sh yu' ley jycaajni's cytey yuuwa'j jĭ'pmeeta'. Tyāawe'shtyi' cue'sha' pta'shna fi'jyā'tja'w na'wĕ yũuwa'ja's: Dyus ĩtyimeesaty wechaya' tajcy icjni chicha's ũ'wa'jme', eenava ũ'wa'jme', tajcya's tjucrra

icjnisa chicha'sva ũ'wa'jme', sa' ptammeesa' pcal yūuna fi'nzewa'jme' jīna pta'shnisarrá's cytey yuuwa'jsata' jity.

### Dyuus yatte Pablo's tundni

<sup>26</sup>Tyajū' Pablo' tyāa pajnz pitstjē'jty pe'jna u'jrra', cuscus encjē' ley jycaajni's jyuca cytey yuurrac dyuus yat dyiite u'ca quīj entepcach qui'sya'varrava tyāaty pta'shya'.

<sup>27</sup>Sa' siete en qui'swa'jty jyuca jyā'jatspcachja', Asia quiwejuwe'sh judiuwe'sh pa'jrra Pablo's dyuus yatte uyrra', nasa jyucaysaty caaūuscha'jna'va Pablo's tundrra <sup>28</sup>na'wēty sus we'we:

—Israelwe'sh, mpu'chwe. Naa pitstjē'jīic msuuva jyuca nasa jyucaysaty caapiya'jna pecūju' cue'sh jil'jty atsewe'wena, Moises leynava tyā'wēy. Sa' dyuus yatnava atsewe'we'c. Sa' tyā'wērrāa yūumée, āchja' judiu jil'jmée griegowe'shtyiva dyuus yat dyiite ca'gac canzh vitna jī'ty.

<sup>29</sup>Efeso chjambuwe'sh Trófimo yacj Pablo' Jerusalente ũste ne'ta uy, tyāasaty dyuus yat dyiite ca'ga'jne' sūjrra tyā'jīna we'we'.

<sup>30</sup>Tyā'jīna pta'shni seena' suste', nasa' wala dund cūjrra Pablo's tundrra dyuus yat ecaju wenzhna cutyi'jitspcachja', vitya's apjtyi. <sup>31</sup>Icya'vaty yu', nava comandante' jiyuc Jerusalem chjambtewe'sh seena' susna ũsta'



(Hechos 22.24)

jīni's. <sup>32</sup>Tyājū' comandante' soldau vite' tyāawe'sh pwe'sh jytujtjesaty pcjajrra wuwurráaty cūj nasa susna ūsnite. Atsa' comandante vite' soldauwe'shtyi uyrra', Pablo's icjmeeta'. <sup>33</sup>Tyājū' comandante cūjrra Pablo's e'nz cadenajuc tundcaaj. Tyā'wē yūurrac pējy ¿quimna sa' quījga yūu? jīna. <sup>34</sup>Nava nasa tyā'wē jyucaysa sus we'wena ūste', comandante jiyuya' ājameerra', cuartel yatna jyūna u'cjaacj. <sup>35</sup>Cuartel yat vityte cūjnarráa soldauwe'sha' Pablo's yacjrraty u'j, tyā'wē nasa' icj wēesa e'ste neeuna:

<sup>36</sup>—Naa pitstjē'ja's icjwa'ja' jīna sus we'wena yuupa'ga.

### Pablo cuartel vityuj we'weni

<sup>37</sup>Pablo's cuartel yatte ca'ga'jatste', tyā' na'wēc we'we griego yuweju comandante's:

—¿Manz yuwerráava cwe'we'jmeema'ng? jīte', comandante pasrra':

—Indya' ¿griegová'nga? <sup>38</sup>Tyā'wērra' ¿nyafí entey teech Egiptujuwe'sh na'wē nasa icjsarrarráaty cuatro mil āj nasa u'pnimeete pcjajrra puui quiiscu tyāameene'nga? jīte', <sup>39</sup>Pablo' na'jīc:

—Andya' judiutj. Cilicia quiwete Tarso chjamb jytujtjesatewe'shtju. Atsa' naa nasaty we'wewa'ja's ūsune'nga jīte', <sup>40</sup>comandante' ūytjascu. Naapcachja' Pablo' cuartel vityte yujuna'va cuseju shuuna' yuua'ja's pta'shte', jyuca shuuna' yuuty, atsa' na'wēc we'we hebreo yuweju:

**22** <sup>1</sup>—Yacjtjē'l vite' tjē'jsawe'sh, mwēese'jwe andy we'weni's jīte', <sup>2</sup>hebreo yuweju we'weni's wēse'jrra', wejtyty shuuna' yuu. Tyājū' Pablo' na'jīc:

<sup>3</sup>—Andya' judiutj, Cilicia quiwete Tarso chjambte upysa. Nava ayte Jerusalente Gamaliel caapiya'jni walasaatj, cue'sh yatsgawe'sh leya's wala ew nwēese'jna. Bagachteva Dyusa's ūusuj jyucatj selpiina fi'nze', naa ente i'cue'sh ma'wēcue selpi' tyā'wēy. <sup>4</sup>Andya' nyafí' Jesus caapiya'jni's nwēese'jsaty ajtserra quicje'jna vitetyi' tundrra jyūna u'tj pitstjē'l pety u'y yā'jrra carcelte tyajya'. <sup>5</sup>Sacerdote npiitstjē'l vite' judiu ntjē'jsawe'sh jyucaysa jiita' tyā'wē Jesucristo yacj fi'nzesaty tundwa'ja's Damascote yacjtjē'l judiuwe'shtyi pta'shna carta pēyni's. Tyā'wē yūurratj u'j tundrra ay Jerusalente nuypa'jrra castigāyya'.

**Pablo' Dyus yacj fi'nzeya' utyaatsrra tyāa ma'wēne' yūu tyā'sna pta'shni**

(Hch. 9.1-19; 26.12-18)

<sup>6</sup>Nava andya' ēepyāj Damasco chjambte utyaana pa'jatspcachja', naa dundte ēe walaju eenac cweetj andy dyi'pte uymeenus. <sup>7</sup>Atsa' quiwega weteetspcachja', na'wēc we'weni ptjūuse: Saulo, Saulo, ¿quīj yūupa'ganga andya's ajtserra pcyuuya' pacué? jīte', <sup>8</sup>pējytju: Indya' ¿quimnga? Tyājū' na'wēc pta'sh: Indy na'wē ajtserra pcyuuya' pacue'ng tyāatj Jesus



Nasaretjuwe'sh jīc. <sup>9</sup>Atsa' andy yacj u'jsa' tyā'wē eena' cweetjni's uyrra wala ūucjtyi. Nava andya's we'weni yu'sa' jiyumeeta'. <sup>10</sup>Tyājū' andya' na'ljīnatj we'we: ¿Quijnga yūu jytjāasu'? jīte', Quiiterra Damascon me'lj, cyte ya'pta'shina quij yūuwa'ja'sva jīnac jycaaj. <sup>11</sup>Tyā'wē eena' cweetjniijūrrāa uyya' ājāmeete', andy yacj pi'cyna u'jsawe'sha' andya's pu'quisrra u'jty Damascote pa'lj.

<sup>12</sup>Cytea' teech pitstjē'j u'pu'c Ananias yaasesa, Moises leya's jyuca nwēese'jsa. Tyā'wē nwēese'pja'gaty cyte judiwe'sha' tyāa Ananiasa's wala jytujtjesa' jīna we'we'. <sup>13</sup>Tyāa Ananiasa' andya's tjengya' pa'jrra', na'wēc we'we: Yacjtjē'j Saulo, indya' uyya' ājawa'ja's qui' mpa'ga jītspcachja', tjengrra' uyya' ājatj. <sup>14</sup>Tyājū' na'wēc pta'sh: Cue'sh yatsgawe'shtyi jype'jsa Dyusa' indya's nyafiteycu tyjityj tyā'sna nwēese'jwa'jsa, sa' quij pcal yujva ji'pjmeesa's yafyju uyrra tyajy yuweju we'weni'sva wēse'jwa'jsa. <sup>15</sup>Āchja' indya' naa quiwete jyucaysa dyi'pte Dyus yuwe's pta'shya' u'juene'nga sa' ma'wērrajne'nga uyna wēse'jna yuu tyā'snava pta'shya'. <sup>16</sup>Sa' ¿qui'jya'rrāa tyacue wala jytjēeyuuqui'ng? Āchji quiitena'va yu'te ya'bautisāyrra Jesucristo's ūusuj jyuca miijajcy iindy pcal peltunāyni yuucajn jīnac jycaaj.

#### **Judiu jil'mée vite nasaty Dyus yuwe's pta'shya' caajni's Pablo pta'shni**

<sup>17</sup>Tyāa e'su' Jerusalenna qui' shawendrra dyuus yatna Dyus yacj puuty we'weya' u'tje', Jesusa' andya's cyte vyaarra, <sup>18</sup>na'wēc we'we: Jerusalenuj dundrrāa mcaasej. Tyā'wēme', indya' macue pta'shteva nwēese'jmeetyna jīte', <sup>19</sup>na'wētj pas: Andy tyā'wē judiwe'sh pcjaacjeni yat-su u'jrra cysū indyna neewe'wesaty carcelte tyajna vitety' cyuupjsatj. <sup>20</sup>Sa' indyna neewe'wena selpisáa Esteban eea's pcawuutsteva uynatj ūsu', tyā'wē yūuni ewna sūjna. Sa' icjsawe'sh atyjtyi tjengsatj yu' jīteva, <sup>21</sup>Jesusa' na'ljīnac jycaaj: Me'jrrāa, andya' jyu'j caajya'vatj judiu jil'mée vite nasaty pta'shya' jīc.

#### **Pablo's comandante nwe'weni**

<sup>22</sup>Tyā'wē judiu jil'mée vite nasaty pta'shya' jīni's wēse'jrraty, qui' ūusachana na'ljīna sus we'we:

—Tyāa pitstjē'ja's icjterrāa ewna. Peena yu' ūtyi fi'nzemeena jī'ty.

<sup>23</sup>Tyā'wē sus we'wena, tyāawe'sh atyjtyi ēete wāatajna quiwe's pachrra tyā'wēy yuuterrāa, <sup>24</sup>comandante' Pablo's cuartel yatte ca'ga'cjaajrra pechuucuecaacj, tyā'wē yūuna cjaawāshi'jrrac pējyya'va yu' quij yūupa'ga nasa' tyā'wē wala ūusachana ajtseteva jiyuya'. <sup>25</sup>Nava tundutspcachja', Pablo' na'wēc we'we cpiitana's:

—I'cue'sha' romano nasa's pechujcuete ¿ewmañ? quij yuuweteva jiyumey.

<sup>26</sup>Tyā'wē we'wete', cpiitana' na'wēc pta'shya' u'j comandante's:

—Na'wē yūuni's mpa'yajcy. Tyā'wēme', naa pitstjē'ja' romano nasa' jīte', <sup>27</sup>comandante' Pablo tashte utyaarra pējycu:

—Isa indya' ¿romano nasa dyijngá'? jína. Atsa' Pablo pasrra':

—Tyã'wë íitj jïc.

<sup>28</sup>Tyajü' comandante we'werra':

—Andya' wala vyu ducjrrarráa romano nasa yuuna pa'tj jíte', Pablo pasrra':

—Andya' upyjíi tyãa yã'tj yu' jïc.

<sup>29</sup>Tyajü' Pablo's pechuucuewa'jsa' cuch yuumée nvijttyi. Atsa' comandante yujva tyã'wë romano nasateva jiyurra', wala üucjcu tyã'wë tundpa'ga.

### Judiu ntjê'jsawe'sh tashte Pablo's tyaa'jni we'wecajn

<sup>30</sup>Judiuwe'sha' quīj yūupa'gane'ta Pablo's atse' nava tyã'sna jiyu wëerra, cuscuscjê' comandante' jycaacj sacerdote npiitstjê'jwe'sh vite' judiu ntjê'jsawe'sh jycaacsaty pcjaacjecajn. Tyã'wë yūurrac cadenaty cjiymbrra tyãawe'sh tashte tyaj Pablo's.

**23** <sup>1</sup>Pablo' sacerdote npiitstjê'jwe'sh vite' judiu ntjê'jsawe'sh pcjaacjesaty tjengrra', na'wëc we'we:

—Yacjtjê'jwe'sh, andya' ächpcach Dyus dyi'pte jypumbatj sūjwa'j yu'sa' jipjmeetj jíte', <sup>2</sup>sacerdote npiitstjê'j Ananiasa' Pablo yuwega petya caacj pucate ij üssaty. <sup>3</sup>Atsa' Pablo' na'wëc we'we:

—Äaterráa ew we'werra' üuste yu' ewmée yaacypa'ga indya's Dyus castigaína. Indya' ley jycaajnirrá's cytey yuusatj ¿sūju'ngá'? Tyã'wërra' ¿quījya'nga andya's petyacaja'? Leya' tyã'wë jycaaja'tsme' jíte', <sup>4</sup>cyte üssa' na'wëty we'we:

—Dyusna selpisáa sacerdote npiitstjê'ja's tyã'wë wëeshuwa'j jipjmeeng jíte', <sup>5</sup>Pablo' pasrra':

—Dyusna selpisáa sacerdote npiitstjê'jna sūju'tsme'ntca. Jiivatsa', tyã'wë paswa'jmeene'tca yu'. Tyã'wë yuucajmeníic Dyus libruveva na'wë pta'shi': lindy chjambte jycaajsa's juuna' we'wenu jī'c naa pa'ga.

<sup>6</sup>Tyajü' cyte pcjaacjesawe'sha' saduceo vite' fariseowe'sh tyãawe'shtevea jiyurra', Pablo' na'wëc sus we'we:

—Yacjtjê'jwe'sh, andya' fariseo jī'j, fariseo írráatj. Uusaawe'sha' qui' ityi yuua'jsa yujta' sūjna yaacysatj. Tyãa pa'ga yuurráa andya's ewmeesa' jína üsta.

<sup>7</sup>Tyã'wë we'wete', fariseo vite' saduceowe'sh yacj tyãawe'sh pwe'sh juuna' we'werra puuty tyuteety. <sup>8</sup>(Saduceowe'sha' uusaawe'sha' qui' ityi yuutyna sūju'tsmeeta', sa' uute' nasaa üus vite' angeleswe'sh tyã'wësa üstyna sūju'tsvameeta', naapcachja' fariseowe'sha' tyã'wësa jyuca üstyna sūju'ty, tyãasaty puuty tyutee.) <sup>9</sup>Tyã'wë yūurra tyãawe'sh pwe'sh wala sustyi üuscha we'wena. Atsa' fariseowe'sh ju'ngusa ley caapiya'jsawe'sh maaíi yu' quitterra na'wëty we'we:

—Naa pitstjē'ja' ewmée yūsame!. Meerra' Dyus angel vá' yu', meerra' uusáa ūs vá' tyā'wē vyaa, nava jiimeerra' cuch we'wemeeyuga. Tyā'wēme!, jiimeerra' Dyusa's váa atsewe'wesa yu'nja'w jī'ty.

<sup>10</sup>Seena' ūsachana suste!, comandante' Pablo's icjeváatyna sūjna ūucjrra soldauty yuucáajrra, Pablo's cutyi'cjaacj pcjaacjesa cshavyu cuartel yatnay jyūna u'cjan.

<sup>11</sup>Tyāa custe!, Jesucristo' Pablo's vyaarra na'wēc we'we:

—Pablo, ūucjnu. Ay Jerusalente na'wēng we'we andyna pta'shna, tyā'wēy we'wewa'j ji'pjngu Romateva jīc.

### Pablo's icjya' puuty we'weni

<sup>12</sup>Cuscuscjē' judiwe'sh maái yu' Pablo's icj wēesa na'wēty puuty we'we: Pablo's icjmeerra yu' quīj yujva ū'me'nja'w jīna. <sup>13</sup>Tyā'wē Pablo's icjmeerra yu' quīj yujva ū'ya'mée puuty we'wesa' cuarenta pitstjē'j jytjaacuety yu'. <sup>14</sup>Tyā'wē yūuwa'ja's puuty we'werraty u'j sacerdote npiitstjē'j vite' judiu ntjē'jsawe'sh tashna na'jīna pta'shya':

—Cue'sha' Pablo's icjmeerra yu' quīj yujva ū'me'nja'w jīnatja'w puuty we'we Dyus dyi'pte. <sup>15</sup>Atsa' āchja' i'cue'sh ntjē'jsawe'sh jyuca pcjaacjerra mpējywe comandante's: Cuscusa' Pablo's mcaaj cue'sh tashte, tyajy yuwe's jwee ew paapējy ya'vatja'w jīna. Naapcachja' cue'sha' ayte pa'ljmeyna icjya' dyi'tje yupu'nja'w jī'ty.

<sup>16</sup>Tyā'wē puuty we'wetste Pablo npe'sh nchi'c jiyurra', Pablo's pta'shya' u'cj cuartel yatna. <sup>17</sup>Atsa' Pablo' jiyurra', teech cpiitana's pa'yarra na'wēc we'we:

—Naa luucha's meen pe'jna me'j comandante tashna, tyāa yacj puuty we'wewa'j ji'pja' jīte!, <sup>18</sup>cpiitana' luucha's pe'ljrra comandante tashte cūjrra pta'shcu:

—Carcelte ūssa Pablo' andya's pa'yarra naa luucha's pe'jna caacj, ayte indy yacj puuty we'wewa'j ji'pja' jīte!, <sup>19</sup>comandante' luucha's cusete pu'quisna u'ljrra paatste pējycu:

—¿Quījnga we'we wēje'? jīte!, <sup>20</sup>luucha' pta'shcu:

—Judiwe'sha' na'wēty puuty we'we: Cuscusa' indya's pēyi'nja'w Pablo's caacjan, judiu ntjē'jsawe'sh tashna yuue's jwee ew pējyya'vatja'w jīrra. <sup>21</sup>Nava tyā'wē dyijna sūjrra Pablo's caajmeene'nga. Tyā'wēme!, pitstjē'j cuarenta jytjaacuesa Pablo's icjmeerra yu' quīj yujva ū'me'nja'w jīna Dyus dyi'pte puuty we'werra dyi'tje yupna ūsta!. Sa' indy mal'jīteva tyā'srráan ūytjasna ūsta' jīte!, <sup>22</sup>comandante' luucha's na'jīna we'werrac caaj:

—Comandante's pta'shtju jīna quim yujnava pta'shmeene'nga jīrra.

### Ne'jue'sh Felix tashte Pablo's caajni

<sup>23</sup>Tyajū' comandante' e'nz cpiitanti pa'yarra Cesarea chjambna u'jya' pjeu'cjaacj. Doscientos soldau chindarráa u'juetya, jimbatewe'sh setenta,

vite! lansa ji'pjsa doscientos, sa' ayjyu casejetya cus las nuevete. <sup>24</sup>Sa' tyā'wēy Pablo a'jwa'j jimbava pjeu'cjaacj, ne'jue'sh Felix tashte icjmée ew ducjcajn. <sup>25</sup>Tyāawe'sh yacj carta caacj na'wē fi'jrra:

<sup>26</sup>Claudio Lisias fi'jatstju ne'jue'sh Felix'a's wechana. <sup>27</sup>Naa pitstjē'ja's judiuwe'sha' carcelte tyajrra icjya'vaty yu!. Nava romano nasateva jiyurra', andya' soldau yacj u'jrra nwe'wetj. <sup>28</sup>¿Quij yūupa'gaqui'ty tyā'wē atse'? sūjrra jyūna u'tj judiuwe'sh ntjē'jsawe'sh tashna. <sup>29</sup>Atsa' tyāawe'sh ley pa'garráata tyā'wē atse!, nava icjya' yu' ājawa'jmec yu' sa' carcelte tyajya'va ājawa'jme!. <sup>30</sup>Nava Pablo's icjya' yuurráa jīna puuty we'werra yupna ūsta' jīni's jiyutj. Tyāasa iindy tashte cajtatstju. Pablo's atsesatyva we'wetj quij yūupa'gane'cue atse! nava ne'jue'sh tashte u'jrra puuty we'wene'cue jītj. Tyā'wērráatj indya's pta'shi' jīnac fi'j.

<sup>31</sup>Tyajū' soldauwe'shtyi tyā'wē jycaajyā'tje!, Pablo's pe'jna'va cusrráa u'jty Antípatris chjambna. <sup>32</sup>Cuscuscjē' soldau chindarráa u'jsa' qui' shawendtyi cuartel yatna, naapcachja' jimbatewe'sha' u'jty Pablo yacj. <sup>33</sup>Cesarea chjambte pa'jrra', carta's ūsna'va Pablonava ducjtyi ne'jue'sha's. <sup>34</sup>Tyajū' ne'jue'sha' carta's lēeyrra' pējycu Pablo's: ¿Majūwe'shnga? jīna. Sa' Ciliciajūwe'shteva jiyurra', <sup>35</sup>na'wēc we'we:

—Iindy yuuwe's jiyu'nja indyna atsesawe'sh pāatyjī'cjya' pa'tje jīc.

Tyajū' Pablo's Herodes tyaa'jni yatte cyuupjcu tjengwa'jsa tyajrra.

### Pablo ma'wēsarrava Felix tashte we'weni

**24** <sup>1</sup>Tajts ente' sacerdote npiitstjē'j Ananiasa' pa'cj Cesarea chjambte judiu ntjē'jsawe'sh yā'jrra, sa' teeche yuwee pu'chsa Tértulo yaasesa'scu pe'jrra pa'j. Tyāawe'sha' utyaaty ne'jue'sh tashte Pablo' ewmeesa' jīna pāatyjī'cjya'. <sup>2</sup>Tyajū' Pablo's nuycūjte!, Tértulo' Felix'a's pta'shcu:

—Wech u'pu'nga, ne'jue'sh. Iindy jycaajnite, mteeva wēt fi'nzena ūstja'w. <sup>3</sup>Mteeva tyā'wērrarráa wēt fi'nzena ūstja'w, Felix indy tyā'wē ew yūupa'ga. Tyāasatja'w wala wechá!. <sup>4</sup>Nava indya's jwee yu' en caavitu'jya'vameetj, dundte meen mwēese'j cue'sh we'weni's. <sup>5</sup>Naa pitstjē'ja' iiméj seena' ewmeesateva cue'sha' cpajcytja'w. Maa quiwesuva jyuca judiuwe'shtyi tyujndena puii quiisna ūsa!. Sa' tyāaí Nasaretjuwe'sha's nwēese'jsa npiitstjē'ja'. <sup>6</sup>Dyuus yatte yujva nasa pcalsaty ca'ga'jya'vac yu' canzh vitna. Tyāa pa'ga cue'sha' tundtja'w, cue'sh ley ma'wē jycaatje' cytey yuuya!. <sup>7</sup>Nava comandante Lisias cue'sh yacj ja'nda wala juuna' cūjrra cusa'cj, <sup>8</sup>sa' atsesawe'sha' ne'jue'sh tashte pāatyjī'cjya' u'juetya jīnac jycaaj. Cue'sh we'weni' īshiinimée jyuca isateva jiyuya' indy yuu mpējy naa pitstjē'ja's jīnac we'we.

<sup>9</sup>Tyajū' judiuwe'sh cyte ij ūssava tyā' jyuca isasa yuja' jīna we'wete!, <sup>10</sup>ne'jue'sha' cuseju pta'shcu Pablo's we'wecajn. Atsa' Pablo' na'wēc we'we:

—Andya' jiiitj indya' wala kuj añu yā'lj cue'sh quiwete jycaajna ūsngu. Tyāa pa'ga andya' iindy dyi'pte ūucjmée pasya'vatj andy ma'wēsarrava. <sup>11</sup>Indy yuu mpaapējy tyāawe'sh we'weni' isa dyijteva jiyuya'. Dyusa's Jerusalente neewe'weya' andy pa'jni doce enrrāa yuutsa'. <sup>12</sup>Andya' tyāa doce ensu' dyuus yatte nasaty caapui'jna judiuwe'sh pcjaacjeni yat-su chjambte msuu yujva tyā'wē yūuna ūsu'tsmeetj. <sup>13</sup>Atsa' ewmée yūunisa' naata' jīna āate caavya'ja'jya' yu' quim yujva ājameetyna naa nasa'. <sup>14</sup>Nava āatetj pta'shi' Dyus tashte pa'jwa'j dyi'ja's āchj u'se caajiyu'jnisa' īshiinisa' jī'ty tyā'snatj nwēese'je' cue'sh yatsgawe'shtyi jype'jsa Dyusa's selpiina. Sa' tyā'wē Dyus jycaajni leyte fi'jni vite' Dyus yuwe pta'shsawe'sh fi'jnity jyucatj cytey nwēese'je'. <sup>15</sup>Tyāawe'shva ma'wēne'ta Dyusa's nwēese'jna yaaqui' tyā'wēyrrāatj andyva nwēese'jna yaaqui'. Uusaawe'sha' qui' ityi yuutyna ewsa ma'ty yuu meerra' ewmeesa ma'ty yuu nava ja'ndarraj sūjnatj yaaqui'. <sup>16</sup>Tyāasatj Dyus dyi'pte vite' pitstjē'jwe'sh dyi'pteva yuuwemée fi'nzewa'ja's pa'pchu'.

<sup>17</sup>Andya' vite quiwesu manz añu pecūjna u'jurra', andy quiwen u'tj judiuwe'shtyi vyu peesya' caajny ducjna Dyus ofrenda'sva ūsya'. <sup>18</sup>Andya' tyā'wē yūuna ley jycaajni'sva qui'sna jyā'jrra dyuus yatte ūspcachja', judiuwe'sh Asia quiwejuwe'sh pa'jrra dyuus yatte uytyi. Nava nasaty quīj yujva caapui'jna ūsu'tsmeetj. <sup>19</sup>Tyā'wē uysaawe'sh ayte pāatyjī'cjya' yuuwa'j jī'pja'ta', andy ewmée yūuna ūsteva uyrra'. <sup>20</sup>Meerra' comandante pcjacjete judiu ntjē'jsawe'sh vite' sacerdote npiitstjē'jwe'sh cyte ūssa i'cue'shrrāava andy ewmée yūuni's uyvá'cue na' mpeeta'shwe. <sup>21</sup>Andya' cyte ūsrra', Uusaawe'sha' qui' ityi yuutyna jīnarrāatj we'we tyā'sna vā'cue ewméc yuu sūju'cy jīc.

<sup>22</sup>Felixa's ew yā'cj pta'shni yu', tyāasac tyā'wērrāa wēse'jrrarrāa:

—Comandante Lisias pa'tje, tyāa yuwe's pjeu'ju'nja jīrra nvijt.

<sup>23</sup>Tyājū' Felixa' cpiitana's jycaacj:

—Pablo's tyjweetenu. Nava jwee jytjaacue juuna' yūumée miipe'lj, sa' tyajy namicuwe'sh yacj puuty we'wewa'ja'sva mes jīc.

<sup>24</sup>Manz en scjēwniite', Felixa' tyajy nyu Drusila yacj qui' cūjrra Pablo's pa'ya caacj, Jesucristo pta'shni's we'wecajn. Tyāa u'ya' judiuc yu'. <sup>25</sup>Atsa' Pablo' pta'shcu Dyus dyi'pte ew fi'nzewa'ja', sa' peecy cacue's ewmée yūuna jype'jwa'jme'. Tyā'wēme', nmej ente' Dyusa' castigaīna jīna we'wete', Felixa' wala ūucjrra na'wēc we'we:

—Āchjī yu' tyā'wērrāa mpeeta'sh. Vite ente andy en jī'pjurra qui' pa'ya'nja jīc.

<sup>26</sup>Pablo' vyu ducje'nja tyjwetecajn jīvāana sūjrrac tyā'wē manz usva pa'ya Felixa' tyāa yacj puuty we'weya'. <sup>27</sup>Tyā'wē e'nz añupcach Pablo's carcelte jype'jna ūsrrarrāa Felixa' ne'jue'sh casejc, atsa' vite ne'jue'sh Porcio Festoc u'ca. Nava Felixa' judiuwe'sh yaatseni fi'nze wēemeerra, Pablo's carcelte nvijtcu.

## Pablo' Festo tashte we'weni

**25** <sup>1</sup>Tyajú' Festo' Cesarea chjambte ne'jue'sh u'carra', tecj ente' Jerusalenna u'cj. <sup>2</sup>Cyte' sacerdote npiitstjê'jwe'sh vite' judiu jytujtjesawe'sha' utyaaty Pablo' ewmeesa' jîna päätyjî'cjya'. <sup>3</sup>Sa' Pablo's pe'jya' mcaaj Jerusalenna yuucajn jînaty pêjy. Tyâawe'sh yu' dyi'tje icjya' süjrraty tyä'wê pêjy. <sup>4</sup>Nava Festo pasrra':

—Pablo' Cesareate preesu üsa'. Atsa' manz enterráa andya' tyâa chjambnaí u'juetstju. <sup>5</sup>Tyâasatj na'jî': Tyâa pitstjê'j ewmée yûuni's päätyjî'cjwa'j ji'prra', i'cue'sh jytujtjesawe'sha' andy yacj yuwetyna Cesarea chjambna jîc.

<sup>6</sup>Festo' Jerusalente ocho en jytjaacue üsrrarráa qui' shawendcu Cesarea chjambna. Sa' cuscuscjê' yuwe paapëyni yatte u'carra cachna'va, Pablo's yuucaacj. <sup>7</sup>Sa' cûjutspcachja', judiuwe'sh Jerusalenuj pa'jsava utyaaty quíjteva seena' ewmeesa' jîna päätyjî'cjna. Nava isasa yuja' jîna äate caavya'ja'jya' yu' äjameeta'. <sup>8</sup>Tyajú' Pablo' na'wêc pas:

—Andya' quíjte yujva yuuwemeetj. Judiuwe'sh ley, Dyus yatna, Romate jycaajsa Cesar maate yujva yuuwemeetj jîte', <sup>9</sup>Festo' judiuwe'sh yacj ewte neeyüu wêerra na'wêc pêjy Pablo's:

—¿Jerusalenna u'jwêenga' iindy yuwe's cyte pjeu'cjan? jîte', <sup>10</sup>Pablo pasrra':

—Andy yuwe's pjeu'jwa'jsa tashte yäl'j üstju, Cesar qui'pni iindy tashte. Andya' judiuwe'sh yacj quíjte yujva yuuwemeeteva indya' ew jîing. <sup>11</sup>Meerra' andy uuwa'tje äjváane'tca yuuwe yuu atsa' tyä'wête yu' uuwa'ja's wa'lme'nja. Nava päätyjî'cjnisa quíj yujva isameete yu', quim yujva päätyjî'cjnsa cusete andya's ducjya' äjameena. Wejyva Cesar paapëyni wejy ewna jîte', <sup>12</sup>Festo' vite npiitstjê'jwe'sh yacj puuty we'werra', na'wêc pta'sh Pablo's:

—Cesar paapëyni wejy ewna jî'ng na' tyajy tashte pa'j u'juene'nga jîc.

<sup>13</sup>Tyajú' manz en scjêwniite', jycaajsa Agripa vite' Berenice yacj Cesarea chjambte pa'jty Festo's wechaya'. <sup>14</sup>Cyte cuy entyi üsu', atsa' Festo' jycaajsa's pta'shcu Pablo yuwe's:

—Ayte tech pitstjê'j preesu üsa', Felix nviitni. <sup>15</sup>Andy Jerusalente üste', sacerdote npiitstjê'jwe'sh vite' judiu ntjê'jsawe'sh päätyjî'cjtyi tyâa pitstjê'ja's ewmeete nviitcajn. <sup>16</sup>Atsa' andya' pta'shtju: Romanowe'sh leya' maa yujnava icj caja'tsme', päätyjî'cjnsa yuuwesa yacj caapdyi'pu'jrra quim yuuweteva jiyumey yu'. <sup>17</sup>Tyajú' andya' jytjêyuumée päätyjî'cjnsawe'sh pa'jatspcachja', cuscuscjê' yuwe paapëyni yatte u'cana'va tyâa pitstjê'ja's yuucaatj. <sup>18</sup>Sa' ¿quíj yûupa'ga yuuwecy? sÿjna üytjasnatj u'pu', nava päätyjî'cjya' utyasaawe'sha' ma'wê yujva ewmeete nviit-ya' äjawa'lmeesarráanaty we'we. <sup>19</sup>Tyâa pitstjê'ja's atsesawe'sha' tyâawe'sh Dyusa's neewe'wena fi'nzeni vite' tech pitstjê'j Jesus yaasesa uurrava

qui' ityi yuuc jina Pablo pta'shni'srraaty we'we. <sup>20</sup>Tyaa yuwe's andya' ma'wē pjeu'jya'va ajameerra', Pablo's pējytju: ¿Jerusalenna u'j wēnga' cyte iindy yuwe's pjeu'cjan? jina. <sup>21</sup>Nava tyaa we'werra': Cesar paapēyni wejy ewna jic, atsa' tyā'wē yā'tje', aytee preesu ūsune'nga Cesar tashte andy caajpcach jinatj we'we.

<sup>22</sup>Tyajū' Agripa' na'wēc we'we Festo's:

—Tyā'wēyā'tje', wēse'je'nja tyaa pitstjē'j we'weni's jite', Festo pasrra':

—Cuscusí wēse'jene'nga jic.

<sup>23</sup>Cuscuscjē' jycaajsa Agripa vite' Berenice vite' soldau npiitstjē'jwe'sh vite' chjambte jytujtjesa tyāawe'sh yacj seena' zhichcue susna u'cana cūjty Festo u'pnite. Naapcachja' Pablo's yuu caajrra', <sup>24</sup>Festo' na'wēc we'we:

—Jycaajsa Agripa vite' ayte pcjaacjena cue'sh yacj ūssawe'sh cshavyte tyajatstju naa pitstjē'ja's. Judiuwe'sh maanzcuēesava naa pitstjē'ja's atsewe'we'ty Jerusalente vite' ayteva, sa' icjterrāa ewna jina nestyi yu'. <sup>25</sup>Nava tyā'wē icjcajnva quijteva yuuwemeena'c tjengu'. Nava tyāaíic Cesar paapēyni wejy ewna jī'. Atsa' tyajy tashna caja'nja sūju'tj. <sup>26</sup>Nava quijte yuuweteva tyā'sna pta'shna jycaajsa's fi'jwa'j yu' uymeetj. Tyāasa āchja' jycaajsa Agripa iindy tashte tyajatstju, vite' jyucaysa dyi'pte, atsa' indy paapējyrra quijte yuuweteva cpajcyrra pta'shte andya' etsa's fi'jrra caja'nja. <sup>27</sup>Tyā'wēme', cyulna'c tjengu' preesu caajrrava yuuwe yuuni's pta'shmeete'.

### Pablo' tyajy yuwe's jycaajsa Agripa's pta'shni

**26** <sup>1</sup>Tyajū' Agripa' na'wēc Pablo's we'we:

—Indy quij yūuna fi'nzerrava mpeeta'sh jite', Pablo' cuse's quiisrra na'wēc pta'sh:


<sup>2</sup>—Judiuwe'sha' andya's ewmeesa' jīnaty pāatyjī'cje' tyā'sa' jycaajsa Agripa iindy dyi'pte āate pta'shwa'ja's ji'pjurra' wala wecha'tj. <sup>3</sup>Indya' jyuca ew jīing cue'sh judiu jī'j fi'nzeni vite' na'wē fifyfyrraj yajcyrra puuty we'we'tja'w tyā'sna. Tyāasa wejy wa'lmée mwēese'j.

### Cristo's jypa'gamey Pablo fi'nzeni

<sup>4</sup>Andy le'chcuējūy ma'wēne'tca fi'nze andy quiwete vite' Jerusalente tyā'sa' judiuwe'sh jyucaysa jiita'. <sup>5</sup>Fariseowe'sha' seena' juuna' jycaaja'ty Dyus leya's jyuca cytey yuucajn andya' tyāatewe'shtju yu' pitstacytey, atsa' tyāawe'sha' jiita' na' tyā'sa' pta'shya' ājatyna wa'lmeerra yu'.

<sup>6</sup>Dyusa' cue'sh yatsgawe'sh yacj puuty we'werra uusaawe'shtyi qui' ityi vit-ya' neeyūuc tyā'sa' cytey yuuna sūjnatj fi'nze', naa pa'ga yuurráaty paapējyrra' ayte nuypa'j. <sup>7</sup>Jycaajsa Agripa mjiyu: Israelwe'sh docesate jī'j jyucaysaty qui' ityi yuuwa'ja's ūytjasu', tyāasaty een isa pety cus Dyusa's selpi'. Tyā'wē yūuwa'ja's ūytjaspaga yuurráaty judiuwe'sh





(Hechos 26.3)

andya's ewmeesa! jírra atse!. <sup>8</sup>Dyusa' tyā'wē uusaawe'shtyi ītyi vituna  
¿sūju'tsmecue' vacy i'cue'shva?

### Dyus yacj fi'nzesaty pcyuuni's pta'shni

<sup>9</sup>Andya' nyaffia' Jesus Nasaretjuwe'sha's ajtserra quījva yu'nja sūjrra,  
<sup>10</sup>Jerusalente sacerdote npiitstjē'l'jwe'sh jycaatje', Jesus caapiya'l'jni's  
nwēese'jsawe'sh maanzcuēesatyva carcelte tyajtj. Sa' icjetste uyrra', ew  
yuj yuutsta' sūjnatj fi'nze!. <sup>11</sup>Maanzcuēe usva iipcyuutj, Jesus yase's  
atsewe'wecajn. Msuuva judiuwe'sh pcjaacjeni yat-su tyā'wērrarráatj yuu.  
Sa' seena' pyūuscue yuute', vite quiwesuva u'tj, tyā'wēy ajtserra pcyuuya!.

### Pablo' Dyus yacj fi'nzeya' utyani's qui' pta'shni

(Hch. 9.1-19; 22.6-16)

<sup>12</sup>Tyā'wē yūuya' sūjrra, Damasco dyi'l'j u'l'juetstju yu', sacerdote  
npiitstjē'l'jwe'sh caajni. <sup>13</sup>Nava jycaajsa mwēese'l'j: dyi'tje u'l'juetste ēepyāj  
yuutspachja', secte jytjaacue eena'sa ēejū cweetjcu andy vite' pi'cyna  
yuusáa jyucaysaty. <sup>14</sup>Tyājū' jyucaysa wetetja'w, naapcachja' andya'  
wēse'tj hebreo yuweju na'wē we'weni's: Saulo, Saulo, ¿quījya'nga

andya's ajtserra pcyuuya' pacué'? Indya' peequírráa ya'cpã'yuuwa'ja's pacuena üsngu jíte', <sup>15</sup>pējytju: ¿Indya' quimnga? jíte', pta'shcu: Andya' Jesustju, indy na'wē ajtserra pcyuuya' pacue'ng tyāatj. <sup>16</sup>Nava āchja' mquiite. Āchj na'wē vyaatj sa' vite enteva vya'nja, atsa' tyā'wēc vyaa jīna mteeva pta'shya' u'juene'nga andyna selpiina. <sup>17</sup>Indya's nwe'we'nja judiwe'sh cuseju, sa' judiu ji'jmée vite nasa quiwesu cajatstju cysüva nwe'we'nja. <sup>18</sup>Tyāawe'sh tashsu cajatstju, atsa' indya' tyāawe'sh yafytyi pjaandene'nga, peena yu' chji'ndyte fi'nzemée eena'sa's uycajn, sa' echtjē'j cusete fi'nzemée Dyus yacj fi'nzecajn. Andya's jypa'gasa' tyāawe'sh pcaltiyi peltunāyni neeyürra cielute üswa'ja's jypa'gatyna Dyus tyjityjnisawe'sh yacj ja'ndarrajj jic andya's.

### Pablo's Cristo vyaarra jycaajni's cytey nwēese'jni

<sup>19</sup>Agripa, indya'stju pta'shi': Tyā'wē vyaarra we'weni's wa'lmée cytey nwēese'jrra <sup>20</sup>Damascote üssawe'sh cjuē'ytyi pta'shtju Dyus yuwe's, e'su' Jerusalente, vite' Judea quiwesu jyuca. Sa' judiu ji'jmée vite nasatyva pi'cytju, pcaltiyi nvijtrra Dyusa's pacuerra ew yūuna mfi'nzewe jīna. <sup>21</sup>Tyā'wē yūupa'gaty judiwe'sha' dyuus yatte andya's tundrra icj wēe. <sup>22</sup>Nava Dyus pu'chte', āchpcach Dyus yuwe's le'chcuc yujva jypumbameetj pta'shna fi'nze' jytujtjesa ma'ty yuu ma'wēsatyva jyucaysaty. Sa' Dyus yuwe pta'shsawe'sh vite' Moises pta'shni tyāaju bagachte yujva fiy yu' pta'shi'tsmeetj. <sup>23</sup>Tyāawe'sha' na'wēty pta'sh: Dyus tashuj yuusa Cristo' wala pytjaa yuurra uurrava qui' tyāa cjuē'y ityī yuuna, sa' eena'te fi'nzewa'ja's pta'shina cue'sh jijty tyā'wēy vite quiweju nasatyva jīnaty pta'sh. Tyā'wēyrráatj andyva pta'shi'.

### Pablo' Agripa's Cristo tashte cuutya'jal'dyijc

<sup>24</sup>Pablo tyā'wē we'wete', Festo' na'jīnac sus we'we:  
—Pablo, luucu yuuning. Jwee wala piyarrane'nga tyā'wē luucu yuu jíte', <sup>25</sup>Pablo pasrra':  
—Ne'jue'sh Festo indya' mjiyu: Andya' luucumeerra íitj üus yajcyrra jypumbamée isasarráana pta'shi'. <sup>26</sup>Tyāa yuwe's jycaajsa Agripa ayte u'pa' tyāava ew jiia'. Tyāa pa'gatj andya' tjaamemée pta'shi' tyajy dyi'pte. Naa yuwe' paatste sūtjrra we'wenisame'. Tyāa pa'ga jycaajsava tyāa yuwe's ew jiina sūju'tj. <sup>27</sup>¿Dyus yuwe pta'shsawe'sh we'weni's ew jiiyujmeengá' vacy, jycaajsa Agripa? Indya' jiiyujne'nga sūju'tj jíte', <sup>28</sup>Agripa' na'wēc we'we:

—Andya's Cristo ju'ngu vit-ya' le'chcuēeng pejíi jíte', <sup>29</sup>Pablo we'werra':  
—Le'chcuēe ma'c pejíi meerra' wala ma'c pejíi nava indyrrámée, ayte āchj wēse'jna ūsta' tyāawe'sh jyucaysatyco Cristo ju'ngu yuu jytjāasu' Dyusa', andyva ma'wētca Cristo ju'ngu yuu tyā'wēy, nava cadenaju tundnimée.

<sup>30</sup>Pablo tyā'wē we'wete!, jyucaysa quiitety, jycaajsa, ne'jue'sh, Berenice cyte ij pa'jsa jyuca. <sup>31</sup>Sa' fiity tyuteena u'j, na'jīna puuty we'weya' tyāawe'sh pwe'sh:

—Naa pitstjē'ja' quīj yujva yuuwemeesa' icjcajn yuuva. Sa' carcelterraáa yujva ūswa'j ji'pjme' jīrra', <sup>32</sup>Agripa' na'wēc we'we Festo's:

—Tyā'wē tyāaí Cesar paapēyni wejy ewna jīmeevatsa', naa pitstjē'ja's tyjweteya' ewna jīc.

### Pablo's Roma chjambna caajni

**27** <sup>1</sup>Italia quiwen cue'shtyi caajya' puuty we'weyā'jrra', Pablo vite preesu yā'jrra ducjtyi Batallón Augusto yaasesate cpiitan Julio cusete. <sup>2</sup>Tyajū' Adramitio chjambte barco Asia quiwen u'jsate cjēetja'w, atsa' Aristarcova yuwe'c, Macedonia quiwete Tesalónica chjambtewe'sh. <sup>3</sup>Cuscuscjē' Sidón chjambte pa'tja'w. Atsa' cpiitan Julio' Pablo's namicu yat-suc pa'jya' caaj tyāawe'sh sājīcajn. Tyāa cpiitana' Pablo yacj wala ewsa yu'c, tyāasac tyā'wē yūu. <sup>4</sup>Sidón chjambuj casejrra', Chipre quiwe's jembu ju'ngutja'w nvijtina cjēw, wejya yuppa'ga. <sup>5</sup>Tyajū' Cilicia Panfilia quiwesu utya scjēwna u'jrra, Lisia quiwete Mira chjambtetja'w pa'j.

<sup>6</sup>Cytea' soldau cpiitana' teech barco Alejandriajuwe'sh Italia quiwen u'jsa'scu uy. Sa' cue'shtyi cytec caateca'j tyajū qui' u'jya'. <sup>7</sup>Nava tyā'wē wejya yupna ūste!, wala kuj en tuundcuērraj u'jrra, wala tjēy pa'tja'w Gnido chjamb dyi'pte. Tyajū u'jrra', Salmon quiwee dyi'psutja'w scjēw, Creta quiwesu ta'nguna. <sup>8</sup>Sa' tyāa quiwe pucasu wala tjēy u'jrra, teech ajte pa'tja'w Buenos Puertos yaasesate. Tyā' Lasea chjamb utyatec neeyū!

<sup>9</sup>Tyā'wē tjēy u'jrra wala en iviitpa'ga, nus pa'jwa'j en utyaac icjte u'jwa'j seena' ūucjūucjsa. Tyāa pa'gac Pablo' yu'cypej <sup>10</sup>na'jīna:

—Jyucaysa mwēese'jwe, cue'sh u'jwa'ja' wala ūucjūucja'. Barco pety carga vituna, atsa' cue'shva uuwa'ja's ji'pjuvā'nja'w.

<sup>11</sup>Tyā'jīteva, soldau cpiitana' Pablo's nwēese'jmée barco namu vite' barco tjengsawe'sh we'wenirrá'scu nwēese'j. <sup>12</sup>Cyte chjamba' nus ente ūswa'j ewmeec yu'. Tyāa pa'gaty jyucaysa u'jya' yajcy Creta quiwete Fenice chjambte pa'jrra nus ena's cyte yu'scjēwya' sūjrra, Fenice chjambte' nus ente ūswa'j ūucjūucj meec yu' naa pa'ga.

### Mar pyājte wejyaa wala quiiteni

<sup>13</sup>Buenos Puertos yaasesajū casejetste yu', wejcuērráac wejyana ūsu!, atsa' Fenice chjambte pa'jya' ājavā'nja'w sūjrra u'jty Creta quiwe pucasu tuundcuērraj. <sup>14</sup>Nava wejcuē u'juetspcachja', wejyaa wala cue'sh u'jwa'j dyi'puj sējrra barco's yupcu. <sup>15</sup>Sa' tyajūyā'ja' ma'wēva jyūna u'cj. Atsa' barco's caajya' ājameeyā'jrra', cuch yuumeetja'w wejya ma'wēva jyūna u'cjan. <sup>16</sup>Íc pyājte quiwe le'chcuēsa Clauda yaasesa e'ssutja'w scjēw, cysūa' wejya tyacue chjāchjameec ūs yu'. Atsa' barco le'chcuē jyūrra

u'jnisa's wala tjëyrráava caateca'jya' ājātja'w barco walate. <sup>17</sup>Tyājū' barco wala's lasu walaju pyājūjy tundtja'w suweecajmen. Sa' tyity wala Sirte yaasesate váa watsuya' u'juena sūjna ūcjrta, ēete tela wala's spajcytyi wejya ma'wēva barco's jyūna u'cjan. <sup>18</sup>Tyā'wē wejya seena' chjāchja ūste', cuscuscjē' carga's ĩcjjē pūshya' tacjtyi. <sup>19</sup>Atsa' tecj en yuutste', cue'shíiva ĩcjjē pūshya' pu'chtja'w barco ēseecajn. <sup>20</sup>Tyā'wē wejya seena' yuuna ūste', sec, estrella, quīj yujva vyaameeta' maanzcuēe enva. Atsa' cue'sh yuuva ĩtyī yuume'nja'w sūjwa'ja'srráatja'w ji'pju'.

<sup>21</sup>Tyā'wē maanzcuēe en quīj yujva ū'mée yujna ūssaty Pablo' na'wēc we'we:



(Hechos 27.21)

—I'cue'sha' andy we'weni's nwēese!jrra Creta quiwejū casejmeevatsa', na'wē ñus cnayna iviituwa'ljmeene'tca'w yu'. <sup>22</sup>Nava āchja' ūucjnuwe. Ayte u'ljsa quim yujva uumeetyna, macue barco yu' suweerra vituteva. <sup>23</sup>Andya' Dyusna selpisaatj, atsa' āchj cus Dyus angel vyaarra <sup>24</sup>na'wēc we'we: Pablo, ūucjnu. Indya' Romate jycaajsa tashte utyaawa'lj jipjngu, atsa' tyāa pa'ga Dyusa' nwe'weya'va' ay barcote u'ljsa jyucaysaty jic. <sup>25</sup>Tyāa pa'ga i'cue'sha' ūucjmée chjāchja miijajcywe. Andya' Dyusráanatj yaaqui', angel we'weni' cytey yuuna sūjna. <sup>26</sup>Sa' ĩcj pyājte quiwe le'chcuēsate nviitni yu'nja'w jic Pablo'.

<sup>27</sup>Adria ĩcjte wejya jyūna u'jni e'nz qui'su ājatste!, tyāa cuspyāj yuutspcachja', barcote tjengsawe'sha' quiwe utyasu u'juetsrraty jiyu. <sup>28</sup>Sa' macjue ĩcj dyiiteva jiyuya' isaty, atsa' treinta y seis metrorráac dyii yu'. Tyajū' yats yatste u'jrra qui' isaty, atsa' cytea' veintisiete metrorráac dyii yu'. <sup>29</sup>Tyajū' peñate váa iica'nja'w sūjna ūucjrra, barco's neewewa'ljsa pajnz tsam walaty ĩcjcjē acj barco e'scjē, wejya jyūna u'cjamen. Sa' wala ūucjna ūytjastyi cjjycpcach. <sup>30</sup>Naapcachja' barcote tjengsawe'sha' barco yatscjē vite tsam walaty ĩcjcjē acjetstja'w jīnarráa barco le'chcuēs ĩcjcjē spaaquitsty yu', tyāate cjēerra casejna u'j wēerra. <sup>31</sup>Nava Pablo' pta'shcu soldau cpiitan vite' soldauwe'shtyi:

—Naawe'sha' barcojū casejna u'tje!, i'cue'sha' ĩtyi yuumeene'cue jīte!, <sup>32</sup>soldauwe'sha' barco le'chcuē tundni lasuty spē'tjrra ĩcjcjē wāatajty barco le'chcuēs.

<sup>33</sup>Tyajū' Pablo' cusítey neewe'wec jyucaysaty quījrráava ū'cajn:

—I'cue'sh dejmée tyā'wēy ū'vamée ūsni e'nz qui'su yāl yuutsa'.

<sup>34</sup>Atsa' i'cue'shtyi neewe'we'tj quījrráava ū'cajn. Tyā'wēme!, casejya' ya'chjāchjameena. Āchja' ūucjnuwe. I'cue'sh maa yujva vitumeene'cue.

<sup>35</sup>Tyā'jīna'va, Pablo' jyucaysa dyi'pte Dyusa's wecharra pana's ū'c.

<sup>36</sup>Tyajū' jyucaysa wejy ūucjmée tyāawe'shva ū'ty. <sup>37</sup>Barcote u'ljsa jyucarray yu' doscientos setenta y seis nasatja'w yu'. <sup>38</sup>Quij ū' wēerrava tyā'sna ū'na jyā'jrra!, scuutyja's ĩcjcjē pūshtja'w barco jweeírráa ēseeecajn.

### Barco ĩcj dyiicjē cjēeni

<sup>39</sup>Cjjycyna jyā'lnite!, barcote tjengsawe'sha' jiyumeeta' maa quiwete paljrrava. Nava ĩcj pucasu quiwe ucuesa u'pte uyrra!, cyte nuypa'lja' ājāvá'nja'w sūjrra cytety u'lja' yajcy. <sup>40</sup>Sa' tsam wala ĩcj dyiicjē acjnisa lasuty spē'tjna'va, tela's ēete qui' quiisrra, barco's tuunduērraj jyūna u'ljty ucuete pa'lja'. <sup>41</sup>Nava teeche ajte ĩcj jwee yu' dyiimeete yu' seena' chjāchja ucapajcyna ūsu'c cytec cūjya' u'j barco!. Atsa' barco ĩtsja' quiwete watsuna cūjte!, ma'wē yujva ēseme!, naapcachja' barco e'su yu'tūchjasáa ujcana cūjrra jyuca suwuutscu yu'. <sup>42</sup>Tyā'wē yuutste!, soldauwe'sha' preesuty jyuca icjya'vaty yu', pejndna casejrra iyuwe'shte. <sup>43</sup>Nava soldau cpiitana' Pablo's nwe'weya' yajcy, sa' quicjje'jmeerra na'wēc jycaaj:

—Maava pejndya' jiisa' i'cue'sh cjuē'y yatste me'ljwe, <sup>44</sup>naapcachja' vite' taplasu mcjēewe, meerrava barco pe'llasu tyā'wē yūurra mcaasejwe jite', tyā'wē yūurra jyucay quiwete pa'tja'w uumée.

### Malta quiwete Pablowe'sh pa'jni

**28** <sup>1</sup>Cyte jyucaysa uumée pa'jrratja'w jiyu tyāa ĩc j pyājte quiwe' Maltaga yaase yu'. <sup>2</sup>Cyte u'psa nasa' cue'shtyi wa'lmée jypa'garra, ipy wala yutjrra cue'shtyi bajchya' pi'cytyi, nus tyā'wē wala pa'jna ūspa'ga. <sup>3</sup>Tyājū' Pablo' e'cy ūjndy pcjacjrra, ipyte āshitscu yu', naapcachja' tyāa ipy pyājū ul weeswee ūpjna casejrra Pablo cusetec wa'cy. <sup>4</sup>Tyā'wē Pablo cusetec ul wa'cyte', cyte ūssa' na'wēty we'we tyāawe'sh pwe'sh:

—Naa pitstjē'ja' nasa icjsana. Macue ĩc jte yu' uumeeteva, Dyusa' ĩtyi u'ju jytjāasmeene' jī'ty. <sup>5</sup>Atsa' Pablo' cuse's yajtarra ula's ipycjē acjcu, nava tyajy cuse yu' quījva yuume!. <sup>6</sup>Atsa' nasa tjengna ūssa yu' ¿Ma'wēn uucy? sūjna jyucaysa ūytjasnaty ūsu!. Nava quījva yuumeyna wala tyach yuute!:

—Pablo' nasa icjsamée wejyva Dyusna jī'ty.

<sup>7</sup>Tyāa quiwete teech ne'jue'sh jytujtjesa u'pu'c Publio yaasesa. Tyajy uutjash ja'ndatetca'w pa'j cue'sha', atsa' tyāa pitstjē'ja' cue'shtyi wala ew jype'cj tecj enpcach. <sup>8</sup>Tyāa ensu' Publio neya' ātsa'naga ūsu' cacuesecte eerrāa uchi'chrra. Atsa' Pablo' tjengya' u'jrra, peequinzerra Dyus yacj puuty we'wete', chjāchjac. <sup>9</sup>Tyājū' tyāa quiwete vite ātsa'sawe'shva pa'jrra', jyuca catyjirraty neeyūu. <sup>10</sup>Tyājū' cue'shtyi wala peeygājrra quījquījva dyl'tje peejini's jyucaty pees, barcote cjēerra qui' u'jya'vagachja'.

### Roma chjambte Pablo pa'jni

<sup>11</sup>Malta quiwete tecj a'te ūsrrarrāa, Alejandría quiwejuwe'sh barco cyte ūsu'c nus piīpcach tyāate cjēerratja'w u'j. Tyāa barco' yatste e'nz dyus ĩtyimeesatycu piisani jī'pju', Castor vite' Polux yase jī'pjsa. <sup>12</sup>Tyājū casejrra', Siracusa chjambte pa'jrra, tecj entja'w ūsu!. <sup>13</sup>Tyājū qui' u'tja'w quiwe pucagarrarrāa, sa' Regio chjambtetja'w pa'j. Cuscuscjē' e'su wejya sējte', tjēymée u'jya' ājarra e'nz encjē' Puteoli chjambte pa'tja'w. <sup>14</sup>Cytea' puuty uytja'w yacjtjē'jwe'shtyi, atsa' tyāawe'sha' pi'cytyi tyāawe'sh yatte teech qui'su ūscajn. Tyājū casejrratja'w Roma chjambna u'j. <sup>15</sup>Romate yacjtjē'jwe'sha' cue'sh yujteva jii yā'tja yu', sa' teech ajte Tres Tabernas yaasesa utyate teech chjamb ūsu'c Foro de Apio cyteta pu'tjengya' yuwé!. Atsa' Pablo' tyāawe'shtyi uyrra', Dyusa's wala wechana ūuste wēt wētcu yajcy.

<sup>16</sup>Romate pa'jna'va, soldau cpiitana' vite preesutyi' ducjcu cyte carcelte tjengsa npiitstjē'ja's, nava Pablo yu'sa' vite yatte fiic tyaj teech soldau tjengwa'jsa tyajrra.

### Roma chjambte pa'jrra Dyus yuwe's pta'shni

<sup>17</sup>Cyte pa'jni tecj en scjēwniite!, Pablo' pa'ya caacj cyte Romate judiu npiitstjē'jwe'shtyi. Sa' pcjaacjete!, na'wēc we'we:

—Andya' quíjva ewmée yu' yūumeetj judiuwe'shtyi, sa' cue'sh yatsgawe'sh caapiya'jni'sva ajtsena fi'nze'tsmeetj. Macue tyā'wēteva, Jerusalente andya's tundrra romanowe'shtyi ducjtyi. <sup>18</sup>Atsa' romanowe'sha' paapējytyi, nava ewmée yūuni's yu' uymeerra', andya's tyjweete wēety icjwa'tje nvijyt-ya' yu' ājameerra. <sup>19</sup>Tyā'wēteva, judiuwe'sh yu' caatyjwete'jmeeta!. Atsa' tyā'wē yā'tje!, andya' romanowe'shtyi jycaajsa Cesara'stju pi'cy andy yuwe's paapēycajn. Nava judiuwe'sh andyna presu'jsa yuutyi' pāatyjī'c'jya'vameetj. <sup>20</sup>Tyāasatj i'cue'shtyi pa'ya tyā'jīna pta'shya!. Israelwe'sha' ūytjasu'tja'w Dyus tashuj yuusa Cristo's tyāa pa'ga yuurráa andya' na'wē cadenaju tundni ūstju.

<sup>21</sup>Tyā'wē pta'shte!, na'wēty we'we:

—Judeajū indyna nuywe'wena caajni carta quíjva iijypa'gameetja'w cue'sha!, tyajū judiuwe'sh pa'jrrava pta'shi'tsmeeta' indya's atsewe'weni yu'sa. <sup>22</sup>Āchj u'se pta'shni's mteeva jyucaty atsewe'we!, atsa' tyā'sa' indya' ¿maa sūju'nga? Indy yaacyni's jiyu wēetja'w jirra!, <sup>23</sup>vite ente qui' pa'jya' neeyūurra tyāa en ājte!, wala cuj pcjaacjerra pa'jty Pablo ūsni yatte. Atsa' Pablo' cusí pta'shrra cusna quíjpcachcu pta'sh Dyus jycaajwa'ja's. Sa' Moises fi'jni ley vite! Dyus yuwe pta'shsa tyāniiteywe'sh fi'jni ma'wērrajne'ta Jesusa's we'wena fi'j tyā'snac āate caajiyu'j. <sup>24</sup>Atsa' maafí yu' Pablo pta'shni's wa'lmeety jypa'ga, nava vite yu' wa'ltyi. <sup>25</sup>Tyā'wē maafí yu' nwēese'j wēemeerra tyuteena u'juetste!, Pablo' na'wēc tyāawe'shtyi we'we:

—Dyus yuwe pta'shsa Isaiasa's Dyus Espiritu cwe'we'tje!, isa yuj na'jīna pta'shne' cue'sh yatsgawe'shtyi!:

<sup>26</sup>U'jrra tyāa nasatyi' na'jīna mpeeta'sh:

I'cue'sha' wēse'jrrava, jiyumeene'cue.

Meerra' uyuvá'cue, nava jiyumeene'cue.

<sup>27</sup>Tyāa pa'gatey tyāawe'sh ūuste jiyuwa'j yu'sa' ji'pjmée yā'tja',

Sa' wēse'jya'va wa'lu'ty.

Tyāawe'sh yafya' apjanita!, uymeerra' nwēese'jmeetyna.

Sa' ūusteve ew jiyumeetyna.

Sa' andy tashteva utyameetyna pcaltyi peltunāycajn jīnac we'we.

<sup>28</sup>I'cue'sha' mjiyuwe: Āchjūyā'ja' Dyus ewte nviitwa'ja's judiu jiljmée vite nasarráaty pta'shwa'ja!, atsa' tyāawe'sha' nwēese'jetya.

<sup>29</sup>Tyā'wē Pablo we'wete!, judiuwe'sha' tyāawe'sh pwe'sh wala cuj jwend we'wena u'jty.

<sup>30</sup>Pablo' e'nz añu utac yat pqui'jrra tyaaajni ūsu!, sa' cyte tjengya' pal'saty jyucaysatycu jypa'ga!. <sup>31</sup>Cytea' quim yujva cuch yuuniméec fi'nze' Dyus jycaajwa'j ena's pta'shna, tyā'wēy Jesucristo caapiya'jni'sva āatec pta'shna fi'nze!.